

**EIGHTH LEGISLATIVE ASSEMBLY OF MIZORAM
(SEVENTH SESSION)**

LIST OF BUSINESS

FOR ELEVENTH SITTING ON THURSDAY, THE 11th MARCH, 2021
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

FINANCIAL BUSINESS

**** DISCUSSION AND VOTING ON DEMANDS**

2. **PU ROBERT ROMAWIA ROYTE**, Minister to submit to the vote of the House various Demands under his charge.
3. **PU LALCHAMLIANA**, Minister to submit to the vote of the House various Demands under his charge.

H. LALRINAWMA
Commissioner & Secretary

.....

** Please see Bulletin Part-II Sl. No. 168 dated 9th March, 2021 for Demands to be moved by Ministers.

SPEAKER : *Mi fel ka chuan finna thu a sawi thin a, A lei chuan rorel felnna thu a sawi bawk thin.*
Sam 37:30

Zawhna leh Chhanna-ah kan kal nghal ang a, Member zahawm tak Pu VL Zaithanzama starred Question No.156, zawt turin i lo sawn ang.

PU V.L. ZAITHANZAMA: Pu Speaker, ka lawm e. Land Revenue & Settlement Minister zahawm tak chhan atan ka zawhna te chu heng te hi a ni e-

- a) Revenue Department hnuia court case (Civil) leh land dispute case fel lo awm mek engzat nge awm?
- b) Land acquisition thil leh private ram luhsak avanga sawrkar court-a chak loh avangin kum 2019-2020 chhungin sawrkarin sum engzat nge a hman?
- c) Sawrkar Flagship Programme SEDP hnuia mau chinna leh ran vulhna tur (khaw thlan bik) te tan land survey neih tum a ni em?

SPEAKER : A chhang turin Minister zahawm tak Pu Lalruatkima ka sawm e.

PU LALRUATKIMA, MINISTER: Pu Speaker, Member zahawm tak Pu VL Zaithanzama zawhna chhanna chu-

- a) Land Revenue & Settlement Department hnuia court case (Civil) leh land dispute case fel lo awm mek zat chu hetiang hi a ni-
 - i) Court case (Civil) la chinfel loh awm anga ngaih hi 1863 a la ni a, Mara Autonomous District Council (MADC) ah hian 13 awm anga ngaih a ni.
 - ii) Dispute case fel lo hi 1804 vel chin fel loh awm anga ngaih a ni a, Mara Autonomous District Council (MADC)-ah hian 3 awm anga ngaih a ni.
- b) Land acquisition thil leh private ram luhsak avanga sawrkar court-ah a chak loh avangin kum 2019-2020 chhunga Mizoram sawrkar-in sum sen a neih chu UD&PA Department-in Edenthar Veng-a Hawngtial ram BSUP building sakna ram avangin Land Acquisition Compensation ₹88,84,154/- a seng a. Tin, MZU Road-ah land value Court-in tihpun a rem tih avangin PWD-in ₹1,61,95,920/- a seng bawk a ni. Hemi kum chhung hian Railway Ministry in land value a pek loh chu Court Order angin ₹49,54,59,000/- a chawi bawk a ni.
- c) Sawrkar Flagship Programme SEDP hnuia mai chinna leh ran vulhna tur (khaw thlan bik) te land survey hi Lawngtlai District-ah neih tum mek a ni a, District dangah hmalakna a la awm rih lo.

SPEAKER : Zawhbelhna zawt tur in Member zahawm tak Pu C. Lalsawivunga ka sawm e.

PU C. LALSAWIVUNGA : Pu Speaker, ka lawm e. Aizawl khawpui laili a awm Assam Rifles te hi insawn chhuak thuai turin kan beisei thu kan Minister zahawm tak hnen atang pawhin kan ngaithla a. Hemi Assam Rifles ten an luah ramchhung ah hian LSC nei engemaw zat an awm a, heng LSC te hi cancel tur an nih thu Assembly-ah chhan a ni tawh a. Tunah hian chung mimal LSC te chu cancel fel a ni tawh em tih kha ka zawhna a ni a. Tin, cancel a la ni loh chuan, eng harsatna nge awm tih kha ka zawhbelhna a ni e.

SPEAKER : Chhang turin a changtu Minister zahawm tak Pu Lalruatkima ka sawm e.

PU LALRUATKIMA, MINISTER: Pu Speaker, Member zahawm tak Pu C. Lalsawivunga zawhna kha, Assam Rifles ram cancel turin Council of Ministers chuan a rel a, chutiang chuan kan Chief Secretary hoin hmalak dan turte an han buaipui a. Chutih laiah chuan PIL case Central YMA-in an lo thehlut bawk a, chu PIL pawh chu hearing nei turin tunhnaiah hian a awm bawk a. Chuvang chuan, tun dinhmunah chuan cancel tura buaipui mek a ni a, chutah chuan Court hearing leh PIL hearing kan la nghak a, chungvang chuan kan la cancel fel thei lo a ni e.

SPEAKER : Starred Question No. 157, zawt turin Member zahawm tak Pu Nihar Kanti Chakma ka sawm e.

PU NIHAR KANTI CHAKMA: Pu Speaker, ka lawm e. Ka zawhna Starred Question No. 157, Public Health Engineering Department Minister zahawm tak chhan atan-Tlabung khuaa PHE tui pump-na khawl hi duh angin a lian tawk lova, mipui lamin tui thianghlim kham khawp an hmu lo thin a. Chuvangin PHE tui pump khawl tun ami aia lian min pe thei em, tih ka zawt e.

SPEAKER : Chhang turin Dy. Chief Minister zahawm tak PHE changtu, Pu Tawnluia ka sawm e.

PU TAWNLUIA, DEPUTY CHIEF MINISTER : Pu Speaker, Member zahawm tak Pu Nihar Kanti Chakma zawhna chhanna chu-

Tlabung khuaa PHE tui pump-na khawl hi khawl lian zawka thlak tumna a awm rih lo tih a ni.

SPEAKER : Zawhbelhna zawt turin a question neitu, Member zahawm tak Pu Nihar Kanti Chakma ka sawm e.

PU NIHAR KANTI CHAKMA: Pu Speaker, Tlabung hi Sub-Divisional Headquarter a ni a, chuvangin kumtinin mihring an pung chho ve zel a, tui mamawhna pawh a pung chho zel a. He khawl hian a bikin fur lai hian tui a pump thei lo a hei vang hian mipuiin harsatna nasa takin an tawk a ni. Hei hi eng nge awmzia Minister-in min hrilh thei em?

Chubakah Pu Speaker, Tlabung ral lehlam hi Nunsuri, kan veng a ni a, gravitation flow-in tui kan dawng ve thin a. Mahse tunlai hian a harsa em em a, a hnar a kang chak lutuk a. Hemi tan hian solar pumping min pe thei em?

Tin, Serhuan chungchang hi session hmasaah pawh kan sawi nasa tawh a, tunah phei chuan sown fel vek tawh a ni. Family 146 lai an ni a, tun thlengin PHE hmalakna hi engmah a awm lo a ni. Chuvangin Minister zahawm tak hian Serhuan-ah hian a rang thei ang berin PHE tui min pek thei em tih kha ka zawt bawk e. Ka lawm e.

SPEAKER : Zawhbelhna zawt turin Dr. Vanlaltanpuia, chumi zighthah Pu Zothantluanga ka sawm e.

DR. VANLALTANPUIA : Pu Speaker ka lawm e. Ka zawhbelhna chu -

- i) JJM Scheme hnuaiah Department ten solar pumping project DPR an siamte Financial Year 2021-2022 chhungin zagh hman a ni ang em tih a ni a. Pu Speaker, hetah hian ka bial chhung tui harsat zualna khaw hrang hrangah, Demand sawi ni pawh khan ka sawi a, DPR Department-in a peih vek tawh a, tunah sanction kan nghak mek a, hei hi min tihhawhtlin sak thei ang em tih ka zawt a.
- ii) A pahnihnaah, tui harsat zualna khua thenkhatah hian submersible pump hi min pe thei em tih ka zawt bawk e.

SPEAKER : Zawhbelhna zawt turin Member zahawm tak Pu Zothantluanga kan sawm e.

PU ZOTHANTLUANGA : Pu Speaker, ka lawm e. Ka zawhbelhna chu -

- i) Tunlai hian Aizawl khawpuiah tui harsatna kan tawk mek a, hei hi eng vang nge?
- ii) Tuna tui, water tariff kan hman hi eng tika siam nge?
- iii) Tui harsatna chungchangah hian eng angin nge sawrkarin hma a lak tih min hrilh thei em?

SPEAKER : Aw le, a theih ang ang chhang turin Dy. Chief Minister zahawm tak ka sawm e.

PU TAWNLUIA, DEPUTY CHIEF MINISTER: Pu Speaker, Pu Nihar Kanti Chakma zawhbelhna pakhat na kha, fur laiin gravity-in tui pekna a awm tho a, khawthlang Tuipui a nut zual laiin pump theih tur a ni tih a ni a. Eng pawh ni se, ka chhanna hmasa kha ka sawifiah ang a.

Tuna existing pipe a saw a la tha tawk a, a khawl pawh a la tha a. Tin, khawthlang Tuipui kan dawt a saw a tui pawh a la tam tawk a. Amaherawhchu, thuamtha turin 15th Finance Commission-ah proposal thehluh a ni a, nimin piah lawk khan sanction a lo kal a. Tuna existing scheme thuamthat saw tuna i sawi ang taka thuamtha turin pawisa kan nei a,

Session zagh atang chuan hma kan la tan thei dawn a a lawmawm khawp mai. Tin, Silsuri lam pawh kha ka chhanna khan a keng tel thei turah ngai ila.

Ka sawibelh leh duh chu, tuna kan hman lai bakah hian Tlabung khawpuiin tui a mamawh te tih belhna turin Atah Lui an ti a, chu chu solar pumping ti turin tunah hian survey mek a ni. Chu chu Tlabung a kan hmalakna a ni a bialtu zahawm takin a zaghna kha a chhang felin ka hria.

Tin, Dr. Tanpuia, MLA zahawm tak zaghna, JJM hnuai solar pumping scheme kumin financial year chhunga mi te hi zagh hman a ni dawn em tih kha, kan tum khawp mai a. Ka sawi tawh ang khan JJM hi chu sanction a lo kal atang hian kan ti chho zar zar a, CM-in a ngaipawimawh a, state share pawh min pe nghal a. Tunah pawh hian kan bawhzui nghal zar zar a. Chuvang tak chuan a ni a Central pawh in nangni chu 2024-ah ni lo 2023-ah zagh tum rawh u, in zo hman dawn in kan hria an ti a. Solar pumping 2021-22 proposal kan neih te pawh kha zagh hman ngei tumin hma kan la dawn e.

Tin, tui harsa zual khuate tan submersible pump tihna tur proposal hi kan theh lut ngei a. Amaherawhchu, sum lam hi duhthusamin a awm zung zung thei bik lova. Hei hi thinglangah te leh tui harsatna khua tea kan hmalakna pawimawh tak, eng lai pawha a tam thei ang ber tih kan tumna kal lai mek, sum awm dan a zira kan thawh thin tur a ni e, tih kha ka chhanna ni se.

Pu Speaker, West-I bialtu MLA zahawm tak zaghbelhna kha, hei, thal a ni chho mek a, ruahui hanna a rei tawh a. Chuvang chuan, hmun hrang hrangah water source, kan tuihnarah tui a tlem tial tial a. Chuvangin thal chhung chuan fur lai angin tui kan hnianghnar thei lo tih mi pangngai chuan kan hre tlang theuh a. Chuvangin, tuna Aizawl khawpua kan harsatna ber pakhat chu, Luangmual-a P&E-in transformer a bun lai khu Phase-I leh II tui pumpna khawl tih kalna kawlpetha kan chawk luhna a ni a, a chhe tlat mai a, chu chu tun February Ni 23 khan PHE pawhin kawng hrang dapin khami tel loa tui pump a ni a. Tichuan P&E pawhin theih tawp chhuahin transformer thar bunin an thawk mawlh mawlh a, tuna information hnuhnungah chuan, transformer oil hi filter mek a ni a, tluang taka thawh anih chuan tun kar chhungah he transformer hi restore-a hnathawk tura tih puitlin theih kan inbeisei tih nizan tlaia kan dawn a ni. Chuvangin, tunah hian public hnenah pawh kan harsatna hi appeal siamin, lo hrethiam hram hram teh u, kan tih theih piah lamah power lamah harsatna kan nei a ni e, kan ti a. Thuchhuah te kan siam a, chanchin bu leh TV lamah pawh min puan sak tawhin ka hria a, chu chu kan harsatna chawp leh chilha tuna kan hmachhawn lai mek chu a ni.

Tichuan, transformer siam anih avangin nitina kan tui pump theih litre nuai 37 kha kan pump thei ta lova, litre nuai 37 tlinglo kan pump tak avang khan nitin tui kan hmuh kha a tlem lo thei lova, chu chu mipuiah min lo hrethiam hram hram teh u tiha kan ngenna chu a ni. Vawiinah pawh he House zahawm takah hian mipuite hriathiamna ka rawn ngen tel a,

tun kar tawp lamah chuan transformer kha a function chuan a pangngaiin diesel khawl nen kan tui dinhmun kan siamthat chhoh theih kan ring a ni. Heti hian a tlangpuiin nitin tui litre nuai 175 ang vel hi Aizawl-ah tunah kan pump thei a, chu chu kan tlan a, a theih ang kawng kawngin semzai thin a ni. Mahse tunah hian nitin litre nuai 37-a kiam rih hi chu hrethiam hram hram teh ang u kan ti a ni.

Tin, zaghna pakhat water tariff chungchang kha, tuna water tariff, tui bill kan pek mek hi 24th June, 2016-a sawrkarin rate a siam kha la siam thar lohin kan la hmang ngar ngar a, tui rate tihsan a awm lo a ni tih hi mipuiin an hriat kan duh a ni. Chanchinbu thenkhata lo lang, ‘tui rate ti pung sia, tui tih tlem’ tih kha hriat sual palh liau liau a ni ang tih kan ring a. Chutianga sawitute chuan he rate hi hre let leh se a tha khawpin ka ring; a ngai kan la hmang char char a ni tih kha a tawi zawnga ka chhanna ni sela.

Tin, Aizawl khawpuia tui harsatna thuam that tih kha, hei hi kan sawi nual tawh a, ka sawi nawn leh zawk ang a. A point te tein-

1. Phase-III kan tih mai SIPMIU Tanhril hnuia Tlawngtui kan dawh atang hian Laipuitlang-a chhun chhoh tur a ni a, hei hi 37 MLD kan ti a, chu chu nitin tui litre maktaduai 37 pechhuak thei a ni. Tuna Phase-I leh II ai hian a tam dawn a. Tunah hian Phase-I leh II-ah hian nitin a normal taka kan pump hian litre maktaduai 26 vel a ni. Chumi a belchahna (augmentation) a tan 37 MLD chu tunah hian thawh mawlh mawlh a ni a. A pipe phum tur 15 km ah 1 km leh a chanve bak kan la nei a, tunah hian thawh mawlh mawlh a ni. Tunkarah khan harsatna deuhhlek kan nei a, Vaivakawn khu a paltlang dawn a, khawtlang hruaitute'n a him meuh em an ti a, representation te an siam a, kan session karah kha kha settle tumin khawtlang hotute nen kan inrawn tlang zel a. Nizan tlaiah khan khawtlang hotute pawhin sawrkar ruahmanna hi kaltlang rawh se tiin, an ni pawhin hrethiam takin mipuite zah chungin, tlema harsatna awm theia an hlauhthawn tepawh kha an hrethiam ta a, kan lawm khawp a. Tunah hian Pu Speaker, Phase-III hi tun thal chhung hian a pipe phum hi zawha service tir hman pawh kan beisei ve khawp a, tichuan kan tui harsatna hi a sukiang ve thawkhat ang tih pawh kan beisei a ni.
2. Tin, nichina kan sawi tak, power chungchang kha, load shedding a awm khan tui pump kha darkar 4 or 5 vel a chawl a, a buai vek mai zel a, chuvang chuan SIPMIU atang bawkin dedicated power supply, power station Dihmunzawl-ah din a ni a, tunah hian a function thei tep tawh a, inspection an nei tawh a. Vawiinah pawh hian P&E Deptt. E-in-C te, PHE leh SIPMIU lam te pawhin a function theih dan tur an ngaiituah mek a. Hei hi a function chuan, khatianga dedicated atan bik anih avangin hmu dangah pawt peng lova Luangmual atanga direct-in Phase I leh II-a kan tui pump na atan 24 hours in kan hmu thei dawn a, chu chuan nitina tui kan pump theiha hi 24 hours in min puibawm dawn a, tun atanga hun rei vak lo chawlhkar hnii chhung chuan tihfel theih kan beisei a ni.

3. Tin, Tawitlang atanga tui gravitation a lak thlak, Alternative Gravity Water Supply Scheme kan ti a, chu chu Aizawl chhimlam tuna kan neih bak pe turin ruahmann siam mek a ni a, hetia chhut danah hi chuan zaa 30 or 40 hna thawh tawh a ni. Kan hriat angin nikumah heng hnathawkute hi covid avangin an hawn a ngai a, an thawk tam hman lova, chuvangin kan target huna zo theilo deuh pawh ni ila, kan hna suuk lovin tunah hian kan chhunzawm thei zel a. Chutichuan tuna a existing Phase-I leh II bakah Phase-III-in a rawn belchhah ang a, Tawitlang atangan a rawn belchhah bawk ang a, tuna kan Engineer te chhut dan chuan kum 2030 thleng heng hi a function chuan tui harsa lovin kan kal thei ang tiin beiseina nen kan thlir a, chu chu Pu Speaker, kan khawpui Aizawl bik atana tui harsatna sukiang tura kan hmalakna te a ni.

Tui kha rawn haw tam mahsela a semchhuahna siamthat a la ngai tih kha ka sawi tawh a, tunah hian distribution line hi tui tam zawk pechhuak thei turin kan buaipui mek a, kumin working season-ah hian hma kan lak chhoh thei chuan Aizawl-ah hian tui kan neih ang ang pawh hnianghnar zawk leh tun aia tha zawka, a semchhuahna lamah pawh daihzai zawkin kan ti thei ang tih kha ka sawi duh a ni e. Ka lawm e.

SPEAKER : Starred Question No.158, zawt turin Member zahawm tak Pu H. Biakzaua kan sawm e.

PU H. BIAKZAU : Pu Speaker, ka lawm e. Ka zawhna, Minster zahawm tak, Food, Civil Supply & Consumer Affairs Department changtu chhan atan:

Vawmbuk leh Lungpher Supply Godown te hi a chhe tawh hle a, sak that tumna a awm em tih a ni.

SPEAKER : Chhang turin Minister zahawm tak Pu K. Lalrinliana ka sawm e

PU K. LALRINLIANA, MINISTER: Pu Speaker, ka lawm e. Member zahawm tak Pu H. Biakzaua zawhna chhanna chu –

Vawmbuk leh Lungpher Supply Godown te hi a chhe tawh tih Sawrkarin a hria a, chuvangin Warehouse, Court-yard, Staff Quarters, Toilet block leh approach road sak/siam nan proposal siam a ni a, NABARD-ah loan dil mek a ni.

SPEAKER : Phar in tam hle mai a, Pathian faka phar atan in va it awm ve le. Zawhbelhna zawt turin a question neitu, Member zahawm tak Pu H. Biakzaua ka sawm e.

PU H. BIAKZAU : Pu Speaker, ka lawm e. Zawh belhna ka neih hmain, Minister zahawm tak khan an sak theih tur thu leh Quarter te, a kawng te leh Toilet block te

hma lak tum a nih thu kha a rawn chhang a, a lawmawm ka ti khawp mai a, lawmthu ka rawn sawi hmasa duh a. Tin, a hmunah ngei amah pawh a va kal a ni tih ka hria a, lawmthu ka sawi a ni.

Ka zagh belhna chu, Mizoram hmun hrang hrangah kawng laih leh repair hna thawnha a tam khawp mai a, tunah hian, hemi avang hian monsoon stock hmun tam takah tum angin an dah tha theilo deuh em aw ka ti a. Fur hi eng angin nge kan tuar leh dawn hriat a ni lova, chuvangin kawng repair lai leh thawhlai a tam bawk si a, tun aia tam zawk hian monsoon stock hi a dah theih ang em tih pakhatna a ni a.

A dawt lehah chuan, Legal Metrology Office tur building, Lawngtlai-ah sak zawnha a rei tawh khawp mai a, engtikah nge hei hi hawn anih dawn tih ka zawt duh a.

A pathumna ah chuan, Bualpui NG Supply Godown saw a building chu tha ang taka lang siin, a chhuat leh a bang zat ve hnuai lam hi a huh vek zel mai a, buhfai dah dawnin a chhia ang tih a hlauhawm bawk si a. Chuvangin buhfai an dahtha ngam lutuk lova, hei hi repair dan kawng a awm thei ang em tih ka zagh belh a ni e. Ka lawm e.

SPEAKER : Zawhbelhna zawk turin opposition lam hi ka sawm zawk teh ang, in phar teuh mai a. Pu KT Rokhaw, Member zahawm tak i lo sawm ang.

PU K.T. ROKHAW : Pu Speaker, ka lawm e, Pu Speaker, Siaha District e-post Electronic Weight of Scale, online-a buhfai sem hi a buaithlak khawp mai a, signal a tha lova, chuvangin retailer-te chu buhfai sem rihlo tura order pek an ni a. Tunah hian Siaha District-ah Retailer 116 an awm a, 73-te hi signal awm lohna hmuna awm an ni. Chuvangin signal awmlohna hmuna awm retailerte chu buhfai sem lo tura tih an ni ta ringawt mai a. Signal hi tha mai ta lo se mipuite hi ei lovin kan dah mai dawn tihna a ni a, chuvangin kan Minister zahawm tak hian off line-a sem turin min tihsak thei em tih ka zawnha pakhatna a ni a.

Tin, a pahnihnaah chuan, Lawngtlai - Kawlchaw East hlat zawng hi 33 kms lai a ni a, buhfai phurtu contractorte hi an kal tha duh mang tlat lo mai a, hei vang hian buhfai chungchangah harsatna kan tawk tlat mai a. Kawlchaw East atang hian khaw thlang lam Phura te, Lungpuk te, Vahai te, Tongkolong te pek chhuah thin a ni a. Hei hi Pu Speaker, ka hriat ve dan chuan, contractor lian ho Aizawl lam ami te hian an hnuaih sub-contractor an phurh tir thin a ni. Chung sub-contractor-te chuan an phurhna rate a hniam vangin an phur tha duh thin lova chu chu harsatna kan tawh chhan chu a ni.

Chuvang chuan, kan sawrkar hian contractor dik takte hi phurh tir tawh se tih kan ngen a ni. Tin, carrying contractor-te an phurh tir anih pawhin a rate hi tihsan deuh ni sela a lawmawm viau ang. Chuta ka zawnha chu, kan sawrkar hian he contractor-te chungah hian khauh takin hma min laksak thei ang em tih a ni e. Ka lawm e.

SPEAKER : Zawhbelhna zawt turin Member zahawm tak Dr. ZR Thiamsanga i lo sawm ang

DR. ZR. THIAMSANGA : Pu Speaker, ka lawm e. Kan kamis hak a lo inan vang te pawh a ni ang e, ka lawm khawp mai. Ka zawhbelhna chu, hei, an rawn sawi deuh nual tawh a, buhfai doorstep delivery central sawrkar ina ti tur a min rawn tih hi hmalak tum a ni em? Harsatna tam tak kan retailer ten an nei ta a, chubakah, Vawmbuk leh Lungpher supply godown kha sak that tur ni tiin a rawn chhang a, kan Minister zahawm tak khan, a lawmawm khawp mai a. Mizoram hmun dangah godown sak thar tumna a awm em, awm ta se, ka bial Rabung khi a tel ve em tih kha Pu Speaker, ka zawt e. Ka lawm e.

SPEAKER : Awle, a zawsak vek che uin ka hria; theih ang ang chhang turin Pu K. Lalrinliana, hon. Minister i lo sawm ang.

PU K. LALRINLIANA, MINISTER: Pu Speaker, ka lawm e. Zawhna neitu member zahawm tak Pu H. Biakzaua zawh belhna kha, hei hi ka hoin department lamte nen meeting kan nei tawh a. Kan hriat angin Champhai kawng te, Minister zahawm tak Pu Chhantea bial kawng te leh Lunglei - Lawngtlai kawng te pawh laih a ni a. Tin, Hnahthial - South Vanlaipha te pawh Tuipui D-a BRTF leihlawn te pawh a chhiat avangin marboat tea lak kai a ngai a. Tin, nichina Pu K.T. Rokhaw sawi Lawngtlai - Kawlchaw te pawh a chhe reng a, BRTF ho kan nawr reng a, hei hi buaithlakna lai tak a awm a. Tin, widening tuna kan han sawiho kawngah khan, thawh nasat a nih avangin ruah a sur chuan kan buai thei awm mang e tiin ngaihtuahna kan hmang a. Chutiangin district tinah ruah a sur a widening tihna laiah hian buaina kan nei thei ang em, report rawn pe rawh u kan ti a. District tinah kan DCSO ten report an rawn pe a, chuta tang chuan tunah hian monsoon stock hi nikumah khan hmun 57-ah kan stock a, tun kum hi chu kawngte pawh a lo ziaawm ta deuh a tiin hmun 53-ah stock ila kan ti a, a location pawh kan ti fel vek a. Amaherawh chu widening kan tih avangin inven ruk a ngai niin kan hria a, chulai a chu kan en mek e.

Tin Lawngtlai - Kawlchaw buhfai carrying contractor-te hi khauh zawka hmala tura hrilh theih a ni ang em tih Pu KT Rohaw zawhna kha, hei hi tun kum pawh khan kan buai a, helaiah hian. A rate sang zawk pawh kan *up* a, an chhanna rate ai sangte pawhin kan han ti a, kan han offer a, BRTF ho an muang si a, kan han inbia a mualpho lovin kan awm hram hram ve a ni. Amaherawhchu, tunah hian khauh zawkin contractor-tena an chhan ngamma anga ti tura kan innawr ang bawkin, khauhzawkin kan lo innawr leh ang e. Tin, e-post machine hmanga online a sem hi a buaithlak a, kan retailer 116 te zingah 73-te hi signal neilo an ni a, chuvangin e-post machine hman hi a buaithlak an ti a, signal a awm loh na na na chuan offline-a sem loh chuan tihngaihna a awm lova, hei hi chu order neih sa kan nei a, kan lo enzui ang e.

PU K.T. ROKHAW : Pu Speaker, he thil hi a serious khawp mai a, order kha online-a lak vek tur tih a ni a, signal neihlohma hmunah buhfai sem rih loh tur an ti leh bawk si a. Chuvangin ka bial chhung signal awmlohnna retailer 73-te kha chu offline-a buhfai sem turin hma min laksak se tih ka rawn ngen a ni.

PU LALRINTLUANGA SAILO: Pu Speaker, a din laiin, kei pawh kha thil kha ka zawk tum a ni a, ka bial Phuldungsei chin piahlamah sawn, tukinah pawh min rawn phone nasa mai a, signal a awm ve loh avangin offline-a sem kha tih loh theih loh a ka ngaih avangin ‘House-ah pawh kan han sawi ang a’ tiin kan mite pawh ka han hnem ngawt a. Online-a sem ngei ngei tur tih order a awm avang khan hlau takin, thaw dep depin an awm a ni tih ka sawi duh a, kan Minister zahawm tak hian immediate action min lak sak thei se ka duh khawp mai.

PU K. LALRINLIANA, MINISTER: A pawimawh khawp mai. Ni e, hei hi National Food Security Act-ah e-post machine hman tur han tih bur hi tlinlohma hmun tam tak kan nei a. Sawi ang khan vawiinah sawichhuah a ni hi a lawmawm ka ti a, kan ngaihtuah mek lai a ni a, signal awm lohna na na na chuan offline-a ti turin hma kan lo la ang tih kha ka chhanna ni se.

Member zahawm tak Dr. Thiamsanga zawkna, Doorstep Delivery kalpui tum a ni em, tih kha, doorstep delivery chungchang hi department hian kan ngaihtuah a, kan buaipui khawp mai a. National Food Security Act hnuiah ‘tih ngei ngei tur’ tih a ni a. Hei hi retailer ten go-down atanga buhfai an semna inkar hi an mahnia phur tawh lovin, an inkarah hian agency neia, chumite chuan thlen tawh se, an buhfai dahna bula an thlen khan retailer ten buhfai buk a tling em, buhfai a chhia em, a tha em tih zawng zawng an lo endik ang a. Chutiang chuan kalkawngah bo thlau awm lovin, mipuiin an chanvo dik takin buhfai sem an chang thei ang tih ngaihdan atanga lo chhuak a ni. Mahse hetah hian tlin lohna tur tam tak kan neiin kan hria a, chung harsatna awm thei hrang hrangte department lam Secretary leh Director-te nen thlirhona pawh kan nei tawh a. Amaherawchu, tun dinhmunah hian i sem ang u hmiang han tih dawt theih chhanna tur kan nei lova, ngaihtuahna kan hmang lo thei lova. Achhan chu central lamin lehkha min rawn pe reng a, tun kumah pawh kan dawng a, nikumah pawh kan dawng a, in ti tawh em, nangni hian in la ti lo, tiin video conferencing neihah pawh zawkna kan department lam pawhin an dawng chamchi a. Helai hi keini pawhin kan manganpui a, committee-a kan relah pawh, ‘kan la ti lo e’ tih ngawt ai chuan, Aizawl East DCSO bial chhungah hian tichhin dawn ila a tha awm e, ‘kan la ti lo tawp e’, tih ai chuan kan ti a. Amaherawchu, retailer-te hian harsatna tur an rawn thlen ve nak nak a, ‘A ruala thla 2 or 3 bill kan lo lak hi kan innghahfak ve na a ni a’ an ti a. Chuvangin hei hi chu a tih loh theih hram em tih te an rawn sawi a.

Tin, hemi chungchangah hian final kan nei lova, DCSO East Aizawl area-ah hian tichhin ta ila, a dinhmun tur te hre ta ila tiin, MIZOFED pawh hi agent-ah hmang ta ila a tha ang em, MIZOFED hi lo zirchiang teh u kan han inti a. Committee-a la ngaihtuah tur a ni a.

A tha ber tur leh mipuiina dik taka an dawn theihna tur atan ngaihtuahna hman a ngai a, thutlukna kan la nei chiah lova kan kalpui mek a ni. Zawhna a rawn awm hi a lawmawm hle mai.

Tin, go-down Rabung-ah leh hmun hrang hrangah sak tumna a awm em tih zawhna kha, Pu Speaker, i phalnain heihi ka han en lawk ang a. Rabung go-down hi, nichina zawhna awm tawh ang khan, go-down sakna tur NABARD atanga loan dil mek a ni a, Rabung pawh hi sakthat tum a ni a, ruahmanna siam a ni. Tin, Mizoram hmun hrang hrangah go-down kan nei chhe em em a, kan sawrkar hlima kan Chief Minister-in central-ah a zuk thlen a, godown 10 sakna min rawn pe a, chutah NABARD loan-in 21 sakna kan hmu leh a. 10 kan sa zo tawh a, Lawngtlai-ah kan sa tlai deuh hlek a, tunah chuan kan sa zo tawh a, a bak 21 hi tunah hian kan sa tan mek a. Tunah hian proposal kal lai mekah chuan warehouse 22, staff-quarter 24, toilet 19, approach road leh officer quarter, administrative building leh district weigh bridge centre-te, chutiang chuan tih ngei ngei ngaia kan hriatte proposal kan siam mek a ni. Chu chu tun a hma kan lak dan a ni.

Khatiang tumna ang chi kha sawi tur a tam a, khati khan rem min tihsak mai se a lawmawm hle ang.

PU H. BIAKZAU : Pu Speaker, Minister zahawm tak khan ka zawhna supplementary chhanloh a nei a, a lo chhinchhiah loh palh takin ka han sawi nawn leh lawk ang chu?

SPEAKER : Aw, a lo chhang dawn e.

PU TAWNLUIA, DEPUTY CHIEF MINISTER : Pu Speaker, Lawngtlai Legal Metrology kha building kan nei a, office building a ni chiah lova, liberty standard building a ni a, amaherawhchu staff kan dah a, khilai district khawpuia neih loh hi a dik lova; Siaha-ah pawh kan nei a, tunhma chuan khita tang khian an rawn hmui thin a. Staff kan indaihloh tak em avangin hmui hlei theih lovin a awm a, staff lak belh kan dil a, Aizawl lama kan indaih lo chung pawhin engemaw ti tia Lawngtlai tana dah hram dan a awm em tih ngaihtuahna kan nei a. Chumi atan chuan Lawngtlai go-down hawn a lo ngai ang a, a hrangepa tih tam em em lai a ni lo bawk a tih hram dan kan ngaihtuah ang tih ka sawi duh a.

Bualpui ‘Ng’ go-down hi a building a la chhe lova mahse repair ngei ngei a ngai a, sum kan neih remchang hmasa berah repair kan tum ang a. Tin, kan hriat angin Hnahthial, Mamit, Khawzawl leh Saitual-ah pawh kan mamawh em em a, Legal Metrology bik hi. Mipui ten an chanvo dik tak an chan theihna tur atana ruahmanna awm a ni. Union Minister, Pu Ram Vilas Paswan kan zuk hmuh tum pawhin a ngaih pawimawh em em thu a sawi a, a boral ta a. Hei hi kei pawhin thil pawimawh tak niin ka hria a. Tunah hian Saitual leh Khawzawl phei chu *lapidary standard*-a sakna tur pawisa pawh central atangin min pe a, a sakna hmun turte kan buatsaih mek a, DC leh department-te indawra kalpui mek a ni. Hmun

dang, Mamit la function thei lo te pawh hi function a ngai khawp mai tih kha ka chhanna ni se. Ka lawm e.

SPEAKER : Starred Question No. 159, zawt turin Member zahawm tak Pu C. Ngunlianchunga ka sawm e.

PU C. NGUNLIANCHUNGA: Pu Speaker, ka lawm e. Ka zaghna Starred Question No. 159, hon. Minister Higher & Technical Education Department chhan atan-

- Tunhnaiah H & TE hnuai College-ah zirlai naupang an pun avangin casual-a zirtirtu lak belh an awm em?
- An awm anih chuan, eng College-ah te nge dah an nih a, a details min hrilh thei ang em?
- Zirtirtu thar dahna College-ah te hian kum 2019-2020 leh 2020-2021-a zirlai an neih zat min hrilh thei ang em?

SPEAKER : Chhang turin a changtu Minister zahawmtak Dr. R. Lalthangliana i lo sawm ang.

DR. R. LALTHANGLIANA, MINISTER: Pu Speaker, Member zahawm tak Pu C. Ngunlianchunga zaghna chhanna chu:

- Assistant Professor 100, thla khata 25,000/- hlawhin honorarium peka lak a ni.
- A chhanna hi a thui khawp mai a, chhiar chhuah vek sen a ni lova, a tawi zawngin han tarlang ila:

S/Nos.	Institution Hming	Post lak zat
i	Govt. College, Aizawl	3
ii	Govt. Aizawl North College	1
iii	Govt. Aizawl West College	2
iv	Govt. Champhai College	5
v	Govt. Hnahthial College	3
vi	Govt. Hrangbana College	4
vii	Govt. J. Buana College	4
viii	Govt. J. Thankima College	1
ix	Govt. Johnson College	3
x	Govt. Kamalanagar College	5
xi	Govt. Khawzawl College	4
xii	Govt. Kolasib College	5
xiii	Govt. Lawngtlai College	3
xiv	Govt. Mamit College	3
xv	Govt. Siaha College	3
xvi	Govt. Saitual College	4
vii	Govt. Serchhip College	5

viii	Govt. T. Romana College	3
xix	Govt. Zawlnuam College	3
xx	Govt. Zirtiri Res. Sc. College	3
xxi	Lunglei Govt. College	5
xxii	Institute of Advanced Study in Education (IASE)	2
xxiii	Mizoram Hindi Training College	2
xiv	Mizoram Polytechnic, Lunglei	6
xxv	Women Polytechnic	1

Chu chu ka chhanna ni ta mai sela, detail-a a hming nena tih vek kha chu a rei dawn em mai.

- c) Zawhna chhanna hi a detail si a a hlawmin sawi leh ta mai ila, a punna hrim hrim tuna College ka han chhiar chhuahte hi 25 a ni a, a punna hi zirlai 1,663 a ni a, zirlai punna hi College 19-ah a ni a, College 6-ah chuan an pung lo a ni. Hei hi a chhan tawi te a kan sawi belh lawk duh a chu, khatia Covid-in min han nuai khan vanneihthlak takin Aizawl-ah leh hmun hrang hrangah Non-Govt. College hi kan lo nei nual mai a, an tangkai khawp mai a. Pachhunga University hi special mention ka han pek duh chu an Principal leh Teaching Faculty te an tang a, nasa takin heta ka sawi tello hi an pung a, hei hian min chhawk khawp mai. Tin, chumi piah lamah chuan Mizoram University College hi an ti tha hle mai a, Vice Chancellor ka bia a, lehkha pawh ka thawn a, an rawn chhang nghal a. Tichuan 10-30%-in department tinah post graduate zirlai an pung a, a tam fu a, kan perview anih chiah loh avangin accurate deuhin a zat chiah ka sawi thei lo a ni.

Pu Speaker, kha kha ka chhan theih tawk chu ni phawt mai rawh se.

SPEAKER : Zawhbelhna zawt turin Pu C. Ngunlianchunga, a dawtah Dr. Vanlalthlana ka sawm e.

PU C. NGUNLIANCHUNGA: Pu Speaker, ka lawm e. Kumin 2019-2020 chhung hian College 16-ah zirlai naupang 1,663-in an pung a, College 6-ah an pung lova, Associate Professor lak belh an ni ta tho a. Heti khawpa sum leh pai kan indaihloh chungin zirlai naupang pung siloa dah belh te leh, kum 2020-ah phei chuan tumah class kal an awm lova, kumin March atang chauhin an kal dawn emaw a ni a. 2020 chhung khan khang Associate Professor te kha hlawh kan pe tho em, tih ka zawhbelh a, a pakhatnaah.

Tin, Lunglei Polytechnic-ah Zirtirtu 6 pek belh a ni a, hei hi a bikin zirlai awm tur zat awm sa a ni a, pung thei pawh an ni chuang lova. Khatiang khan College 6 lai pung lo kha engvanga pek belh ve mai nge an nih, sum leh pai kan in daihloh teh lul nen tih kha ka zawhbelhna a ni e.

SPEAKER : Zawhbelhna zawt turin member zahawmtak Dr.

Vanlalthlana i lo sawm ang.

DR. VANLALTHLANA : Pu Speaker, ka lawm e. Higher & Technical Department changtu Minister zahawmtak chhan a tana ka zawhna chu -

Govt. Aizawl College ram Mualpui ami khu a buai niin kan hria a, harsatna neuh neuh an tawk a. Hemi chingfel tur hian eng chen nge sawrkar a kal tawh tih ka zawt e.

SPEAKER : Awle, a theih ang ang chhang turin Minister zahawmtak Dr. R. Lalthangliana ka sawm e.

DR. R. LALTHANGLIANA, MINISTER: Pu Speaker, a zawhna neituin a College 6-ah puan a ni silo a tih kha, thil hi a chhut lawk theih bik vek loh a ni kan tih dawn khan. Chu bakah Institution kalphungah hian hemi ruala kan en tel thil pawimawh deuh chu Department thenkhat indaihlo em em an awm a. Hei, felfai deuhin University ordinance a awm a, zirlai naupang an tlem emaw, an tam emaw, zirtirtu tur zat bithliah felfai deuhin a awm a. Entirnan, English leh MIL kan tih ang chi, a bukna awmah phei chuan panga tal department khatah an awm tur a ni tih a ni a, anih loh pawhin pali tal tih te a ni a, khang zawng zawng han chawh khan a ngai ta hrim hrim a ni.

Tin, class kal a awm chuang lo a tih laia kha, a buaithlak hlei hlei a, online vekin engmah zirna a bahlah chuang lova, kal a ngaih avang khan engage hrim hrim a ngai a. Tichuanin, heng kan lak te hi *terms and conditions* felfai taka lak vek an ni a, tun academic chhung bik atan hian felfai deuhin Ni 89 tih nge ni, khatiang khan ruahmanna kan siam a, sum ren takin. Online class hi ti lo phei ila chuan kan tuar viau in ka ring a. Hon. Chief Minister hovin meeting kan nei a, min hriathiampuina atangin hetiang hian kan ti thei tawk tawk a ni tih kha ka chhanna ni ta mai sela.

Institution kalphungah hian, an pun leh pun loh lam aimahin a requirement hrim hrim kha a awm a. Mizoram Polytechnic, Lunglei bika kha subject tam tak a awm a ni. A zirlai naupang chu an tam em em lo, mahse midangina zirtir theih loh kha a awm ve a, ti lai kha Member zahawmtak ten min lo hriatsak thei sela a lawmawm khawp ang.

PU C. NGUNLIANCHUNGA: Pu Speaker, min chhan lai khan khawngaihin, a acquirement zawng kha chuan a dik mai a, amaherawhchu, kan State dinhmunte kan hria a, department tinah post ruak a tam zia kan hria a, Covid -19 avanga heti khawp a sum kan neih loh avanga kan inthawhkhawm laia full-fledged-a kalpui kha kan mamawh ber a ni em? Inrenchem a tul zawk lawm ni heti khawp a sum harsat lai hian? Norms angin kal thei ila Elementary-ah te, High School-ah te leh Higher Secondary-ah te pawh duhthusam a ni. Mahse, duhthusam hi tun hunah hian kan zo mai ang em kan sawrkar hian ka ti a ni e.

DR. R. LALTHANGLIANA, MINISTER: A dik chiah; tunah pawh hian Pu Speaker, duhthusam hi ala ni lova, post 92 hi clear vacancy la fill up theih loh kan la nei

cheu a ni. Chuti chung chung chuan Chief Minister zahawm takin zirna sang zawk ngaipawimawhin min ruahmanpui a ni tih kha ka sawi nawn leh a.

Tin, kan member zahawm tak Dr. Vanlalthlana zawnha kha tlemin a inperhsan deuh a, amaherawhchu, heti zawng hian ka han chhang mai ang a. Govt. Aizawl College, Sikulpuikawn ami saw a building a sang a, a rit bawk a, a him lo e min tihsak a, chuvang chuan sawrkar hmasa hunlai khan Mualpui-ah pawisa eng emaw zat ruahmanin a building sak a ni a, a ram chungchangah a tira kan han sak lai khan harsatna kan nei lutuk lova, amaherawhchu, tunah hian private party te'n harsatna min siam sak a, a tawi zawngin, court-ah tunah hian thil ala inchiah mek a. Engpawhnise, kan Chief Minister zahawm tak nen a hmunah kan zu en nghe nghe a, thil awmdan a buaithlak khawp mai a, a approach road tura kan ngaih a kha an lo claim a, hei hi uluk takin Law Department pawh kan sawipui bawk a, kan inrawn reng a, court case ala kal reng a, eng emaw ti kawng kawnga in negotiate dan te a awm em tih thlengin thenkhat chuan an rawn sawi bawk a, chu chu kan dinhmun a ni. In sawn thlak thuai chu a tuah tawh khawp mai.

Tin, ka han sawi belh duh lawk chu, College Aizawl khawpui laili lutuka a awm hi kan Chief Minister zahawm tak hian a ngai pawimawh em em a, sown chhuah policy hi kan nei a ni. Niminah pawh ka sawi zawk tawh a, Hrangbana College pawh hmun laili (prime area) lutukah an awm a, a fel lo hle a; Zirtiri Residential pawh Durtlang-ah, kha kha kan kalphung a ni a, hei hi kan mutan a ni. Tin, Hrangbana College tih lohah chuan Aizawl College hi zirlai bukna deuh ber a ni a, chumi a nih avang chuan a buaithlak khawp mai a, kan boruak tawn hi a hahtlhak ang reng khawp mai. Amaherawhchu, eng emaw ti tiin sawrkar chuan kan bawhzui mek e tih hi ka chhanna ni teh se.

SPEAKER : Minute chanve ala awm a, Starred Question No. 160, zawt turin Member zahawm tak Pu Lalrindika Ralte hmanhmawh deuhin ka sawm e.

PU LALRINDIKA RALTE : Pu Speaker, ka lawm e. Revenue changtu Minister zahawm tak chhan atan ka zawnha chu -

- Silchar - Sairang Highway laih thar turah Revenue Department-in 27th May, 2020 a notification a tih chhuahah VC pass atangin Periodic Patta let thei nia insawi ten VC pass neitute hnenah, 'Periodic Patta-ah in ram kan leh sak ang che u ang a, leiman lak a nih hnuah 75% kan chang ang a, ram neituin 25% a chang ang' an tih hi Revenue Minister in a hriatpui em?
- Department-in notification a siam kahzawnga chetlakna a awm em, tih ka zawt e. Ka lawm e.

SPEAKER : Aw le, Zawnha leh Chhanna hun a tawp hnuah House-in chhan a rem ti a, a zawk belh theih tawh dawn loh a ni. Chhang turin a changtu Minister zahawm tak Pu Lalruatkima ka sawm e.

PU LALRUATKIMA, MINISTER: Pu Speaker, ka lawm e. Kan Member zahawm tak Pu Lalrindika Ralte zawhna chhanna chu -

- a) Hriatpui lo tih a ni.
- b) Chetlakna a awm hriat a ni lo.

SPEAKER : Aw le, Zawhna leh Chhanna hun a tawp a, vawiinah hian Member zahawm tak Pu Andrew H. Thangliana chhungkaw rokhawlhna avangin a absent a ni tih House ka han hrilh a ni.

Tunah chuan Financial Business-ah kan kal ang a, Minister zahawm tak takte pahnih Pu Robert Romawia Royte leh Pu Lalchamliana te demand kan sawiho ang a. Tin, Minister-te pahnih demand hi vawiinah pass kan tum leh nghal dawn a ni.

Tunah Minister zahawm tak Pu Robert Romawia Royte ka sawm ang a, a demand te -

- 1) Demand No. 20 - Sports & Youth Services
- 2) Demand No. 43 - Tourism
- 3) Demand No. 48 - Information & Communication Tehcnology te hi House-ah rawn submit turin ka sawm e.

PU ROBERT ROMAWIA ROYTE, MINISTER: Pu Speaker, Governor of Mizoram recommend-na leh i phalnain, heng ka Demand-te he House zahawm takah hian min pawmpui turin ka rawn ngen e -

Demand No.	Purpose	Amount (in ₹)
22	Sports & Youth Services	25,61,31,000.00
43	Tourism	10,89,78,000.00
48	Information & Communication Technology	4,59,27,000.00
TOTAL		41,10,36,000.00

Ka lawm e.

SPEAKER : Tunah chuan Minister zahawm tak Pu Lalchamliana ka sawm ang a, heng a demand te -

- 1) Demand No. 8 - Taxation
- 2) Demand No. 16 - Home
- 3) Demand No. 30 - Disaster Management & Rehabilitation te hi House-ah submit turin ka sawm e.

PU LALCHAMLIANA, MINISTER: Mr. Speaker, on the recommendation of the Governor of Mizoram and with your permission, Sir, I moved the Demand Nos. 8, 16 & 30

for ₹8,44,43,66,000/- for meeting expenses during 2021-2022 in respect of the following Departments –

Demand No.	Purpose	Amount (in ₹)
8	Taxation	22,82,87,000.00
16	Home	7,60,46,73,000.00
30	Disaster Management & Rehabilitation	61,14,06,000.00
TOTAL		8,44,43,66,000.00

Thank you.

SPEAKER : Aw le, kan Minister zahawm tak tak pahnih ten an demand House-ah an rawn submit ta a, kan sawi ho leh tawh ang a. Minute engzah nge kan inpek leh ang le, minute 10-in kal leh ang aw? Awle, sawihona kan tan ang a, Member zahawm tak Pu L. Thangmawia ka sawm e.

PU L. THANGMAWIA : Pu Speaker, mi dang ka han nghak deuh hlek a, i hawi kual deuh nual si a, chuvangin, ka han ti hmasa leh ber a ni e. Ka lawm e.

Hei, vawiinah hian demand pass chakawm tak tak kan han sawiho leh dawn a ni a, a hmasa berah chuan Demand No. 22, Sports & Youth Services hi ka han sawi hmasa ang a.

Hei MNF sorkar hnu hian Sports-ah nasa takin hmasawnna a awm a, hmanniah Private member resolution-ah kan sawiho vak tawh a, vawiinah chuan a detail in ka sawi tawh lo ang a. Pu Speaker, phul lem phah rawn tichhuaktu Sports Minister kalchhuak ta pawh vawiinah Group Leader-in a awm a. Amaherawhchu ka han zir chiang a, Pu Speaker, Sports minister anih laia a hming thatna tam tak kha tuna kan Sports Minister thawh chhuah hi a lo ni tlat mai a, chuvang chuan heti lai House kaltlanga lawmthu a sawi hreh deuh a nih pawhin mimal ang chuan a sawi tawh ka ring a; mi polite tak a ni a, kan Group Leader hi; football-a kan hmasawnna te leh thildang dang a minister laia ti thei Sports Minister-a kan nei kha ka lawmpui viau a ni.

Kan hmasawnna zual han highlight loh theih loh chu tunhnaia sum kan dawn tam hi chu thuhran daih ni ta se la, Mizoram Sports Policy, 2019 kan han hmu nghal thawt mai a, kum khat ral mumal hmain, Sports lam thiam te tan 5% reservation sawrkarin a han tihsak bawk a, kum tam tak kan lo tih tawh loh State Games kha 2019-ah hlawhtling takin kan han nei thei bawk a, sports hi industry-a puan hial a lo ni ta te hi thil chhinchhiah tlak tak a ni a, a lawmawm khawp mai a. Hetih rual erawh chuan mamawh tam tak ram ang pawhin a awm ang a, Mizoram hmun hrang hrangah phul lem phahna tur project tam tak a awm a. Ka bial

bikah hian Pu Speaker, Ngopa-ah leh a remchang laiah phul lem phah kha a remchan ve leh, kan Session hmasa khan, ‘ka tiama che’ chiah chu a ti lova, ‘theih tawp kan chhuah dawn nia’ a ti a, tun tumah hi chuan min tiam thei tawh ang emaw! Indoor Stadium te kan la mamawh a, hall kan neih chhun hi indoor atan an ti zel a, hall te a khawk phah a, chuvangin hall hi a hranin awm se la, indoor stadium pawh a hrana awm thei turin, kan sports policy nen pawh a inmil bawk a.

Field chei that turte kan nei a, Ngopa bikah hian ka sawi fo thin angin Tennis hi kan lo fin chilh kan ti dawn nge, kan lo at chilh ve thin a, hei pawh hi kan phu vein ka hria, Pu Speaker. Tennis-ah na na na chuan tun term chhung hian Mizoram-a a ber chu kan ni lo ang a, mahse ti nasa ber chu kan nih ka ring a, Mizoram level-ah pawh kan lang nual a. Mizoram Open Tennis Competition pawh Ngopa-a huaihawt ngam kan ni a, a court te leh thildangte pawh project siam leh dawnah pawh ngaihtuahna min lo hman sak se tih kha ka han sawi duh bawk a.

Demand No. 43, Tourism-ah hian ka bialah hian prospect tha tak tak a awm a, Mawmrang tlang kan han tihte MLA fund-in a kawng tur VC-te thahnemngainhain kan han lai tlang a, tun Covid lai pawh khan kan inkhap hleithei lo a ni. Kan unau Burma mite awmna ram ‘Buannel’ kan han tih ang hmun nuam deuh deuh te a awm a, ka bial chhung mai nilovin ka bial pawn atang pawhin tunah hian an tlawh teuh tawh a ni. Motor kawng lian vak lo kal theih tawng tawngin MLA fund-in kan lai a, hengte pawh hi project siamna tham a ni a. Tin, Lengteng tlang pawh kein mi tam tak an han kal a, expedition te leh thil dang dang angin; a kawng hi engemaw chen chu nikumah kan lai tawh a, hengte pawh hi Tourism lampang promote nan a hman theihin ka hria a ni.

Pu Speaker, Ngopa bul Tualbung-ah hian history hmun tha deuh mai kan nei a, Ni 25.4.1968 khan Major Deswal leh a hote kha hnam sipaite nen intawh chilhin an inkap a, Major Deswal tiamin India sipai 20 boralin, 7 an hliam a, 3 an him a. Mizo hnam sipai atangin Pu Chalkhuma leh Pu Ramliana te an boral bawk a, Pu Ramliana phei chu Ngopa-a phum a ni a, a thlan siam anih lawk loh avangin Ngopa Branch YMA ten an siam nghe nghe a, tha takin an siam a, hei hi Pu Speaker, a thlalak a ni a, chuvangin Ngopa YMA Branch chungah pawh lawmthu ka sawi a. Helai hi Lengteng kawng nen pawh inhnhaih tak a ni a, thangthar zelah hnam rilru a lo awm chho zel ang a, education-in a ken tel a ni a. Kan ram hruaitu pakhatin a ina ka lena a sawi thin chu, ‘keini chu nationalism hi a zira zir chhuak kan ni a, college kan kalna atanga rawn zir chhuak kan ni’ a tih ka la hre reng a. Chuvangin, thangthar rilruah he *nationalism* rawn intuh chho zelah a tha lo zawng nilovin, a tha zawnga kan hnam tana inpe te hriatrengna leh mi tlawh chak ni tur hian a siam theihin ka hria a, chungte pawh chu kan Minister zahawm takin min lo chhinchhiah sak ta sela a lawmawm khawp ang.

Demand No. 48, Information & Communication Technology-ah hian Pu Speaker, lawmthua bul tan a ngai tlat mai a; computer set tha tak tak mai Kawlkulh High School,

Hliappui High School leh N.E. Khawdungsei High School ten hun reiloteah an dawng dawn niin chiang takin ka hre thawi a, chuvang chuan lawmthu ka sawi lawk bawk ni se.

Nikum lamah Covid te a rawn leng a, ICT tangkai zia kan hmu chho a. Mobile tower kan neih hma ni se a buaithlak dan tur hi rilruin a suangtuah a. Chutih rual erawh chuan Pu Speaker, ‘digi-locker’ tih central-in policy-a a rawn neihah Mizoram-a kan department te pawhin chak takin a bawhzui a, e-governance leh thildang dangah chak zawkin hma a la a, ICT awm lo phei se chu Covid lai hian zirtirna a kal thei lo ringawt mai a ni. Kan Education Minister zahawm tak khan a Demand sawi ni khan Covid laia Youtube leh ICT kaltlanga zirna an pek chhuah nasat zia kha a sawi a, nakinah phei chuan duh hun huna haichhuah theih tur online tutorial thleng zofate hian kan siam thei a, khatiang zawng khan ICT-ah hian promote tur tam tak mipui tana tangkai si awmin ka hria a.

Chutih rual chuan Pu Speaker, mobile signal hi nei tha lo khua Mizoram-ah tam tak an la awm a, sawrkar hmasain thil harsat deuha, ‘hei hi company mawhphurhna a ni’ tia kut an sil ang kha kan sawrkarah hi chuan a ni ve lova. Chuvang chuan mawhpuh tur Airtel emaw, Jio emaw awm mahsela helai allocation of business-ah hian a tel ve tlat mai a, kan Minister zahawm tak hian hma pawh a lain ka hria a, lawmthu ka sawi a. Tun kum hnih chhunga mobile signal nei lo zawng zawngin mobile signal an lo neih theih nan, sorkar tan pawh thiltangkai, tak thilhmanhmawh thlak han sawi dawna khaw thenawma bike a va tirh vang vang ngai hi an la awm a, hei hi a buaithlak tlat a ni. Chuvangin, hengah pawh hian company te leh tower pechhuaktute pawh a aia nasa zawka lo coordinate-a, tun kum hnih chhung hian Mizoram khua zawng zawng inbiak pawh theih tura tih a nih theih nan kan Minister pawhin chak taka hma a lak mek pawh ka hre tho a, hei hi chak lehzuala hma la turin ka han ngen bawk a ni.

Demand No. 8, Taxation-ah hian ka han kal leh nghal ang a, Taxation website-ah hian Pu Speaker, ka han lut a, tax an lo khawn hnem hman leh tawh hle mai a, February, 2021-ah pawh hian, chhiar dawn chuan hun ka ren si a, ka chhiar lo mai ang a, website-ah a hmuh theih vek a, an thawk hah viauin ka ring a. Taxation hi a pe chhuaktu anni lova, a khawntu an nih avangin mipui nen kan innek dan hi a dang deuh a, mahse anmahni zara sawrkar kal a ni tih kha ka sawi duh a. General discussion-ah pawh kan sawi nasa a, non-tax revenue thlengin kan sawi a, heng zawng zawng lo tihsawhlingtu Taxation hnenah pawh lawmthu ka sawi duh a. Kan Minister zahawm takin react ngai a tih chuan a rawn react ang a. Professional tax hi Constitution hawlha ni a, amaherawhchu he tax lak anih apiang hian Peon leh Chief Secretary te inzat vekin an ti leh thin a, hei hi sawrkar hnathawkah pawh hian hriatfiah chianloh a awm emaw ni aw ka ti a. Amaherawhchu, Article 276 khan ₹2,500/- aia tam lak a lo phal lo ni khan ka hria a, hengte pawh hi kan hriat fiah, sawifiah hret theih dan te a awm chuan sawrkar hnathawk zawng zawng, Peon thlenga kan inhrilhfiah a thain ka hria.

A dawt lehah chuan Pu Speaker, Demand No. 16, Home-ah hian lawmthu sawi a ngai bawk a. Covid-19 a rawn lena ramri buai te a rawn buai chiah hian Home department pawimawhzia, kan sipaite pawimawh zia a rawn lang thin a ni. Ram ralmuangah hian sipaite'n ngaihsan an hlawh lo fo thin a, am Maherawhchu thih leh dam karah rambuai a rawn nih hian sipai ho pawimawhna a rawn lang a ni. Covid boruak-ah pawh ka bial hi ramri depah kan awm a. Tuisenlui-ah te Tuivai-ah te an duty a, kan va tlawh a, an hotute atang pawhin duty-naa an mamawh zawng zawng pawh vawikhata tiyah a tam lutuk a, Mizoram hian ramri kan ngah lutuk a; chutiang chung chuan phunnawi hauh lovin an han duty a, chutah ramri issue kan han nei leh a, a tul phawt chuan ram chhan ngamin huaisen takin kan sipaite an kal leh a, hengte pawh hi a lawmawm ngawih ngawihin ka hria a, lawmthu ka sawi duh a.

Chutih rual chuan ka bial chhungah pawh Pu Speaker, ka sawi lo thei lova, kan Home Minister leh kan hotu dangte pawhin min lo hrethiam sela. Kawkulh-ah hian police station a awm a tul em em mai a, hei hi ka bial anih avanga sawi ka ni lova. Kawkulh-ah hian In 839 awmin mihring 3,214 vel tunah hian an khawsa mek a, Khawzawl District chhungah hian (Khawzawl tihlohah chuan) Kawkulh hi case register tamna ber pawl a ni a tunah hian, data te ka han lakhawm a. Tin, Police hmun awm lohna anih avangin criminal case tam tak register loh niin, khawtlang hruaitu VDP leh JAC-ten a an chinfel pawh kha tam tak a awm a ni. Covid avanga sawrkar harsatna kan hrethiam a Pu Speaker, remchangah chuan kan hotute'n hei hi min hriatsak se tih kha ka han sawinawn duh a ni.

A tawp berah chuan, Pu Speaker, sawiloh atan chuan ka ui a, sawiloh theihloh pakhat a awm a, DM&R Demand No. 30-ah hian, ka bial chhungah Ni 23.4.2020 khan Hliappui ah chhiat kan tawk a, nimin khan tlem chu ka sawi tawh a; In 268 lai mai rialin an deng chhia a, chung zinga In 189 chu a chung pumpui a chhia a, In 79 kha a pumpui lo deuh, bedroom chin chhia te, choka chin chhia te a ni a. Chutih lai chuan Pawlrang-ah In 4 leh Changzawl-ah In 3 a awm bawk a. Hliappui hi a nasat em avangin Pawlrang leh Changzawl phei chu kan ngaihsak hman lo a ni. An VC ten theih ang angin an lo ti a, Pawlrang leh Changzawl VC-te chungah lawmthu pawh ka sawi duh a ni. Chutih rual chuan, Mizoram Synod pawhin nuai 10 lai a rawn ti a, kan RD Minister in rangva bundle 100 min rawn pe chho bawk a. Heti laiah hian ka sawi duh bawk chu Pu Speaker, DM&R atang hian nuai 29,21,197 min pe a, Minister leh kan Chief Minister chungah lawmthu ka sawi mawlh mawlh a ni.

A tawpna tak tak atana ka sawi duh chu Pu Speaker, Mizo zia, 'Zonunmawi' a lang a, hetah hian. Chhiat tawhnaah keipawh a zana zanin ka tlanchho nghal a, Zana rawn kal te, Saitual DC pawh mu thei lovin Ngopa BDO a rawn tir chho a, SDO Civil te leh khaw thenawmte an rawn tlan khawm ruih ruih mai a ni, a tukah khan. Nikhat mai a ni lova, a kara kar Khuangpui Group YMA leh midang dang an rawn hnatiang a, ropui ka ti a, thla pawh ka la nual a ni. Chuvang chuan, he kan chhiat tawh hi duhawm lo hle mahse, Zonunmawi hi a lo la ral lo a ni tih kha a lang a. Hliappui khawtlang pawh an lawm a, tin, keipawh he Zonunmawi lo langah hian ka lawm em em mai a ni. Hei hi Ni 27.4

(Thawtanni) thleng khan kan ti a ni. Chuvangin Pu Speaker, kan Demand tuna ka rawn sawi tak te kha pass a chakawm khawp mai a, ka tan phei chuan, Member dangte pawhin phur taka min pass pui turin ka rawn sawm a ni e. Ka lawm e.

SPEAKER : Tunge sawi leh ang? Awle, Member zahawm tak Pu B.D. Chakma ilo sawm ang.

PU B.D. CHAKMA : Pu Speaker, ka lawm e. Hei vawiinah Minister zahawm tak pahnih te Demand kan sawi ho dawn a ni a. A hmasa berah Demand No. 8-na Taxation-ah ka han lut ang a.

Taxation Department hi department pawimawh ber a ni a, mahse Tax la turin Tax payers te hnenah facilities engkim hi ngaihpawimawh a ni a. Taxation concern a ni chiah lo a mahse Tax petu a nih avangin hei hi ka sawi duh a. Chawngte-ah department lian pahnih PHE leh Power & Electricity-in tax lak thla khat pawh an puitlin lo anih chuan a thla leh means a delete zel tihna a ni a, chuvangin tax hi pek loh theihloh a ni. Tin, tun thlengin facility provide a la tha lova, a bikin electric-ah hman aiin kan zia deuh tawh a, mahse tun thlengin ka bialah tlailam dar 6 leh dar 8 inkar hi current off a ni thin a ni. Chutiangin PHE pawh, tax hi kan sawi fo thin angin thla khatah vawi khat emaw chauh a haw thin a, tunah thal a in tanna, thla khatah vawi khat pawh kan dawng thei meuh ang em aw ka ti a. Chuvangin tax hi regular taka lak nise, service pawh tha taka provide ni bawk se a lawmawm ngawt ang.

Tin, Demand No. 16, Home hi, ka bial chhungah police station pathum a awm a, Chawngte PS, Barapansuri PS leh Vasei PS te an ni a. Sub-Divisional quarter leh police quarter Kamalanagar ami ho hi a chhe hle a, OC quarter leh Constable quarter pahnih phei chu a luah tawh loh hrim hrim a. Hei hi kan Minister zahawm takin min hriat sak se. Tin, lock-up pawh a luah tlak tawh lova, hmeichhia tan lock-up Chawngte ah kan nei lo bawk a. Ka kal apiangin kan Police Station ka tlawh thin a, mamawh an sawi ber chu lock-up leh police quarter a ni a. Tin, Borapansuri PS leh Vasei PS ah pawh motor pakhat mah an nei lova, a bikin Borapansuri hi international border zeroline-ah a awm si a, criminal incident a awm fo thin a, khatiang ni si khan misual manna tur motor pakhat mah an nei lova, four-wheeler emaw two-wheeler emaw pawh, chutiang dinhmunah chuan an awm a. Chuvangin kan Minister zahawm tak hian Borapansuri leh Vasei PS-ah motor pakhat ve ve dah thei se a lawmawm hle ang.

Sports ah lut ila. Kan Sports Minister hi a chak a, a thiam a, a taima a, a hmasain a chungah lawmthu ka sawi a. Hei, a hunlain Chawngte football playground ah artificial turf kan nei dawn a ni a. Hei, ruahui a tla tep tawh a, tunthlengin bungrua a la thleng lova, khawngaihin a ranglamin hei hi min en sak thei se kan lawm hle ang.

Tin, tun tum PMJKVY hnuai ah sum tam tak beisei a ni a, scheme thar a ni a, he scheme hnuai ah hian a bikin border area kan nihna angin min duhsak se, infrastructure indaihlohma a nasa si a. Tin, multipurpose hall kan mamawh hle a, Parva, Lawngpughat, Kamalanagar leh Borapansuri hemi bial pali-ah hian PMJKVY scheme atangin multipurpose hall hi min sak sak thei em tih windup-ah min sawifiah sak thei se. Abikin Borapansuri ah hian kan mamawh hle a, bazar shed chu a awm a, bazar nia public program neihte a rem thin si lova kan buai hle thin, open ground public meeting neih a hrawmin khua a lum thin bawk si a. Chuvangin Borapansuri hi Sports Minister fel tak hian min ngaihpawimawh sak thei bawk se ka lawm ngawt ang tih kha ka sawi duh a ni. Pu Speaker, ka lawm e.

SPEAKER : Tunge sawi leh ang? Awle, Dr. K. Pachunga i lo sawm ang.

DR. K. PACHHUNGA : Pu Speaker ka lawm e, Minister zahawm tak te pahnih Pu Robert Romawia Royte leh Pu Lalchamiana Demand te sawi a chakawm a, tin, pass ngei pawh a chakawm hle mai.

Demand No. 24-naah hian lut ta ila. budget estimate kan en chuan Mizo tawngin half percent pawh a chang chiah lova .40 percent out of total B.E. kha a ni a. Hetia han en chuan engtinne a kal theih ang han tih mai tur ava tlem deuh em tia han vui mai te pawh kha a awlin ka ring a. Mahsela, kan Sports Minister fel tak leh chak tak hi kan hriat leh kan hmuh angin budget pawn atangin engemawzat a lachhuak tih pawh kha kan sawi zing tawh a. Sports Department hi hmel thar kan hmu nasa hle mai a, sports policy te kan nei a central pawhin neih an chak em em a mahse state subject anih zia te kan hria a.

Tin, Lunglei-ah NCC mixed battalion kan han nei thei hi a lawmawm a, thalaite tan beiseina leh chona thar niin ka hria a. Tin, sport a hmingthate tan 5% job reservation te, hei hi zawnha pawh a tam a, ka lo hriathiam dan chuan permanent job anih ka ring a. Tin, kan hriat angin, SAI Sport Training Centre Saidan, Kolasib-a kan nei leh Sports industry-a kan han puang te hi a ropui ka ti a, Mizo thalaite tan chona thar, beiseina thar a siam a ni. Tin, district sports complex hmun thumah kan nei a, chutiang chuan residential sport school kan tih district panga (5) ah kan nei bawk a. Hengte hi a vanneihthlak ka ti a, an senso zawng zawng sawrkarin a tum anga sports pawh an zir anga lehkha pawh an zir ang a, a tha thlawt a ni tih kha ka sawi tel duh a. State Games kan neih te kha, han sawi leh ila Zofate chhim leh hmar, chhak leh thlang a mite inunauna a thlen a, a hlu ka ti takzet a.

Chutiang chuan sports infrastructure development, social media leh chitin renga sawiselna karah Zofate, thalaite tana kan rualawhna, kan tuihalna te min pe zel hi ropui ka ti a. Dik tak chuan harsatna karah inhlawhna turte, tax pekna turte khatiang khan infrastructure development budget pawnah tam tak kan han hmu te hi a lawmawm takzet a, mi pangngai chuan kan lawm a ni tih hi kan hriat thin dan ani a.

Tin, adventure lamah, river rafting kan hria a, kan ram hi hilly area a ni a tin, aerosport te, paracliding te, kan hriat ngai lovah hmasawnna kan han hmu zel te hi a ropui takzet a ni. Tin, kha kan hria a, LPS leh grassroot boxing tangkawpin Zofate khawvelah Profit-fight buatsaiah a ni te kha nasa takin Mizoram min chawimawi a, a hnam ang pawhin min chawimawi a, malsawmna kan dawng a. Kan thalaite hetianga khawvel hriat an han ni te, kawngka min han hawnsak te hi a ropui takzet a ni. Tin, kan hriat angin Mizoram State Sports Council Acts, 2021 pass a niin technical authority nihna pek a ni a, sports infrastructure din emaw, sak theihna Dan a nei te hi a ropui ka ti. Tin, DPR prepare in a thawktu tur Agency pawh ruat vek a ni a, khatiang khan nasa takin a department Sports Council te pawh hma a sawn a ni.

Tin, sports hi kan hriat angin district tinah Sport Officer office kan mamawh hle mai a, budget kha tlem angin lang mahse an thawkchhuak hnem a. Mipuite zarah a bial neitu kan han ni ve a, kan mamawh nasa mai si a, a thawktu an tlem si a; nimahsela, sports-a phur hi kan tam bawk si a, engtin nge maw kan hotuten an ngaihtuah thiam le aw tih tur a ni a. Sports jersey leh neuh neuh pawh hi kan pechhuak ve malh malh a ni. Chutiangin Lunglei District-ah pawh a thawk nghet bar pawh hi an awm lova, a thawktute lam pawh hi inbuatsaiah emaw, tihngheh a va han tha em tih kha ka sawi ve duh hrim hrim a ni.

Tin, Demand 43-na, Tourism prospect kan nei tha kan ti a, mahse kan budget han en chuan Nagaland Hornbill Festival 10 days budget pawh a tluk meuh lova. Mahse Covid harsatna te avangin visitor te kan nei hleithei lova. Tin, a changtuin a ngaihna a hria a, a chi te mahse a rah a lian ang tih ka ring ve hrim hrim a.

Ka bial bikah han lut ta ila. Lunglei atanga 8 kms vel lekah Sairep, tlawng hnarah a awm a, a hmunhma a thain a thengthaw nuam a, thalai leh family-a outing na remchang a ni a. Tin, *Flora and Fauna*, a variety a, orchid variety tamna hmun ani a, foreign researchers te Indian researchers te pawhin an rawn riah chilhna *birds variety* tamna a ni bawk a. Tin, thing *endemic species* kan tih, Lalruanga dawi bur te, Chawngtinleri puan ban tlang te awmna, khatianga chei tlak kha ni a, Sports Minister hian a hmun ngeiah min enpui sela, min enpui pawh a tumin ka hria a. Reiek te chu kan tluk zo hauh lo ang a kan mamawh ve hle mai tih kha ka han sawi tel ve duh hrim hrim a. Tin, ka bialchhung Mualcheng South-ah hian Lung milem, Mizoram hmun danga awm ve miah lo a awm a, a hmunah pawh kan han kal a; Mizo thlahtute nge an nih a Buddhist scripture nge ka hre chiah lova, researcher te pawh an lut thin a. Khi khi a hmuhnawm ve hrim hrim a, Art & Culture-in hmanah an enkawl ve a, tuaihnum te pawh a thain ka ring a.

Tin, ICT kan hria a, technology, electronics khawvelah kan awm a, ti hian kan sawi mai a, ‘atom’ khawvela thil te ber chhunga mi electron-ina information a carry-out, a put kualna khawvelah kan awm a, chuvang chuan a pawimawh takzet a. A changtu Minister pawhin a pawimawhna hriain, kan mobile te pawh a tha ve zel a, signal awm lohnaah pawh kan awm ve zel tih kan hre tawh a.

Tin, Demand No. 8-na, Taxation hi a pawimawhzia kan hria a, a pawimawh zia leh Mizote'n tax kan pek hreh zia ka ngaiantuah hian sawrkar hi kan puh luai luai a, lehkhathiam tak tak pawh hian sawrkar hi sumdawng tur emaw min ti a, a ni lem lo a ni. Khawvel ram changkang kan hria a, chhiah pek an uar a, mimal leh private company an hausa a, chhiah an pe tam a, chhiah an pek that avangin ram ropui anni a. Keiniah erawh chuan mi zawng zawngin sawrkarah beiseina kan nghat a, hr kan mentality hi thlak ve a tul a ni. Tin, kan thawhchhuah mil zela chhiah pek hi a pawimawh a. Nimahsela, Mizorama thil danglam ve deuh chu, kohhranah kan phak tawkin thawhlawm kan thawh a, in lo chhut ngai em ka hre lova; kohhran hrang hrang hian employment a generate nasa em em a, income tax vaiin an pek aiin kan pe tha maihei a ni; tikhan kan in ei tawn vek a a tha hle a ni, tih te kha ka sawi tel duh a.

Tin, Home Department hi an hlu hle mai; kan ram leh hnam min chhanhim tu an ni a. Kan hriat angin hripui leng karah thih leh dam kara kan awm laiin kan ei lakna highway te tih pin a ni a, sawrkar tan a luhai thlak takzet a. Mahse kan Chief Minister hmalakna leh kan Home Department hotute hmalaknain, a neitu, nu leh pa nih tlin takin. Hei, kan ramrite venghimtu chu MZP, kan zirlai hruaitute ni tawh lovin kan sawrkarin Home Department kaltlangin kan sipaite'n ramri an venghim te hi mipui tan a thlamuanthlak a. Tunhma sorkar kal taa Assam-in kan ram min hauhsak, min chhuh te chu vawiinah hian kan sipaite leh mipuite tangrualin km engemaw zat kan la let leh a ni tih hi mipuite hian kan hriat a ngaiin ka hria a ni.

Pu Speaker, Demand 30, Disaster Management Deptt. hi kan hriat angin chhiat tawk kan awm thin a; rial te a tla vak a, ka bialah te pawh rangva engemaw zat kan pe a. Tin, leimin kan tih ang te, saw chhimlam pang kalkawng NH 54 Bualte dai saw fur loah pawh a tlahniam thin a, hman niah kan Minister te pawh zanah an tang a, kan buai hle a. Khing te pawh khi department-in a hriat ka ring a, kawng laitute pawhin an hria a, kan buaipui ve ang reng bawk a. Tin, thingtlang kawng EGS kan tih enkawltu nei lo hi ka bialah khaw 10 lai a awm a. Land slip hi kum tin kan tuar a, ruah a surin Sabereka khuangkaih emaw, leimin emawin a ti ping vek a, mihring an cheng ve si a, motor luh theina buhfai leh eibar lakna a ni si a, hengte hi Disaster Management atangin min pui thin a kan lawm hle a. Kumin ah pawh hian kan rawn dil leh dawn tih ka sawi tel duh a ni. Pu Speaker, ka lawm e.

SPEAKER : Member zahawmtak Pu Lalrinsanga Ralte i sawm ang.

PU LALRINSANGA RALTE: Pu Speaker, ka lawm e. Vawiinah kan Minister pahnihte demand kan sawi leh dawn a ni a, sawitur a tam leh dawn khawp mai a. Chuvang chuan, hun te ka hman pelh lutuk loh nan ka ngaihpawimawh zual lai han sawi ka tum a ni.

Pu Speaker, a hmasaberah chuan Demand No. 22, Sports & Youth Services hi ka sawi duh a. A lawmawm khawp mai a, sawrkar hmasaah khan Sport Minister te pawhin theihtawp chhuahin hma an lo la chho tawh a. Vawiina kan Sport Minister hian sorkar hmasa hmalakna kha a khum hneh hle a, a lawmawm hle in ka hria a. Kan Sport Minister chaktak hmalakna leh a inpekna te leh a tuipui vang niin ka hria a, lawmawm ka ti hle a ni. Hei, Sport Policy vision mumal tak nei kan han nei te, chutiangin kan thlalai infiam mi, mihlawhtlingte sawrkar hna Group B, C leh D-ah 5% direct-a hauhsak a ni te hi a lawmawm hle in ka hria. Thalaite tan kawl a eng tan a, infiam mite tan an infiamnaah hlawhchhuah thatak sawrkarin a siam sak ta hi a lawmawm hle in ka hria a.

Tin, Pu Speaker, Kolasib Saidan-ah khuan SAI hnuiah Sport Centre din a ni a. Hei hi Kolasib ta bik a ni lova, District tin te kan inhmantawm tur a nih bakah, Zoram thalai infiam mite ta a ni. A biktakin keini Hmar tlangdung leh Zoram khaw tawp deuh a awm hote Sport infrastructure tha nei lo tena kan hman tangkai tur anih avangin a lawmawm hlein ka hria. Hetiang ang hmalakna nei thei kan Sport Minister-te an fakawm hlein ka hria a ni.

Tin, India ram chhung State zawng zawng zingah Sport hi Industry a hlang kai hmasa ber chu Mizoram hi a ni a, hetiang ngaiantuahna chang hria leh ruahmanna siamtu kan Chief Minister zahawmtak leh kan Sport Minister zahawmtak te chungah hian lawmthu ka sawi duh a. Hetiang a nih chuan thalai infiam mite tan kawl a eng chho ang a, infiamna mai nilo, infiamna hi hnathawhna/eizawnna tlaka siam tuma Mizoram sawrkarin Sport-a ruahmanna a nei hi lawmawm hlein ka hria. Tin, ka sawi leh duh chu, State Games kha a ropui hle in ka hria a. Kuminah pawh Covid hian min kiansan chuan neih leh ngei a tha lawm ni tih kha ka rilruah a awm deuh a. Chutih lai chuan Pu Speaker, kan Sport Minister zahawmtak hian a sawi fo a, a react-naah pawh min rawn tel sak hram se ka duh chu, tuna Mizoram sawrkarin kan pawisa hmuh hmasak ber tur *Khelo India* a ni emaw, EAP atangin a ni emaw Vairengte Sport Centre hi kan ram tan kan neih ngei ngei a tul a ni tih lai kha ka sawi duh a. A chhan chu kan sawi fo tawh angin phailamah infiam mite an kal thin a, chung phai boruak nena inmil tak mai Vairengte-ah khuan training centre kan lo din chuan Mizoram hian medal tun aia tam kan hawn thei ngeiin ka ring a. Kan Sport Minister hian theih tawp min chhuah sakin, kumin emaw, nak kum emaw (*Dy. Speaker in Chair a la.*)

DEPUTY SPEAKER : Awle, sawi zawm nghal ma la.

PU LALRINSANGA RALTE: Pu Dy. Speaker, ka lawm e. Kan Sport Minister hian Vairengte a training kan neih theih ngeina tur hian ruahmanna chaktak min neih saka, pawisa kan neih hmasak berah *first priority* min pe turin ka dil duh a, chutiang chuan ruahmanna min siam sak se a lawmawm hle ang.

Tin, Bilkhawthlir khu YMA General Conference kan thlenna tur a ni a, kan Sport Minister hian min lo ngaihpawimawh sak se tih han sawi duh ka neih chu, kan YMA field khu a panna leh a chhuahna hmunkhat chauh a ni a, khutah khuan pandal kan dah dawn a.

Kan field khu chei that a ngai khawp mai a, a bulah khuan Motor kawng a kal a, tlak a hlauh awm si a, a field min chei thatsak bakah pavillion khu chei that ngei ngei a ngai a, sum awm thei ang angin Bilkhawthlir field khu min chei sak turin ka ngen nghal a, kan Sport Minister-in min ngaihpawimawh sak hram se tha in ka hria. October thlaah hian khawmpui kan thleng dawn si a, chumi hma chuan Bilkhawthlir field cheina tur khu a tam emaw, a tlem emaw min ruahmansak theih chuan a lawmawm ngawt ang.

Pu Dy. Speaker, Demand No.43, Tourism hi department langsar lutuk lo, lian lutuk lo ni mahse a hnathawh hi ropui hle in ka hria a. Kan ram chhunga a hmalakna hrang hrangte en hian ropui ka ti a. Serlui Tuikhuah, Congress hunlaia ‘Hawla Island’ kan tih thin, tuna ‘Chawngkhupa Island’ ti a kan thlak tak khu chei theih tak mai a ni a. Khulai khu ram dang pawhin an tlawlh theih tura chei hi a tha tih hi Tourism lama sawi duh ka neih a ni a. Chu chu Tourism Minister hian ruahmanna te min siam se tih kha ka sawi duh bawk a ni.

Tin, Pu Dy.Speaker, Demand No.16-ah hian, Home department hnathawh dan te kan hmuin kan hria a, Mizoram-ah chuan kan in pumawhna ber chu Police kut phuar leh phuar loh tih a ni thin a. Vawiinah chuan kan Police-te kut phuar a ni ta loin ka hria a. Chumi a nih rual chuan kan Police-te hi thuam that an tul hle in ka hria a. Mizoram hmun tina kan police hmunhma te hi a chhe hlawm em em mai a, hengte hi chei that a tulin ka hria a. Tin, motor kan nei tha lo a, ramria kan outpost a ni emaw, station a ni emaw khawi hmunah pawh hian motor kan nei tha lo vek mai a ni. A bikin Vairengte leh Saiphai khu, lei a awm a, leh lam Mizoram a ni a, a leh lam Assam a ni a. Motor pakhat pawh Saiphai-ah an kawl lova,Vairengte-ah pawh an motor dawn khu a chhe khawp mai a, an hotupa SDPO-in Gypsy tha tawh vak lo pakhat a kawl a ni mai a. Ka sawi duh chu ramri a kan buai reng reng hian Assam lam chuan motor tha leh changkang tak nen an rawn inkhar thum dap mai a, keini Mizoram police lamte hi zahtlak loh deuh mai hian kan facility hi a awm thin a, a tha lo hlein ka hria a. Khulai Vairengte chauh khu a ni lova, inter-state border, he lai international boundary te hmun pawimawh zualah hi chuan kan police-te hi kan hmanraw neih that pek a tul hlein ka hria a, chung hmun pawimawh zualah te chuan motor tha kan dah theih hram a tulin ka hria. Tin, Bilkhawthlir khu sawi tawh angin YMA conference thlenna tur a ni a, chute laiin kan police outpost khu a chhe em em a, a kaw heu hua mai a, a zahthlak khawp mai a, Home department tan pawh mualphona a niin ka hria a, office leh staff quarters a ni tih pawh hriat loh khawp khuan a awm a, khu khu conference hma hian a theih ang anga kan chei that hi a tulin ka hria a ni.

Tin, Pu Deputy Speaker, ka sawi leh duh chu, kan Home department hi ramri buaiah a che tha khawp mai a, a lawmawm hlein ka hria a. Ka bial a ni a, Vairengte-ah khan vai ho nen a sah pawh kha kan in sat a nih kha. Tin, khulaiah vai buk te an lo tikang palh a, tunge a tikangtu chu kan hre lova, khulaiah nasa takin hasatna kan tawk a. Amaherawhchu, ka sawi duh chu Pu Dy. Speaker, sawrkar hmasa Congress sorkar lai khan Zophai-ah harsatna kan tawk a, Mizo thalai (zirlai) ten, min vaw mai ni lovin silaiin min kap a nih kha. Vawiinah chuan, MNF sawrkar, Pu Zoramthanga sawrkar a rawn din hnuah chuan, *Pathian leh kan*

Ram tan tia hnam neitu sawrkar a rawn din hnuah chuan buaina a rawn thlen apiangin Mizoram hian hmasawnna kan lo nei thin a ni tih hi ka sawi duh a. Pu Dy. Speaker, hei hi a pawimawh a, ram hnuk tak tak a ni a, kan sawi zo law law anga.

Ka hriatchian kan sawi ang a. Vairengte-ah khuan MNF ministry a rawn pian hnuhian vawi hniih buaina a awm tawh a. 2019 khan Assam lamin Forest Beat Office an rawn chei that avangin buaina a awm tawh a, chumiah chuan kum dang zawng zawng aiin ram ria kan buai hian Mizoram sawrkar lokal tawh te khan mipui leh police kan innawr thin a ni; chutah chuan hlawkpuina kan nei ngailo, Assam chuan hlawkpuina an nei a, hma an rawn sown thin a ni. Chu chu Pu Zoramthanga kaihruai sawrkar hian Chief Minister zahawm tak huaisenna leh inpekna te, Home Minister te nena an ngaihtuahna leh an hma laknain buai vawikhatnaah khan meter 455 velin ram ri kan sown thla a ni, chu chu House record-ah pawh ka sawi duh a ni, Pu Dy. Speaker.

Vairengte-ah khuan ram ri hmawr bera awm thin chu police station a ni. Chu police station atang chuan a thlang lam Forest Beat Office kan tih te kha status 4 ti a dah a ni a, tu lam ve ve pawn hmasawnna hna engmah ti thei lo tura dah a ni. Chumi anih lai chuan 2019 khan kan han buai ta chiah a, engtin nge kan sawrkar hian kan ram ri hi kan humhalh ang a kan venhim ang tih kan Chief Minister leh Home Minister ten ngaihtuahna sengin zanlai dar 12 pelhah IR police 30 Silai nen an rawn dah thla a, keiniin an riahna tur kan lo buaipui a, chaw eina tur thleng nen engkim ruahmanna kan lo siamsak a. Tuma khawih theih tawh loh, eng sawrkar pawhin an lo khawih ngam loh leh an lo kalsan tawh BRTF hmun ruakah he Sawrkar hian Sipai a dah tawp mai a ni. Vawiin thleng hian chu Sipai 30, platoon khat a dah chu hnuhdawh a la ni lova, an la lachhuak lo a ni. Chutiang chuan, Pu Dy. Speaker, nikumah Covid boruakin min chiah laiin Vairengte site-ah khuan buaina a chhuak leh a, BRTF kan dahna atang chuan kan um tawlh thla leh a, meter 500 chuang kan um leh a. Vawiina ka sawi duh chu, Pu Zoramthanga sawrkar a lo din hnuhian Vairengte site-ah ram ri hnaih zawng leh um thla zawng hian km. khat chuangin hma kan sown thla tawh a ni. Chu chu ka sawi duh chhan chu, vawiin hian he hnam neitu kan tih MNF, *Pathian leh kan Ram tan*, tia India sawrkar pawh lo kap ngam hi chuan he Ram leh Hnam hi a veng him ngam ang tih hi ka hmuh dan leh rin dan a ni a, chutiang chuan kan kal bawk tih hi ka sawi duh a.

Chuvang chuan, tuna boruak kan neihna, kan buai luai luaina hmunah khuan kan Home Minister leh kan Chief Minsiter zahawm takte hmalaknain SSB IR awmna tur kan sa tih ka sawi duh a. Social media-ah Assam lam SSB ho awmna a tha kan ti, mahse, kan hotute hian rilru nei takin thil an ti a, vawiinah Vairengte site-ah khuan zuk en rawh se, BSF leh IR kan dahna te khu Assam chuan thinguai nen awlsam takin rangvain an khawr pum a, keini chuan kum tam tak daih turin ruahmanna kan hotute hian an nei a nih ka ring a, In kan sa a ni.

Hmanniah Health Minister zahawm tak nen kan zuk kal a, Session lai khan, tunah khuan concrete structure-in khulaiah khuan kan din leh mek a ni. Chu mai a ni lo, tunhmaa

civil mite'n khulai ram ri buai laia kut pawh an thlak ngam loh, an kal ngam loh, vawiinah chuan VC ten ram an theh a an hmalaknain khulai khu kan lai zawl duai tawh a ni tih kha he House-ah hian ka sawi duh a ni. Chutiang kan tih theihna chhan chu kan police-te kut hi phuar a ni lova, buai leh harsatna a awm apiangin kan Sipaite hian hmatawngin silai nen mipuite min venghim a, keimahni leh keimahni innawr lovin kan do zawkte Assam lam min nawr sak ta hi lawmawm hlein ka hria. Chulaiah chuan, a hma chuan zirlai pawl ten ram ri an veng thin a, vawiinah chuan kan sawrkar hian sipaite hmangin ram ri a veng ta a ni tih hi ka sawi duh bawk a ni.

Pu Dy. Speaker, ka sawi tawp dawn tawh ang a. Chutianga hma kan lakna chu kan Home Minister te remruatna fel tak a nih ka ring a. Khumi ramri bulah khuan IR Company Headquarter kan dah ngei ngei a ngai, hmundang atanga enge maw hleka kan inpawh hian a rei thei lutuk a; chumi IR Company Headquarter kan dah theihna tur chu a nih ka ring a, IR Company Headquarter pawh awm nghal theihna tur khawp chuan tunah khuan In kan sa a ni. Chuvang chuan, Vairengte-ah hian IR Company Headquarter hi kan dah ngei ngei a ngai a ni tih kha ka sawi duh a ni. Pu Deputy Speaker, hun ka pel hret a min hriathiam a vangin ka lawm e.

DEPUTY SPEAKER : Pu Lalrintluanga Sailo, Member zahawm tak i lo sawm ang.

PU LALRINTLUANGA SAILO: Pu Deputy Speaker, ka lawm e. Hei, vawiinah kan Minister te pahnih demand hi sawi tur a tam hlein ka hria a, ngaihtuahna thui tak pawh min neihtir a ni tih ka sawi hmasa duh a.

Member zahawm tak tak ten an sawi tawh ang khan, Home department-ah te han khaikhawm deuh ta ila; leh Sports & Youth Services chungchangah kan ramin nasa taka hma kan sawnna a taka kan hmuh hian Sam No. 126-na kha Pu Dy. Speaker, ka ngaihtuahnaah a lian hle mai a, khatah khan Lalpa'n an tan thil ropui takte a tihsak a ni tih kha chiang deuhin kan hmu a. Lalpa'n Zion salte a hruai kir leh lai khan mumanga mangtute ang mai kan ni, chumi lai chuan kan ka chu leiin a khat a, kan lei chu hla sakin, chumi lai chuan Lalpa'n kan tan thil ropui tak a tihsak a ni an ti a. Lalpan thil ropui tak a tihsak a ni tih Israel fate'n a hnuah an sawi ve thei chauh a ni. Vawiinah hian a hun laia thil harsa tak kan tawrhna te rilruah a awm lo thei lo a ni tih kha ka sawi hmasa duh a.

Pu Dy. Speaker, Demand No. 43-na hi sawi hmasak ka duh a. Tourism chungchangah hian he department hi ka bial lam chuan kan hmelhriatna a la rei lova, MNF ministry hmasa Pu Zoramthanga kaihhruaina hnuiah khan a hmel kan hmu ve tan chauh a ni a. West Phaileng-ah khuan sum harsatna kan tawh chhoh tan tirhah khan sum inrenchem takin khulaiah khuan Tourism khan tourists te tan chawl hahdamna leh han thlenna tur te min han sak sak a, vawiin thlengin kan la hmang tangkai a. Ka bial chhung khaw 33-ah khuan accommodation tha pakhatmah kan nei lova, chu chu kan neih chhun a ni tih kha he

House zahawm takah hian ka tarlang duh a. Tunah khuan kum 20 chuang a lo liam ta a, renovate a la ni lova, kum 20 chuang a lo liam ta a. VIP room ber pawh ruah a sur chuan a far tluk tluk thei tho a, bathroom leh toilet pawh chutiang tho chu a ni a. Hei hih kan Minster zahawm takin min lo chhinchhiah sak thei se ka duh a. Thingtlang khaw inkalpawh harsa tak tak kan ni a, bial fangin kan kal lo thei lova, kan official-te pawhin min han zui ve nawk nawk a, a awm ang angah te kan han inbeng bei a. A hminga a changtupa ber hi Chakma chhuatah ka la mu ngat ngat thin a ni. Chuvang chuan Phuldungsei-ah khuan potential kan nei tha a, Bangladesh view te khu a nuam a, khungah khuan tourist-te tana nuamsa deuha han chenna tur hi sawrkar hian min buatsaih theih se tih hi ka rawt duh a. Kan thlang lawkah Bangladesh atangin, tunhmaa changkang lo zawka kan ngaih ten tunah hian min chhuk en deuh tawh em aw tih te pawh ngaihdan a awm thei a.

A dawt lehah chuan Demand No. 30, Disaster Management & Rehabilitation hi, tuna ka sawi ang tho khan he department kan hmeliatria hi in kangah te, lei min leh chhiat tawhah te a ni mai thin a. Amaherawhchu tuna kan minister zahawmtak kaihhruaing hnuaih hian, nikum maiah chhiatna te kan han tawk a. Chungah chuan retaining wall leh culvert siamah te nasa takin hma min rawn lak sak a, kan lawm hle mai a. Silsuri-ah Disaster Management & Rehabilitation Department-in hetiang ang a thawk a ni tih an han hriat khan mak an ti hle mai a, mak pawh a mak tak hle mai a, la hman ve ngai lohna area kan nih avangin, chuvang chuan kan lawm hle a ni.

Tin, nikum lamah fur kan han tuar a, Lallen-a inkhawm kalte pawh an han tla nawk nawk a, patling pahnihite chu nakruh tliaka hospitalise ngai khawpin an awm a, chu pawh chu Minister hnenah kan han sawi a, hma min lak sak mek a, a chungah lawmthu ka sawi nawn leh duh a. Chutiang chuan khuti lamah he department kan hmeliatri dan hi a chuti lutuk lo thin kha a ni a, Pu Zoramthanga sawrkara hmasawnna kan han nei chho ve zel ta te hi kan lawm hle a ni tih ka sawi duh a.

A dawt lehah chuan Home Department, Demand No.16 hi, kan ram him leh him loh chung changa mawhpurtu a ni a. Han tarlan duh ka neih chu, ka hmaa Member zahawm tak te sawi ang khan nikum maiah a rualin thenawm state Assam atangin ramri hmun nga ah harsatna kan tawk nasa hle tih kan hria a. Tun hma sawrkar kal tawh zawngah khan ramri buai hi kan nei thin a ni a, mahse a rualin hmung nga ah kan nei ngai hauh lova. Tuna kan han neih kha chuan keini tak ngial pawh zan pawh thlu loin kan han tlan thla a, chungah chuan tih tak zeta he ram hmangaihna thinlung pua enkawltu ministry leh a changtute hmalakna avangin vawiinah chuan hma kan sawn nasa hle a ni. Hnungtawlh chu sawi loh hma lamah chak takin kan kal a, a taka kan la luah ngai loh hmunah police te dahin electric leh tui connection thlengin tha takin kan pe a. Amaherawhchu, Covid-19 avangin sawrkar sum indaih lohna a nasa a, duh ang tak chuan kan la enkawl puitling lo tih chu kan hria a. Engpawh ni sela ramri chungchangah hia eng party pawh sawrkar sela NGO hrang hrang ten kan inbeih rawn thin a ni. Tunah chuan hma lam kan pan nasa em em mai a, khulaiah chang ni lo, nikum khan Hachhek tlangdung lam pawh keipawhin ka zu fang

chhuak vek a ni a. Kan ram anga kan chhal ve chiah ngai lem loh, mahse Mizo-in a hming kan neih ve thin ‘Mittel Lui’ kan tih, Mideli thlengin vawiinah chuan kan police ten an that chilh ta a ni. Hei hi a lawmawm hlein hmasawnna nasa tak a niin ka hria a. Chuvang chuan a enkawlta Minister zahawm tak chungah lawmthu ka sawi a. Mahse, duhkhwapna a la awm chiah lo a ni tih erawh chu ka tarlang tel duh a. Mideli ka zuk fan hnu hnung ber hian electric chu an lo pawt lut tawh a, luipui kam maia awm mah nisela tui thianghlim han in mai tur te, ruah a lo sura tui te a nut thin avangin duh anga la pek loh a nihna laite a awm a. Zawlnuam bula Zawlpui outpost pawh ka va tlawh a, khawngaihtakin kan Minister-in min lo chhinchhiah sak sela, inthiarna kan Police-te khuan an nei tha tawk lova, kei pawhin ka han ziak nawk nawk a, PHE lamin toilet an sem ang chi te pawh kan han ziak chho nawk nawk a. Zawlpui post khu post nghet tak a lo ni tawh a, khungah khuan hmalakna tur tam tak kan nei a. Tin, ral leh lampang Tripura-ah khuan ruihhloa sumdawng englai pawha lo lut an awm a. A chhan chu Langkaih lui khu lui pawnlang tak a ni a, duh duhin an lo kai a khu khuan namen loin kan thalaite zingah harsatna min siam a ni. Chuvangin helaiah pawh kan Police-te thuam chak chhunzawm zel hi a pawimawh hle tih ngaihtuahna min neih tir a. Chuvang chuan helaiah hian tan kan lak chhunzawm zel pawh a tha hle mai.

Tin, ka bial lamah ka han lut ang a. Ka bialah khuan West Phaileng leh Marpara Police, sub-Divisional Post leh Outpost ang deuh Station kan nei a. Kan buildingte khu a tla bal tawh khawp mai a, BADP atanga tih kan han tum khan a lehlamah civilian lam ten eng eng emaw duh tawk lohna, development lamah kan la hnu fual si a, tiin harsatna kan han nei thin a. Hei hi min en uluk pui ka duh a. Chutih rual chuan ka hmaa serlui bialtu zahawm tak sawi ang khan, kan vehicle kawlte a tha lo khawp mai a, emergency thila *running start* ngai te a ni a, chuvang chuan min en zui sak ka duh khawp mai. A thar kan lei thei dawn lo anih pawhin tunhmaa modernization scheme hmanga kan lei Aizawl-ah hian ka hriat sual loh chuan kan officer zingah a kawpa kawlte kan awm em aw tih te, hei hi pawh chhuaha kan insem zai chuan vawiin hian kan la kal thei lawm ni tih kha ka ngaihtuahnaah a awm a ni.

Chubakah chuan, Thinglun-ah pawh ka zuk kal a, khungah pawh kan Power Minister-in eng te a lo pe vek tawh a. Amaherawhchu, bulding kan la nei tha lo deuh a, khungah khuan kan inep kumkhua tawh hmel a. A chhak lawkah Assam force-te an awm a, anni pawh engtin tin emaw chuan bunker pawh an nei a, khung khu ngaihtuah hmasakah dah ila a. Sawrkar sum a harsa a nih pawhin engtin tin emaw member dangte pawh hian hmalak dan a awm em tih te pawh keimahni zawnah theuh hian ngaihtuahna kan sen a tulin ka hria a ni.

A dawt lehah chuan Pu Deputy Speaker, Demand No. 22, Sport & Youth Services ah hian sawi duh ka nei a. A chhuanawm hlein ka hria a, a department hi; MNF party-in kan election manifesto kan tih puitlinna lai kha a ni. MNF sawrkar Pu Zoramthanga kaihhruai a lo din phat atanga kum khat pawh a tlin hmain kan Sports Minister zahawm takin chak taka hma a lakna zarah Mizoram Sport Policy, 2019, Ni 15, November, 2019-ah kan han nei

hmante kha thil mak tak a ni ringawt mai a. An chak em em hian ka hria a, hei hi mumangah pawh kan la man ngai loh thil a ni a, a lawmawm hlein ka hria a. Chuvang chuan Sport Policy nei tur chuan Sport Minister tam tak kan lo nei tawh thin a, Sports-ah hian vision fel tak nei vawiin hian he ministry-in kan nei hi, Pu Dy. Speaker, vanneih thlak tak zet zetin ka hria a ni. Hei hi kan sawrkar pawhin kan hmingthat phah hlein ka hria a ni.

Chutih rual chuan duh ang tawka hma la thei tura buatsaihtu kan Chief Minster zahawm tak chungah lawmthu ka sawi a. A bik takin ka bial khu chu kan hriat angin sports infrastructure engmah nei ve lo kan ni a, mahse, zan khat thil thuah thil ropui tak mai kan han hmu a. Nichina Bible chang ka han tarlan ang deuh kha a ni a, ‘*Lalpa’n thil ropui tak min tihsak a ni*’ tih kan au hla a ni a, Pu Deputy Speaker. Chutah chuanin West Phailengah khuan kan Sport Minister kal tlangin thil ropui tak tihin a awm ta a ni. Establishment of Residential Sports School pawh kan nei dawn a, West Phaileng-ah cheng nuai 3286.34 in a bul kan tan dawn a. Chumiin a ken tel chu academic building te, boys and girls hostel te, multipurpose hall te, synthetic football turf te, RCC water reservoir lian te, principal leh staff quarters unit 8 ngawt awm te, basketball leh volleyball court te a keng tel a, a ropui hle a ni.

Tin, chu mai nilo, football leh hemi piah lamah a chuan chunglamah hian Establishment of State Adventure Training Centre, Vaipuanpho-ah kan han ti dawn a ni a. Chu mai chu a la ni lova Pu Dy. Speaker, basketball court leh viewing tower hi hmun riatah min siamsak dawn a. A sum ken chu a tam tham khawp mai a, cheng nuai hlir nuai 117.13 a keng a. Tin, volleyball court pariat tan sanction a ni tawh a, chu chuan cheng nuai 128.04 a keng tel bawk a ni. Kan thalaite pawh an phur em em mai a, nasa takin ruihhlo dona kawngah pawh min pui dawn tih a langin ka hria a, kan lawm hle a ni tih kha ka sawi duh a. Tunhma sawrkar kal tawh te thlirin vawiinah hian khawthim a awm tawh lova, khua a var ta a. Khulamah khuan sports hi pawh eizawnna tling tak tak industry-a kan sawrkarin a puan ang hian industry tha tak a ni dawn a. Tin, kan thalaite pawh an hmakhua a eng chho dawn a ni tih a lang a. Lehkha zir thei lo khawpa retheihna ina a bawih tawh te kan ni a, physically-a mi tha tak tak ni si, kalkawng hmu lo, khawdang pan hleithei lo khawpa retheihnain a bawih tawh te kha sports-ah infrastructure tha tak maiin min han luhchilh ta a ni a, Pu Dy. Speaker, vawiin ah hian kan lawm lutuk e a. Kan Minister hi kan bial zin tur pawhin sawm ka duh a, chawimawina ropui tak nena khulaiah *Nopui* dawmpui pawh kan beisei dawn a ni tih ka tarlang duh a. Sawi tur a tam, mahse ka sawi vek tawh lo ang e.

Vawiin ah hian heng kan Minister zahawm tak te pahnih demand hi Member zahawm tak ten inlungrual taka Mizoram hmasawnna leh humhimna atana thahnemngai taka thawktute anni tih hriaa pass pui ngei turin ka han ngen a ni e. Ka lawm e.

DEPUTY SPEAKER : Tunah chuan Member zahawm tak Pu VL Zaithanzama ka sawm ang a, a sawi zawhah Member zahawm tak Pu Ramthanmawia a lo inring dawn nia. Tunah i lo sawm ang.

PU VL. ZAITHANZAMA : Pu Dy.Speaker, ka lawm e. Vawiinah hian kan Minister zahawm tak te pahnih Home Department leh Sports Department a ruala kan sawi tur hi a tha hlein ka hria a. Anni department pahnih ber kher kan han sawi kawp tur hi thil han sawi kawp rem angreng te pawh a awmin ka hria a.

Thuhma ang reng deuhin ramri chungchangah Sports Minister zahawm takin ramri chinfel a nih tawh thu a puan kha kan la hre reng awm e. Home Minister zahawm takin a lo hre ve si lova, kan Chief Minister zahawm takin ramri chinfel dan thuruk a hriat Home Minister a hrilh duh lo kha vawiin hi a chinfel hun tak ni turah ka ngai a. Kan chinfel lawk loh chuan mipui an hrilhhai a ni tih kha thuhmahreriah ka han sawi a ni.

Pu Dy. Speaker, Taxation Department Demand No. 8 ah hian kan lut ang a. Taxation Department hi kan State sumhnar ber a ni a, State Own Tax Revenue-ah phei chuan 80% chuang an thawh chhuah hi a ni tlangpui a. Hetiang a nih avang hian hei aia hlawk zawka a thawh theih nan thuam chak a ngai hle a ni. Department Restructuring te pawh tula ngaih a ni a, chutiang tih tumna chu a awm em tih ka han zawt nghal duh a. Kumin chhung a he department target hi a sang khawp mai a, crore 600 lai a ni a. Engtin nge an khum theih ang, engzatin nge khum theih an inbeisei hetiang hripui karah hian tihte ka rilruah a awm a ni.

Thil pakhat tunah hian state sum indaih loh lai a ni a, hetih lai hian chhiah ba thahnem tak an awm a ni tih chanchinbuah te pawh kan hmu thin a. Hengho umzui tur hian state tribunal ang te emaw hi siam ve tumna kan nei em tih te kha ka hre chak deuh a, he department hi tihchak a tul hlein ka hria a. Sawi tak ang khan nimin lamah border trade chungchangte kan sawi, hengte hi a tak a lo thlen hunah chuan kan mamawh em em tur department, kan ram leh hnam tana sum lo hai luttu tur ber a ni a. Vawi leh khata nakinah loh thei loh hnuah han tih changtlun that kan tum khan harsatna a awm thei a, tun atang hian zawi zawia he department hi kan thuam thata tihhmasawn a tul hlein ka hria.

He department-ah hian sanction post 312 a awm a, 238 chauh hnawhkhah a ni a 23.71% lai hnawhkhah lohin a la awm a, Group B post phei chu 35.96% lai ruak a awm a ni. Chuvang chuan kan hmalam hunte thlirin kan budget sawi takah te pawh khan kan thawhchhuah hi kan tihpun ve hret hret a ngaih avangin he department hi theihtawpa kan thuamthat a ngai a ni tih kha uar takin ka sawi a ni.

Demand No. 16, Home Department-ah hian ka han lut leh ang a. Home Department hi 5.16% -in a budget tihpun a ni a, a lawmawm hlein ka hria. Taxation pawh kha a pung a, kan sawi ta lo a a lawmawm hle a ni. Mizoram leh Assam ramri kha a bik takin kan buai fo mai a, kan buai zing ta hle mai a. Ramri buai apiang hian kan ei lakna kawngpui ber a ni tih hi an hria a, Assam ho khuan kawng min khar sak ziah mai a, kan buai fo thin a ni. Kan han buai nak nak a, hmanni lawkah pawh kan buai a, amaherawhchu kawng a tlang hian a buaina chhan ber ramri hi kan hlamchhiah deuh zel emaw chu aw tih ka rilruah a awm a. Kawng a

tlang hian kan duh tawk mai deuh zel a, kawng hi tlang eng ang mahse engtikah emaw chuan an la buai leh dawn a. Chuvangin ramri buai chinfel kawngah hian kan sawrkar hian hma a lak nasat a ngai hlein ka hria a. Hemi chinfelna kawngah hian a pawimawh ber pahnih ka rilruah a lo awm a, state pahnih inkar ramri chingfel tur Commission siam hi a tul a ni. Chu Commission chu chak taka hnathawk thei turin a taka kan nawr reng pawh a ngai a. Chuti lo chuan kawng a tlang avang hian lungmuang takin awm mah i la reiloteah kan buai leh thin a, chu chu tun hma atanga kan kal dan tlangpui a ni. Chuvangin ramri chingfel tur Commission din hi ngaipawimwh ila a tha hle awm e.

Bairabi leh Vairengte-ah hian State Armed Force Battalion ramri veng tura dah hi a tulin ka hria a, a battalion pui pui a harsat pawhin company thuthmun tal chu Pu Dy. Speaker, dah thei ngei i la tih hi ka han rawt a ni.

Thil dang pakhat Home Department kan sawi lai hian ka rilruah a lo awm a. Dan loa lo lut Rohingya hmeichhiae Vairengte-ah khuan pariat lai an la kawl reng mai a, an man hlim khan kum 18 leh 22 inkar tleirawl te te an ni a. April Ni 23, 2019 zana man kha niin ka hria a, Bangladesh refugee camp-a awm an ni. Heng hmeichhiae hi Observation Home emaw Detention Centre pangngaiah dah lovin Vairengte Police Station-ah khuan tun thlengin an la awm a. Temporary Detention Centre-ah dah an ni a, a enkawl a hau tak hle mai a.

Kawng leh lamah chuan kan Police te pawh an fakawm a, hmingchhiat pawh awl tak tur a ni. An awmna khu hungna mumal pawh a awm lo a. Tin, a rei tawh a, kum 2 dawn an kawl tawh a, khutianga hmeichhia, tleirawl te te kawl khu vanduai a hmingchhiat theihna te pawh niin ka hria a. Hei hi a rang lama chinfel theih dan a awm lo em ni tih kan zawt nghal duh a. Central sawrkar leh Myanmar sawrkar pawh he thilah hian an indawr reng a. An zinga pakhat khu chu Myanmar hian an ram mi a ni tih a pawm tawh naa, a la haw chuang lo va, amah chauh a haw kha a rem lo a ni ang e. An pariat khuan mumal lo takin an awm a, kan Police te, Home Department-in a chawm tawp mai ni tur a ni a. Khu khu engtia tih fel tur nge tih hre chiah lo mah ila, mumal deuha ngaihtuah a va tha em tih kha kan sawi tel a ni.

Tichuan, tunah kan chhak lam Myanmar-ah buaina a chhuak a, sipaiin sawrkar na a la a. Tunah hian refugee te pawh khawi khawiah emaw chuan an rawn lut tan niin ka hria a. Heng ho kan lo dawnsawnna kawngah hian kan Home Minister pawhin a rilru a sen thu a sawi a, a tha hlein ka hria a. Ka han tih rik ve hrim hrim duh erawh chu, Mizoram hi Mizote tana Siamtu in min pek a ni a, tuna rawn tlanchhe tura kan ngaih refugee-te pawh a tlangpuiin kan unaute, kan Mizo hnauthlakte an ni tlangpui dawn a. Chuvang chuan, duat takin rilru inhawng taka kan lo welcome a thain ka hria a. Ka rilru takah phei chuan Mizoram hi Mizote tana Pathian min pek a ni a, Mizoram-ah hian foreigner an awm thei hian ka hre lo va, ka ngaihtuahnaah chuan hengho hi foreigner an nilo tih kha ka sawi tel duh a ni.

Pu Dy. Speaker, Demand No. 22, Sports & Youth Services Department hian tlem ka sawi duh bawk a. Kum 2020-21-ah hian sports discipline hrang hrang 31 atan budget nuai 205 zet mai kan hmu a. Hei, kum a tawp tep tawh mai a, discipline 31 te hian tu kutah mah a la lut lova. Tunah hian discipline thenkhat nawr turin an naute pawisa puk chawp tein phaiah tirh an ni a, an mangang tak zet a, hei hi kum that hmaa kan Minister chak tak hian min tih fel sak ka beisei a. Tin, lo ti fel ta pawh ni se eng tin nge kan hman hman tawh ang financial year a tawp mai dawn a? Helai harsatna hi kan sports discipline hrang hrang te aiawhin vawiinah hian ka han sawichhuak a ni. Tichuan sports Industry-a puan a nih hnu hian sawrkarin hmalakna tur duan a nei em, budget-ah hmuh mai tur a awm si lova tih kha ka zawt a.

Ka hma lawka kan thiante pawhin an rawn sawi zel a, kan Minister hmalakna kan fak mawlh mawlh a. Ka rilru a awm erawh chu, kan hmalakna hi a chak lutuk a, nakinah maintenance-ah kan la buai hle ang tih ka hlau khawp mai tih kha ka sawi tel hram a ni e, Pu Dy. Speaker, ka lawm e.

DEPUTY SPEAKER : Aw le, a lawmawm e. Tunah chuan Member zahawm tak Pu Ramthanmawia ilo sawm ang.

PU RAMTHANMAWIA : Pu Dy. Speaker, ka lawm e. Vawiina Demand kan sawi tur hi hriat angin kan Minister zahawm tak tak pahnih Pu Robert Romawia Royte chanpual Demand No. 22 leh 43 hi support paha thil tlem tarlan ka duh a. Tin, Pu Lalchamliana, Minister zahawm tak chanpual Demand No. 16 leh 30 hi rawn sawi zawk ka duh bawk a. A pahnih hian pass pui ngei ka duh thu kha ka han sawi hmasa a ni.

Pu Deputy Speaker, kan hriat theuh angin helai House-ah ngei kan Chief Minister leh kan Home Minister pawhin a sawi chhuah tawh kan thenawm rama Myanmar unaute an buai dan khi a namai lo khawp a, tunah chuan ral beihin an inbei tawh a, civil thi pawh 60 an ni tawh a, mi 2000 lai an man tawh a ni. Sipai in thuneihna an lak dan a khi a rawva khawp mai a, chuvang chuan tun hma anga kan hriat thin ang kha ni loin tun tumah hi chuan an beih dan khi civil tan a rapthlak a ni. Hemi chungchanga kan House Leader ina he House ngeia raltn kan mi leh sa te, kan unaute an awm pawhin kan lo dawng sawng ang a, duat takin kan lo enkawl ang, ei leh in turte, chenna turte kan lo pe ang a tih khan nasa takin an thlamuanpui a, an lawm em em a, kan thisen zawmpui unaute mai nilo a Burmese ho khian kha thu te kha an lo hria a, helai rawn thleng dawn lo mahse an lo thlamuanpui a, Pu Zoramthanga hming hi facebook-ah hian en sen loh khawpin a khat a ni. Pu Zoramthanga chunga an lawmna, Mizoram sawrkar leh Mizo mipuite chunga heng ‘Kawl’ kan tih ho an lawmna facebook-ah ah hian a khat a ni. Tanpuitu an mamawh zia leh chhantu an ngaih zia tunah khian an au a ni ber mai a, sipai sawrkarin a nawm a makin tunah khian a sawisa a, an nghaisa a ni. Kan Chief Minister zahawm takin heng kan Mizo unau Myanmar-a awm te hun harsa tak tunah khian an tawng mek a, chumi atan a thlamuanna thuchah a lo sawi hi a ropui ka ti a, hei hian he Zoram chhung leh ram pawn Zofa zawng zawngte tan *Pa* nih hi a

tling chiang em em a, chu chu khawvel in tunah hian an sawi ber a ni. An mangan lai leh harsat lai bera *Pa* nih tling taka thlamuanna thuchah, an tana thu lawmawm tak mai he House zahawm taka alo au chhuak khan kan hriat angin India sawrkarin a ngaihdan a lo sawi hmain he House-ah ngei, he *Mizote Pa* ngeiin Zofate Pa nihna, Pathian leh kan ram tan tia he ram leh hnam leh he sawrkar hruai mektuin a au chhuahna hian India sawrkar pawh a sawi nghing a ni tih a chiang reng a, lo hum an phal lohna leh thawn kir an tumna pawh sut anih thu te pawh kan han hre ta zel a, heng te hian min ti thlamuang em em a ni. He Zoram hi kan ta mai nilo, ram pawnna kan mipuite Bangladesh a ni emaw, Tripura a ni emaw, Manipur a ni emaw, Myanmar a ni emaw Zo hnahlak zawng zawngte hian *Pa* a nih zia hi an lo hmuchhuak telh telh a, an lawm zia leh an thlamuan pui zia pawh hi an sawi seng lo a ni. Chungte chu vawiin ah hian thu hmaah kan sawi duh a.

Tichuan hei Demand No.23 leh 43 kha ka sawi zawk duh a. Sport leh Youth Services ah hian kan sawi nasa tawh a, tuna hmalak mekna khawthlang lam leh chhim lama an hmalaknate chu a ropui khawp mai a, ka ngaihtuah thin a, hetiang hi thil awm zen zen lo, awm ngai pawh ni a ka hriatloh sawrkar kum hnih lek kal taa hetiang khawpa thil ropui lo lang hi Pathian remruat a ni tih hi ka sawi duh a ni. Sawrkar hmasaa kan hravitate Sports Minister te kha an tha em em a, an hun laiin theiawp an chhuah a, thahnem an ngai a, an theih tawkin hma an la a, stadium tha tak tak tepawh an lo sa a, a lawmawm khawp mai. Chutiang chu tun Ministry hian chhunzawmin leh a aia nasa zawkin he kan thalai te tuihalna hriain hma a rawn la chho hi a ropui ka ti a, hei hi a Pathianthu a niin ka hria. Chuvangin, sawrkar hmasa thil tha tih chu chhunzawm zela, a thalo lai siamthata, a tha lai rawn chhunzawm zel hi he sawrkar tha, mipui sawrkarin a tih tur pawh a ni a, chutiang tur chuan a kal reng a, Pathian malsawmna pawh kan dawng zel ang tih ka ring a ni.

Khawthlang lamah leh chhim lamah chuan hmalakna hi kan hria a, khawchhak lampang hi lo la hawi chhoh hun te a la nei ang chu tiin kan lo nghakhlel khawp mai a. Kan bial Khawbung-ah RD Department-in sawrkar kal taah khan Mini Sport Complex Stadium min sak sak a, khing te khi hawn theih ni tawh se kan duh khawp mai a, khingah te khian phul lem phah te pawh a la ngai ang a. Tin, Farkawn-ah pawh phul lem phah kan hmabak a, kan beisei khawp mai a. Tin. chu mai bakah field puitlinglo kan la nei nual a, Vanzau-ah te Zawlsei-ah te pawh Sport Minister hian a ngaihna a hria a, min lo chhinchhiah sak sela. Kan bial khi infiamna, a bik takin football-ah hian kan tui em em a, Tuipuiral football tournament hi kum tam tak atang khan chawl lovin kan lo inkhel tawh thin a ni. Tuipuiral leh Tuichangral hi heng inkhelnaah hian nasa takin tan an lo la tawh thin a, an lo phur em em thin a, chuvang chuan kan bialah hian heng Sports khawthlang lam leh khawchhak leh chhim lama an Stadium ropui tak tak ang te hi kan mamawh ve ngawih ngawih a ni tih kan Minister hnenah hian kan thlen duh bawk a ni.

Tourism chungchang, Demand No. 43 hi kan sawi tawh thin a. India ramah hian ‘National Important Places’ hmun 180 vel chhinchhiah a ni a, chungah chuan ka bial a ‘Kawtchhuah ropui’ kan tih mai Vangchhia khi a tel ve tlat mai a, khi khi Tourism hawi

zawnga hma lak a tul ve tlat mai a, kan Minister zahawm tak pawhin min lo chhinchhiah sak sela. Chu mai ni lovin Khali Khawng-ah khian tunhma a kan Pi leh Pute sulhnu Tourism pawhin an en chak leh an thlir chak an rawn kalna thin te a awm a, chung te chu Minister zahawm tak pawh hian min hmuhpui nual tawh a, hengte pawh hi Covid-19 avangin hma a la theilo tih pawh kan hria a. Engpawh nisela hengah hian hma lak tur kan nei a ni tih vawiin ah hian ka sawi nawn leh duh a ni.

Tichuan, Home Department kha kan sawi nasa tawh a, kei pawh hian ka rilru a lian em em chu, Police Department hi thuam that a ngai mang e, lirthei chungchangah an pachhia tih kha a dik em em a, keini pawhin kan hria a. Tin, an quarter hi Zoram pum-ah hian a nei chhe ber pawl an ni awm mang e aw ka ti a. Chuvang chuan, Police Department quarter sak that te, lirthei ngaihtuah sak te an ngai a ni. An tangkaina ramri chungchang te pawh kan hria a, ram hrugaitu in a zir chuan sipai hi an lo huai mai a ni tih kan hotute'n an sawi kha a dik em em a ni. Ram hrugaitu in min hawipui lam lam hi sipaite leh mipuite bakah a hnathawktute kan hawina a ni. Ramri chungchangah pawh sawrkar hmasaah chuan zirlai ten Assam Police-te kutthlak an tuar a, thisen an tichhuak anih kha. Vawiinah erawh chuan sawrkar a lo inthlak a, kan hotute an huaisen avangin kut min thlak chu sawiloh, tunah chuan kan um let ta a ni; hei hi a ropui a ni. Chuvang chuan ram hrugaitu hi an pawimawh a ni tih vawiin ah hian ka sawi duh a.

Tichuan Home Department, Police te hi duat an ngai a, Covid-19 dona kawngah pawh hma an la chak em em a, hma an la nasa a, ramri duty-ah tan a ngai a, Mizoram hmun hrang hrangah an duty a, chhun zan zawmin kan ram a him theih nan an duty a, chutiang chuan tan an la a ni tih kan hria a. Chuvang chuan Home department hi nasa taka thuam chak a ngai a ni tih ka sawi duh a ni.

Demand No. 30, Disaster Management & Rehabilitation-ah hian Pu Deputy Speaker, ka bialah chuan lir a nghing a..... (*Dy. SPEAKER : Ngawi lawk rawh aw, hei kan hun a tawp a, kan sawi zawh tir mai dawn em ni? Aw, i sawi zawh phal a nih chu.*) Ka lawm e. Ka bial khi kan vanduai kan ti dawn nge ni lir a nghing a nghing mai a, vawi za chuang kan tawng a ni. Chungah chuanin kan Minister hian thil tul leh pawimawh te a rawn tir chho zung zung a, kan mamawh tur silpouline te, tin khi laia duty tur mi chi hrang hrang a rawn tir chho a. Chung chuan khilaia kan mipuite an thla a muang em em a ni. Tin, heng hmunah ngei hian kan Minister-te leh MLA ten an rawn tlawh a, kan mamawhte a hmunah min rawn tihsak a, eng kan mamawh te min pe a, sum leh pait leh thil tul mamawhte a hmunah ngei min rawn pe a, min rawn hmuhpui a; ka bial mipuite thlabar hnem turin kan Minister leh MLA lo kal zawng zawngte chungah lawmthu kan sawi tak meuh meuh ani. Vawiinah pawh hian lirnghing hi a la reh chiah lova, amaherawhchu, nasa lo te hian a nghing a, eng chen nge, engnge awm zel dawn tih chu kan hre lova, kan thin erawh chu a phu dep dep a ni. Engpawh nise Pathianin min veng a, chhiat leh zualna thleng lovin, tumah thi awm lovin vawiin min hrugaitu a. Pathianin min hum a, lawmawm kan ti a. Ka bialah khian harsatna kan tawhin kan Chief Minister zahawm tak bakah Minister zawng zawngin kan mamawh

leh tul te rang taka min tihsak thin avangin vawiinah hian lawmthu a tharin kan sawi leh mawlh mawlh a ni.

Awle, Pu Deputy Speaker, khang kan sawi Pu Robert Romawia leh Pu Lalchamliana te pahnih demand hi pass pui ngei tulin ka hria a, ka rawn thlawp a ni e, ka lawm e.

DEPUTY SPEAKER : Awle, a lawmawm e. Tunah chuan kan chhun chawlh a lo hun leh ta a, kan chawl hrih ang a, chawhnu dar 2:00 PM ah rorel kan tan leh dawn nia.

2:00 P.M.

SPEAKER : Tunge sawi leh ang le? Member zahawm tak Pu Zothantluanga i lo sawm ang.

PU ZOTHANTLUANGA : Pu Speaker, ka lawm e. Vawiinah Demand paruk lai sawi tur kan nei a. Kan Minister zahawm tak tak Pu Lalchamliana leh Pu Robert Romawia Royte-te Demand sawi huna sawi thei tura ka awm hi ka lawm khawp mai. A hmasa berah chuan Demand No. 22, Sports & Youth Services hi sawi hmasa ila.

Ni e, sports hi a pawimawh khawp mai a, Mizoram-a kan thalaite sports discipline hrang hrang ngaih pawimawha a awm leh India ramah pawh sports person kan han produce chho hi a ropui a, a lawmawm a. Tin, tun budget-ah hian Sports bikah tam lo mahse Sports Minister rem hre tak kan nei a, central lamah project-te siama, chak taka um chhuak leh mai thin anih avangin he budget-ah hian tam lo mahsela ropui takin kan kal chho leh ang tih ka ring a ni.

Kan budget chhung lovah pawh hmasawnna tam tak kan hmu tawh a. Hmannia kan sawi tawh ang khan project tam tak, infrastructure lian pui pui lung phum tawh a ni a. Tin, tunah pawh hian karleh maiah chuan lung phum tur kan la nei chho leh zel dawn a ni tih kan han hriat hian a lawmawmin ka hria a.

Hmanniah khan kan Deputy Chief Minister, UD & PA Minister Demand kan sawi niah khan ka lo sawi tel lova, amaherawhchu, sports concern tho a nih avangin vawiinah hian sawi ka duh a. Ka bial Tuivamit-ah khuan football stadium Smart City hnuai atangin min buatsaih sak a, tunah hian thawh theihin peih tep a lo ni hi a ropui ka ti a. Tin, Industrial Growth Centre-ah khuan Smart City sum bawkin Music City Programme min buatsaih sak dawn bawk a, infrastructure tha tak tak min buatsaih sak hi a ropui ka ti a. Sports-ah hian Aizawl khawpui chhung bikah chuan keini hi potential nei tha kan ni a, develop tur hmun tam tak kan nei a, tam tak sawi tur a awm a. Chutih rual chuan, a bik taka ka sawi duh chu, Phunchawng khu zu zawrhna ringawt emaw kan ti mai thei a mahse kan thalaite'n sports an ngaina a, sports-a hmasawn an duh avangin khawtlang khuan thalaite hamthatna tur atan

ram zau tha tak, project lian pui, infrastructure ropui tak din theihna tur, gravitation hmang a tui lakna tur hmun an nei a, ₹19,00,000.00 laiin khawtlangin, sawrkar emaw MLA fund emaw tel miah lova an lei hmun kan nei a ni. Khungte khu kan Sports Minister khan min lo chhinchhiah sak se la. Aizawl khawpui chhung atanga hnaite, kan thalaite'n sport-a hma an lak theihna tur, an infiamna tur hmun atan a remchang tak kan nei a ni tih ka sawi duh a. Chu chu sports chungchang a ka sawi duh a ni a.

Demand No. 43, Tourism chungchangah hian pandemic avangin hna kan thawk thei lova, amaherawhchu, a awm reng dawn lova, a zagh hun a awm mai turah beisei ila. Mizoram chu kan hriat theuh angin ram nuam, ram ralmuang, India ram khawpui leh ram dangte anga plain ni lo, tlang ram kan nih avangin plain mite pawh an lo zinna tur kan ni a. Tourism-ah hian hmasawnna tam tak nei thei kan nih laiin kan sawrkar hmasa hunah khan entirnan ka bial chhung bik Zonuam-ah khuan Holiday Home kan nei a, a building chu a rei tawh a, renovate a ngai a mahse ‘privatized’ an ti a, mimalin an han enkawl daih mai te, siamthata tourist-te tan pawha tangkai tak, Aizawl khawpui laili ang reng ni si nimahsela hmun thengthaw leh fianrial tha tak kan nei a. Sairang-ah pawh khuan kan lo inbuatsaik lawk a ngai ang reng khawp mai. Tourist Lodge kan nei thin a mahse chu pawh chu privatised bawk a ni a. Railway-in hna an thawk mek a, Sairang-ah khuan rail station lian tak mai a awm dawn a ni tih kan hre theuh a, chung hunah chuan mikhual tlenna tur khulaiah khuan a awm lova. Chuvang chuan, tourist tam tak kan neih theihna hmun tur privatized a ni hi a pawi ka ti a. Sawrkar-in ngaihtuaha vawiin atang a department-te pawhin hnathawktu indaiah lohnate, mithiam leh Tourist Lodge enkawl kawnga degree tha tak tak nei tamtak kan awm a ni. Chuvangin heng mimal ina an lo lak hote hi sawrkarin a ngaihtuah thata tha taka enkawl chhoh atan a itawm ka ti a, chungte chu kan sawi lang duh bawk a ni.

Tin, Demand No. 48, Information & Communication Technology chungchangah hian han sawi leh ka duh a. Hei, tunlai khawvelah Information Technology a sang ram apiang te hi ‘ram changkang’ kan ti mai a, tunlai kan thalaite pawh hemi tello in an awm theilo a, an khawsa theilo a. Chuvang chuan hmasawnna an duh a, kan thalai te an inzarpharh theihna tur atan chuan Information Technology Department leh IT-a kan sana hma kan lak tam deuh deuh hi a tul in a pawimawh em em a, chu chu kan sawi tel duh bawk a. Tin, nikumah khan hemi Department atang hian ka biala High School pakhatah computer Set 7 min pe a, kumin ah chu chu CH. Chhunga High School-ah khan kan han pe a, an lawm em em a, an tan pawh a tangkai a, kuminah Tanhril-ah set 7 bawk min pe dawn niin ka hria a, a lawmawm hle a ni. Zau zawka a aia nasa a kan tihttheih zel a duhawm hle in ka hria.

Tin, Home chungchang hi han sawi leh ila. Vawiinah hian kan ram himna te, law & order-a kan fel leh thatna tur chu Police Department kan tih len a pawimawh a. Hei, officer chu kan nei teuh mai a, a lianah Mizo te pawh kan nei a, Mizo Officer tha tak tak kan neih rualin a *top* tura hi kan neilo chho dawnin a lang a, thalaite an inbuatsaik a, tha hle in ka hria. Chutih rual chuan kan hriat angin Police Department-ah hian post hnawh khah ngai 3,000 vel kan nei a ni. Chuvang chuan Constable mai nilo, ruihlo a kan thalai tam tak te an

buai lai hian Pu Speaker, thalai fel tak tak, fit tak tak leh lehkha thiam Constable-ah pawh lut se tha taka hman theih tur kan nei teuhin ka hria a, kan mamawh te hi a tahtawla han hnawhkhah chhoh chu a chakawm hlein ka hria. Chuvang chuan sipai hotu an awm chuan sipai an awm a ngai a, sipai hotute kut leh ke tak tak chu sipai Constable te kha an ni.

Inter-state buai te kan nei fo a, khangah khan force hi battalion riat (8) kan nei a, an numberah an kim lo nasa tawh em em a ni, Pu Speaker. Chuvangin kan thalaite hi employment a ni bawk a, kan ram tan law & order chungchanga kan mamawhte an nih avangin Home Minister leh kan Chief Minister te pawhina theih ang anga Police kan lak hi a pawimawh hle in ka hria a, chu chu ka sawi tel duh bawk a ni.

Tin, Home hnuiah hian jail kan nei a, ka bialah khuan Central Jail a awm a, tang tamtak an awm reng a, kan jail te pawh hi thawm that a ngai tawh hle a ni. Misual hremma ringawt ni lova kan jail tang te'n a an in siamthat theihna tur hmun atan leh nun kawng tha an zawh theihna tur hmun atana kan siam a pawimawhin ka hria a ni. Tum 2 ka tlawh tawh a, Home Minister pawhin an tlawh tawh a, Aizawl-a kan jail pawimawh ber te pawh enkawla renovate a ngai hle a ni tih ka sawi duh bawk a.

A tawp berah chuan Demand No. 10, Disaster Management & Rehabilitation-ah hian point khat lek kan sawi ang e. Kan ram chu tlang ram a ni a, siam chawp te, kan siam chawp loh te disaster kan thleng reng mai a ni a, a bik takin ka bial Sairang-ah te chuan thal laia tui tereuhte fur apianga tui lian kumtin mai hian tui tla hi kan awm emaw tih tur khawpin kan buai a ni. Chuvang chuan, hetah hian sawrkarin min ngaihpawimawh saka Disaster Management atangin NEC-ah shelter te kan mamawh a, ramhnuai a rem chang changah silpaulin te kan zar a, ruah sur hnuiah leh zan thim hnuiah tlawmngaite kal khawm shelter te kan nei theilo hi a hrehawm kan tih em em thin lain tunah hian nuai 115 man Sairang-ah Shelter House min han sak sak tur hi a lawmawm ka ti em a, chu chu vawiinah hian House-a sawi rik ve hrim hrim ka duh a ni. Pu Speaker, ka lawm e.

SPEAKER : Awle, a tirah sawi tur an awmloh avangin quorum pawh kan form hman lo lek lek kha a ni a, ani kha ka han pe thui deuh a ni. Tunge sawi leh ang? Aw, Dr. Vanlaltanpuia, Member zahawm tak ka sawm e.

DR. VANLALTANPUIA : Pu Speaker, ka lawm e. Vawiinah hian kan Minister zahawm tak tak pahnih Pu Robert Romawia Royte leh Pu Lalchamliana te Demand sawi a nih hi a lawmawm ka ti em em a. A hmasa berin Sports & Youth Services, Demand No. 22 hian bul han tan ila.

Lawmthu sawi tur a tam hle mai a, he department atang hian kan Minister hian I-League Football-ah a thawh hlawk em em mai a, Aizawl Football Club-ah te pawh. Tin, tunhnai-ah WBC Title Fight-ah thil mak tak mai, khawvel Champion nihna min rawn pe a,

kan lawm em em a. Sports industry-a puan te leh infrastructure engemaw zat mai lungphum a ni te hi a lawmawm ka ti a.

Tin, Lunglei khawpui atan bik te pawh han sawi ila, hmasawnna tam tak tunhnaiah kan puang a, Pu Speaker, PMJVVK cover area kan ni ve ta lo emaw ni kan ti hman deuh hlek a, mahse hei tunhnaiah hian a rawn chhuak a, Serhuan leh Zotlang Basketball Court tur te, Kulikawn Court tur te a lo awm ve nual mai a kan lawm viau a, kut kan beng thei ta a ni. Amaherawhchu, hemi bakah hian a lian hmundangah te pawh min la ngaihtuhsak se tih ka duh a. Vawiin Demand sawi nia ka sawi duh chu, Mizoram Tennis Association lam atangin Nghaltan Zau-ah khuan Tennis Association-in Complex tha deuh mai pawisa tam takin kan lei a, DPR-te pawh kan siam a, kan Minister zahawm tak hi kan hmuh tawh a. Kan hriat angin National Games thleng tur pawhin Complex anga kan neih a pawimawh em em a, discipline hrang hrangte pawh hi. Tennis chuan Complex tha tak mai khulaiah khuan kan nei dawn a, chungte chu khawngaihtakin min ngaihtuhsak se kan duh hle mai. Champhai Court leh a vel te extension tur tamtak a awm a, chutiangin Serchhip lam te pawh. Chuvangin, Tennis fraternity ten hei hi kan han ngen duh bawk a, Legislator Tennis fraternity ka nihna angin Lawn Tennis lam hi tlemin min ngaihsak se tih hi vawiinah hian ka han thlen duh a ni.

Tin, State Games, 2019 kan neih zawh takah khan ka bial atangin Best Athlete, Women kha kan hawn a ni. Ellision-i kan ti a, Serkawn nula a ni a, a kal chhunzawm zelna tur hi min ngaihtuah chhunzawm sak thei se tih ka sawi duh a, kei pawhin Manipur-a trial a han neihte khan Thlawhna chuan man te ka tumsak a, ka han tir chho a, Manipur Champion-te pawh khan an um pha lo fe a ni. Tin, Lallianzuala Chhangte, ISL player tha lutuk, Chennayan-a khel mek hi ka bial, Zohnuai tlangval a ni a. Zohnuai hian khelmuual an nei lo reng reng mai a, hengte hi min ngaihpawimawh sak se ka duh khawp mai a, he House-ah pawh hian ka sawi ve zauh zauh tawh bawk a. Khilai Lunglei chheh vel Sabargram area hoah hian ram kan nei tha em em mai tih te pawh hi Pu Speaker, kan Minister hi ka hrilh duh a, Pukpui-ah duh ang tawka ram zau pek tur pawh kan nei a ni. Zotlangah hian khelmuual a thar pakhat ka laihsak tawh a, khelmuual hlui zawk pawh kha Complex-a develop tur pawhin ala awm tam hle tih pawh ka sawi tel duh a ni.

Tourism, Demand No. 43 hi sawi leh zawk ka duh a. ‘Tourism’ tih kan sawi hian ka ngaihpawimawh em em pakhat chu Local Tourism promotion hi a ni. Pawn lam atangin kan ram chheteah hian (mawi lo ni lo se la) an lo kal hum hum dawn lo. Thailand ramah te, kan sawi angin an ni chuan ‘Sabai Dee Ka’ (chibai) an lo tih chuan an nunphungah hian mi hi an welcome em em mai a. Kan ram conservative takah hi chuan pawn lam tourist hi an lokal dur durin ka ring lo. Chuvangin, Local Tourism hi promote ila tih hi ka sawi duh a, Chhimpa hi hmarah zin ila, Hmarpa hi chhimah chutiangin. Keipawh khilai Dungtlang area vela ‘Lianchhiari Lunglen Tlang’ tih te khi zep loah chuan vawikhat chiah ka la kal a ni. Mi hi kan zin tlem em em mai a kan ramah hian, Local Tourism promotion tha ka ti tihna hi ka sawi duh a.

Tin, Pangzawl, In 600 khuaah hian khawngaihtakin kan Minister-in min lo chhinchhiah sak se la, National Highway 64 laihin Tourist Lodge min tihchhiatsak vek a, chuvangin, Pangzawl-ah hian Tourist Lodge kan nei ta lova. Bialtu MLA tan pawh bial fan pawhin thlenna kan nei dawn ta lo tih te kha min lo hriatsak se ka duh a ni.

Tin, Demand No. 48, Information & Communication Technology-ah hian lawmawm ka ti a. Hman nia Zawhna leh Chhanna hunah khan sawisual ka nei a, ICT in project lian kan lak ho- SWAN, SDC, e-District,CDC, SSDC leh e-Bharat kan tih hote kha an lo zo deuh vek tawh zawk a. Amaherawhchu, ka ngaihpawimawh em em ka rawn sawi ang khan Mizoram e-Government Society leh ICT te hi bifurcate ni hram se, hei hi khawngaihtakin hma min laksak se, a function tur ang takin project te pawh khawvel changkannain e-Government slum-ah kan lut a, e-Bharat te, e-District kan tih te pawh a lo ni chho zel a, chuvangin, bifurcation tih ni thei se ka duh a ni.

Tin, thil pakhat, Member tam tak pawh khan an sawi a, mobile tower chungchang hi. Tunhnaia research tam takah chuan mobile tower hian radiation a pekchhuah tam lutuk avangin leh heng laia kan hman ho hi a changkan tawk loh avangin a hnaiha awm hote cancer vei an tam tih ang chi te, eng eng emaw hi a tam riau mai a. Chuvangin, hei hi Telecom Regulatory Authority of India (TRAI) hote nen pawh mumal zawk a sawihoa, kan tower-te pawh hi enchiangin ICT lam pawhin hma min laksak turin ka duh bawk a ni.

Tin, Demand No. 30, Disaster Management & Rehabilitation hi ka han sawi leh zawk ang a. Niminah Zawhna leh Chhanna hunah kan Minister zahawm takin Zotlang leimin nasa lutuk chhanna tur project tunah hian min theh thlak sak a ni tih ka hria a, ka lawm em em a ni. DM&R hi kan hmang tangkai a, Mualthuam North-a lei tla min dawlsakna te leh hmun hrang hrangah tun hnaia ka bial In kang hote, hmanni khan Vawk 30 rual a kanghlum a, chungte pawh chu rehabilitation min pe tha hle a, lawmthu ka sawi duh a. Zotlang bika hi khawngaihtakin Disaster Mitigation Fund atang pawhin a project loah pawh tun hnaiah kan sum neih ang angin, Gabion wall te, kawng bula retaining wall zawng zawng a rawn nam chhe vek a, chungte chu min siam sak thei se ka duh em em a ni.

Demand No. 8, Taxation-ah hian ka lut leh lawk ang a. Bible tawngkam takin, ‘Zakaia Department’ a ni a hei hi, a tangkai em em mai a, sawrkar innghahna pawh a ni a. GST danah hian kan hriat angin tunah hian gate neihte pawh a rem tawh lo chung chungin Vairengte-ah pawh Data Entry Point siamin tunhnaiah kuhva tawlh, illegal trade te pawh kan hmu a. Amaherawhchu, Sorkarin hma kan lo sawn theihna atan tiin a theih ang angin kan Minister hovin an lo khawn ve hram hram te pawh hi lawmawm ka ti a. Chuvang chuan, he Department hi thuamchak zel nise tih ka sawi duh a.

Tin, ka ngaihpawimawh em em pakhat chu, he House-ah hian ka sawi thin a, ka sawi zel dawn a, milian leh mite ten ram kan neih dan inthlau lutuk venna tur Land Ceiling System hi siam vat ni se tih hi ka sawi duh a, ka sawi zel ang a Session leh hunah pawh. A

awlsam ber nia ka hriat chu progressive tax engemaw hi la ila, ram nei tam deuh te hian an enkawl theih loh chu burden-a siam tur hian tax lak dan system hi siam ila tih hi ka duh khawp mai. Ram enkawl loh tam lutuk te enkawl tihaustak tur hian progressive tax siam ni se tih ka rawt duh a ni.

A tawp berah chuan, Home Department, Demand No. 16-ah hian sawi loh theih loh ka nei a, Pu Speaker. Kan hriat angin Home Department tun ramri buaiah a che tha em em mai a, kan force hote, kan armed force hote an huaisen a. Kan Chief Minister huaisen tak hi en ang a ni lova, a luhlul em em mai a, kan Home Minister pawh mi huaisen tak a ni a, rambuai lai phei chuan an chanchin hi an sawi a, a keah an kap nge ni, harsatna a tawk a, Bangladesh thlengin a bai thla a ni tih te ka lo hria a, mi huaisen takin Home Department a han enkawl a, a department che tha viauin ka hria a. Ka sawi duh tak chu, Lunglei Ramthar Veng a Fire Station hi September Ni 4, 2020 khan a chhiat lutuk tawh avangin an insawn a, Saikuti Hall hnuaih tunah hian an awm mai mai a ni tih kha min hriat sak se la, a theih angin Fire Station hi min siam sak se la tih hi ka han sawi duh a.

Tin, Police Officer thenkhat hnen atanga ka dawn angin, Pu Speaker, drug trafficking danna atana check point an sawi chu Tarpho leh Khawhri bawrah drug trafficking kal thin hi danna point pawimawh tak a awm a, Pu Thangtea bial a ni a, hei hi min hriatsak se tih hi chhim lamin kan a ni.

Heng kan Minister zahawm tak tak ten vawiina Demand an rawn put luh hi a tha ka ti a, ‘he House hian pass pui ngei ang u’ tiin ka rawn thlawp a ni e. Ka lawm e.

SPEAKER : Member zahawm tak Er. H. Lalzirliana ilo sawm ang.

ER. H. LALZIRLIANA : Pu Speaker, ka lawm e. Vawiinah Minister zahawm tak takte pahnih Demand sawi theia ka awm hi ka lawm hle a, hun min pek avangin lawmthu ka hrilh a che.

Kan senior Pu Chama chan hi han sawi hmasak ka duh a, Demand No. 8, Taxation hi *revenue earner* department a nih avangin sawi hma pawh a phuin ka hria a. Governor speech-ah pawh highlight a ni a, tun kum financial year, November thleng khan ₹37,071.2 lakh revenue a earn a ni. Chuvang chuan, he Department hi lian lo mahse a contribution hi Mizoram mipuite tan a hlu hle a ni tih kha ka sawi duh a. A bik takin kan Minister pawh hi lawmthu hrilh duh ka nei a. Mamit-ah Taxation Deptt-in hmunhma a la nei lova, ani hmalakna zarah tunah hian District Taxation Office sak mek a ni a, nasa takin hma pawh a sawn a, hun reilo teah fel mai tura ruahman a ni a, a lawmawm hle a ni.

Khutilai Tripura leh Mizoram inrina ‘Zomuan Tlang’ kan tiyah khuan Khanapara ang deuh khu a ni a, a dinglam Assam, a veilam Meghalaya tih ang deuh khan khulaiah pawh khuan kawng khu an inrina a ni mai a, lehlam Mizoram, lehlam Tripura a ni. Covid-

19 chhoh lai vel pawh khan harsatna kan tawk a nih kha, IR pahnih ten an tuar a, chutiang chuan kan Home Department a che tha hle a, IR full strength dah a ni a, an thlamuan pui khawp mai a, chumi hnua chuan engmah issue a awm leh ta lova. Tunhnai maiah hian khuti lai Zomuan tlang, Mizoram luhna Khantlang panna-ah khuan gate a awm a, Tripura Forest Department-in check gate siam a tum a, amaherawhchu khu laia mizo awmte leh kan Home Department hmalakna te pawh a ni ang chu, kan dodal a, chutiang chuan vawiinah thulh leh rihin a awm a, heti lai hi thuamthat deuh chu a pawimawh khawp mai a. Khuti laiah khuan Police Outpost awm thei se chuan a duhawm khawp mai a, kan inri dan khu in encroach awl tak anih avang khuan ral khata inenkwawl chu a harsa deuh mai thei, khatiang issue neuh neuh kha a awm ve a ni tih kha min han hriatpui se la ka ti a.

Tin, DIG Western Range hi western area tan khuan siam ve te hi a rem lawm ni tih te ka sawi lang duh a. Eastern Range a awm a, Southern Range a awm a, Northern Range pawh a awm niin ka hria a, Western Range chiah hi kan la nei lova, IR-ah khuan Commandant kan nei a, DF ah khuan SP kan nei a, khuti lai khu kan hriat angin buai neuh neuh, ramri hnai Tripura leh Assam border area kan ni a, tun issue-ah te pawh khan a buaithlak khawp mai a, control kha a harsa angreng viau a ni. DIG Western Range te awm ve se chuan khata tang khan control mumal tak neiin a awm ve thei dawn a ni tih te ka sawi lang duh a.

Tin, lawmthu bawk, Police Station kan dil a Lengpui-ah, chu chu min phal sak a, engemaw neuh neuh hmun hma velah tih fel tur a tam avangin tunah hian a la function chiah lova, inluah tur chu thlan fel a ni tawhin ka hria a, hei hi chak zawka function theih dan tur ruahmanna min siampui theih chuan kan lawm hle ang tih kha ka sawi duh a.

Tin, District Jail Mamit hi kan Minister nen pawh hian kan tlawh tawh a, chhawmdawl an ngai khawp mai tih kha min lo hriat sak sela.

Tin, Sports lam hi ka han sawi leh zung zung ang a. Vawiina kan Budget pharh hi a tlem hle mai a, a hma pawh kha a tlem tawh kan ti a, a hma aiin a la tlem zui leh nghal a, a changtu Minister hi a khawngaihthlak angreng khawp mai a, football/volleyball 10 vel tal MLA tinte bial fana paipawn tur min han paina turte belh sak theih ni se la tih kha Pu Speaker, ka han dil pui deuh a. ‘A tlem, a tlem’ kan ti a, a tawpah, ‘a va tam em em ve’ kan ti leh ang tih erawh chu ka hlau deuh a. Kan Chief Minister leh kan Minister chak tak remhriatna zarah central atangin sum tam tak kan hmu a, chung chu a malsawmna dawngtute zingah kan han tel ve a, kan lawm hle a, cheng 42,000 lakh central atanga kan hnuhchhuah a ni a. Hei kan puin a sawi thin a, ‘a chi tur’ kan han tih kha Mamit-ah khuan multi-purpose indoor stadium 12 crores vela sak tur kan nei a, kha kha central lam khan a chi atan min lo pawmpui hlauh mai a, 10%-ah khan. Kha khan hrinchhuah tam tak a nei a, sawng Lunglei leh Lawngtlai a mi Sports Minister-in a ruahmanna zawng saw a hrinchhuah a ni tih kha ka sawi hrim hrim duh a ni; a zar in lo zo ve a nih chu Lawngtlai lam te pawh khan. Tichuan he infrastructure atana sum kan hmuhi a hlawkna em em chu, GST 6%, 2,500

lakhs chuang hi kan hmu dawn a, hemi sum atang hian. Tin, Labour cess 400 lakhs dawn hi Mizoram sawrkarin a dawng dawn bawk a ni.

Tin, lawmthu ka han sawi duh bawk chu, a hmingin Mizoram Volleyball Association-ah President ka ni a, hmanni lawkah pawh Dy. CM bialah District Tournament kan han nei a, a pui hle a. Ground thar an lo nei a, a district pumin an lo phur a ni. Chutah chuan tournament te kan han nei a, tunah hian Volleyball Association te hian pro-league te kan ti a, Club ten hmun dang atangin players te pawh an lei ve a ni. Chungah chuan khelhna mumal kan nei lova hmun hranah kan ti a, dil a ngai a, kan buai em em laiin kan Sports Minister chak tak hian Mizoram Volleyball Association bikte tan Indoor Stadium sakna tur hma min han lak sak a, a ropui kan ti a lawmthu kan sawi a ni.

Tin, infrastructure din chungchangah hian pawimawh deuh mai chu, MSSC hi tunah construction agency a ni a, hei hian sport infrastructure hi an specialized na a ni, heng infrastructure kan han hmuh din tura kan han tih hrang hrangte hi PMJVVK hnuia kan han tih kan hmuh theihna chhan chu MSSC kuta engkim a awm vang a ni a. *Khelo India* leh PMJVVK hnuia kan hmuh te pawh hi hengte vang hi a ni a, chuvang chuan a construction-ah hian tam tak chuan PWD tih tir mai awm a ni an ti a. Amaherawhchu hei hi construction ti tura agency department in a kan neih leh specialized department a ni tih kha ka han sawi duh a ni. Tin, heng infrastructure hi kan neih chuan thil tam tak, mi tam tak tan eizawnna *chana ro zawrh* eizawnna thlengin a awm dawn a ni tih kha mipui tan hriat a pawimawh a ni.

Tin, hei *Swadesh Darshan* Scheme hnuiah hian niin ka hria a, Rawpuichhip-ah Eco-tourism buatsaik a ni a, tunah khuan hna a chawl thup mai a engvang nge ka hre lova. Khunte klu chhunzawm leh vat tumna a awm em tih te ka zawt tel duh a. Tin, pahnihna ah chuan, min lo chhinchhiah sak se ka duh a; Lengpui-a Tourism hmalakna kha engvanga chhunzawm loh nge a nih tih kha. Hmannia kan va en leh chuan a hmaa ban lo ding ve thiу theu te pawh a lo bo leh vek tawh a ni, Ministry hmasaa Lengpui tana an lo tih kha. Tin, Rajiv Nagar-ah khuan Tourist Lodge sak ve a ni a, hei hi eng scheme atanga sak nge tih leh staff dah theih dan a awm em? Hetah hian chowkidar pawh a awm lova, a ding ve ringawt mai a, han thlenna kan neih ve chhun a ni a, kan han thleng a, mahniin engkim, thingpui pawh pawn atangin, bathroom lo tifai rawh u ti a hrilh lawk sa a ngai a, chutiang a nih loh chuan thlen tlak a ni lo a ni. Tunah khuan a building sak thar ministry hmasa tawp lama commission mai kha tunah hian a rawih leh hle tawh a, hengte hi min lo hriatsak se ka duh bawk a.

Tin, Damparengpui khu Bru khawlian ber a ni a, in 1000 dawn awmna a ni, thlenna tur pakhatmah a awm lova mi inah kan thleng a, chutiang chuan a remchan dan ang angin kan inhnawh thin a ni. Hengte hi hmalak dan a awm em tih kha min han react theih chuan ka lawm hle ang.

Vawiina Demand kan han sawi ho, Pu Robert Romawia Royte leh Pu Lalchamliana chante hi ka thlawp a, Member zawng zawnge pawhin thlawp turin ka sawm a ni. Ka lawm e.

SPEAKER : Member zahawm tak Pu Nihar Kanti Chakma ilo sawm ang.

PU NIHAR KANTI CHAKMA: Pu Speaker, ka lawm e. Hei vawiinah Minister zahawm tak pahnih Demand kan sawi ho mek a. A hmasa berin Demand No. 16, Home Department chungchang hi Pu Speaker, sawi ka duh a.

Home Minister hi a fel a, a department chante pawh a enkawl tha a, tun thlengin problem lian tham pawh ala thleng lo a, a lawmawm ka ti a ni. Pu Speaker, hmanni Zawhna leh Chhanna hunah te pawh Home Minister zahawm takin Indo-Bangladesh border fencing chungchang a sawi kan hria a. Indo-Bangladesh border fencing chungchang hi Session apiangin ka sawi ve thin a, mite pawhin min ning ve palh thei a. Amaherawhchu Pu Speaker, hemi Indo-Bangladesh Border Fencing vangin harsatna hrang hrang kan tawk thin a ni. Tuna kan Home Minister hi Speaker anih lai 2005 atanga Indo-Bangladesh border fencing hna hi tan a ni tawh a. Khami hunlai khan keini hi hetiang dinhmunah kan ding dawn a ni tih kan ngaihtuah miah lova. Tunah fencing hi 90% bawr vel an sa zo tawh a ni a, sak zawh hnuah harsatna hrang hrang kan tawk a ni.

Pu Speaker, tuna mi project amount te pawh hi a lian a, a hmaa estimate chu 656 crore a ni a, tunah phei chuan revised a ni tawh a, 1,000 aia tamin. A tum ber chu Internal Security leh Construction of Physical Barrier of 336.60 kms a ni a. Hemi fencing sak dan hi a mak khawp mai a, kan sawi fo thin a. Keini Mizoram hi Bangladesh nena kan ramri hi 318 kms a ni a, guideline-a a lan dan chuan 0 point atangin 150 yards fencing an hung tur a ni a, hemi huam chhungah hian ka bial chhunga khua zawng zawng a awm a, ram nasa takin a tichhia a. Tuna problem lian tak pakhat kan neih chu Pu Speaker, hmannah Home Minister zahawm takin a sawfiah a, hei hi central sawrkar thil a ni a, State-in thuneihna lutuk kan nei lo a ni a ti a, a dikna lai a awm ve tho laiin, state sawrkar hian tam tak enge emaw chen chu min tanpui thei a, hetianga kut sil ringawt hi chu a tih chi em ni, kan ram khawih thil a ni hei hi. Tunah pawh la final a nih theih chiah lohna chhan pakhat chu, veng hrang hrang an bifurcate a, thenkhat India ram pawn lamah, thenkhat India ram chhungah a awm a ni. Tunah pawh sawi ta ila khang khaw thenkhat pawn lama a awm kha kan phal em? Phal nilo ta se a chhung khawi laiah nge kan dah ang, hei hi resettlement package-in min ngaihtuah sak thei em? Chubakah, hei, report-a a lan dan chuan fencing pawnah Mamit District-ah khaw 10 lai a awm a, Lawngtlai ah khaw 29, Lunglei District keima bial telin khaw 18 a ni bawk a. Covid vangin hmannah kan buai nasa a ni a gate zawng zawng an khar vek a, farm land-a kal pawh phal a ni lova, mi eizawnna a tibuai a, hemi avang hian problem tam tak kan nei a ni.

Pu Speaker, Minister min chhan atan ka zawh leh duh pakhat chu, leivung pailhna hmun tur siam a ni tih a ni a, mahse leivung pailhna hmun hi hmuh tur a awm miah lo a, an duh duhna laiah an paih thin a, leilet tam tak an tichhia a hmun hrang hrangah, mahse compensation pawh pek a ni lova. Hetianga mi eizawnna tihchhiat ringawt hi a pawi hle a, chuvangin Mizoram sawrkar hian ngun takin a ngaihtuah a ngai a. Han chhut ta ila, 150x360 yrds hi pawnlamah kan paih a ni. He thilah hian central sawrkar hi tha taka kan dawr a ngai a ni. He hna zawng zawng hi national corporation a ni a, an liam em em a, mahse social responsibility hnuiah ka bial chhungah engmah thawh a ni ve lo a ni.

Hei, tukin tv news-ah ka hmu a, lawmawm ka ti hle a, Delhi-ah free dialysis hospital social responsibility hnuiah din a ni a. Mizoramah pawh hetiang zat pawisa dah ni ve mahse engmah tihsak kan ni ve lova a pawi ka ti, Pu Speaker. Tichuan, Pu Speaker, nangmah kaltlanga vawiinah kan Home Minister zahawm ka ngen duh chu, ama office-ah pawh min koin, he problem solve-na tur discuss ho ila, hetiang ringawt hi chuan a develop theihloh a ni. Entirnan sawrkar asset hrang hrang field te, huan leh leilet te tuilianin a tichhe thin a, Tlabung-ah paw hetiang flood kan tawrhna chhan ber chu, ka hriatsual loh chuan leivung duh duh duhnaah an paih vang a ni. Khawthlang Tuipui-ah leivung an paih khan ruah alo surin flood leh soil erosion a thlen ta thin a ni. Chuvangin fencing hna hian problem tam tak a thlen a, hengah hian kan Minister zahawm tak hian hma min laksak thei se ka duh khawp mai.

Hei, Assembly Report-ah te pawh thehluh a ni a, chiang deuhin a awm a, hmanniah pawh kan sawichhuak a, Pu Speaker, i phalna in tawite ka han chhiar ang a. "Due to Indo-Bangladesh border fencing many agricultural lands were destroyed causing water logging problem". Hetiang avang hian tlema ruah a sur chuan leilet tamtak a chim zel a, problem tam takin an nei phah a, "communication problem and even livelihood problem" a ti bawk a. Pu Speaker, compensation pawh tunthlengin an la pe lo a, engkim land acquisition pawh tih vek tawh a ni a, mahse tun thlengin engmah an la pe lo a ni. Hei hi a pawi ka ti a, chuvangin Home Minister zahawm takin min lo ngaihtuah sak se ka duh khawp mai a.

Demand No. 48, Information & Communication Technology ah hian, Pu Speaker, a changtu Minister zahawm tak hian a department hnuiah ka bialah Tipunagar High School ah computer thar min pek avangin lawmthu ka sawi duh bawk ani. Ka lawm e.

SPEAKER : Member zahawm tak Pu Lawmawma Tochhawng ka sawm e.

PU LAWMAWMA TOCHHAWNG: Pu Speaker, ka lawm e. Kan Minister zahawm takte pahnih, Pu Lalchamliana leh Pu Robert Romawia Royte te enkawl department pawimawh tak tak kan han sawiho leh tur hi a lawmawm ka ti a. A vaia rawn sawi hi ka chak nain ka ngaihpawimawh zual pahnih chauh han thlurbing ka tum dawn a. Demand No.

22 leh Demand No. 16, Sports & Youth Services leh Home Department te thlurbing ka han tum deuh dawn a ni.

Pu Speaker, Demand No. 16 atang hian han tan ila. Khawvel khawi hmun pawh, eng ram pawh hi a nuam em, chen nan a itawm em tih chhanna pakhatah chuan, a ram a ralmuang em, a chhunga chengte an him em tih hi ani fo thin a. Ram hausa leh intodelh fu fu, ram nuam a chhiar tlak loh a awm nual a ni. A chhunga chengte an thlamuan loh chuan, an him loh chuan ram nuama chhiar theih a ni lova. Tin, ram chu a ralmuan dawn chuan venghimtu tur tha tawk an awm a ngai ang a, venghimtu tur tha tawk leh chak tawk awm tur chuan thawktu thahnem tak, rikrum thilah pawh che chhuak ham ham thei mamawh a lo ni leh ang a. Mihring lam thahnem viau mahsela, hmanrua kha a chaurau leh viau si chuan han chet vak thei a ni dawn lova. Chuvang chuan thawktu thahnem, hmanrua pawh thahnem, a changkang kan mamawh dawn tihna a ni. Chumi a nih loh chuan thawktu awm tlur mahsela hmanrua an hum kha a chhiat viau si chuan hman tlak loh tak tak a awm thei dawn tihna a ni. Tin Sarih hmun lo veng tur hian choka chemte hi hum ta i la, tam tak thar chhuah kha a huphur awm ngawt ang.

Chutiang chu a nih avangin Pu Speaker, kan Mizoram Police dinhmun pawh hi nguntaka kan ngaiantuah pui a ngaiin ka hria a. Kan Mizoram police te hi tun dinhmunah hian an chhuanawm thlawt in ka hria a, tun hnai ramri buai thil thlengah te, krismas leh kumthar vuakvetah te, an mahni avanga ram leh hnam mipui thlamunga kan awm hi an inpekna thawhrim rah a ni a tih loh theih lo a. District hrang hrangah indaihlohma avangin an awm tur ang zat post hnawhkhah loh a tam mai a, chuti chung chuan an mawhpurhna hlen kawngah hian an ti tha thlawt a ni ti ila kan sawi sual tam loin ka ring a. Hmanrua te hi khawvel ram changkangte neih ang la nei lo mahsela, state dang tena an neih ang em a tha kan nei lo chung pawhin, an hmang tangkai thlawtin ka hria a, an chhuanawm tak zet a ni.

Tunah hian ka hriatsual loh chuan Police hmun ruak hi 3,000 chuang zet a awmin ka hria a. Hetiang zat zat a ruak chung pawha, an thawh tur ang ang an la thawk zel thei hi chu faktlak an ni a. Heti zat hi engatinge a ruah huai mai le tih zawhna hi, chhanna tam tak awm thei zingah hian pension leh bang eng emaw zat awm bawk mahsela, kum 2010-2018 inkara Zu zawrh vangliah khan boral an tam lutuk vang niin a lang a, a pawi tak zet zet he thil hi. Pu Speaker, Lunglei, Aizawl khawpui dawttu saw, tunah hian Lunglei DEF ah sanction strength saw 329 a nih laiin thawktu 192 chauh an awm a, post ruak hnawhkhah loh saw 137 zet a awm a ni. Tin, DIG Southern Range, MNF sorkar hmasa a hun tawp tepea dah te pawh saw, kan han ruahman te kha hei kum 12 zet a lo ral ta a. Tunthleng hian office leh residence nei loin a la awm a, a mawhpurna a lianin a zau si a, Addl.SP quarter hlui cheithatah khawsak tir mai mai a ni a. Ruahmanna tha zawk neih sak a tul ngang mai a, kan Minister te pawn min lo hriatsak se la ka duh khawp a ni.

Aizawl khawpui tihloah chuan Lunglei saw motor chetvel tamna ber a ni a, lirthei pung zelah traffic problem lian tak kan lo nei chho ta a. He traffic problem enkawl tur hian

Lunglei Police Stationin MRP, MRHG (Homeguard) kan tih atangte, 2nd Battallion atang tein an pawt khawm a, theih tawp an chhuah mek a. Traffic branch hran hawna tih changtlung ni thei se la, mamawhna a sang thlawt a, ruahmanna min siam sak thei sela ka duh em em a ni.

Lunglei Police Station hi a zau hle mai a, hmun kilkhawr tak tak vil ngai a awm teuh mai a. Tlabung international boundary thuitak khawthlang Tuipui dung te, Thorang biala Bunghmun kawng chhe tak tak te a huam a. Buaina leh harsatna a lo awmin han chetvelna tur motor an nei chau em em mai si a. Dan leh hrai lek kawhna kawngah harsatna an tawk fo thin. Covid-19 hri avangin sum indaih lohna a nasa hle tih kan hria a, inthlahrung tak chungin helama kan harsatna hi hma min laksak hram se ka ti hle mai. Haulawng Police Outpost din tura hmalak mek pawh saw tih puitlin han ni sela, Lunglei hmar lampang saw thuitak chu a thlamuan phahin a cover thei bawk dawn a ni.

Pu Speaker, nichin lawkah pawh an rawn sawi tawh , khawpui him leh him loh tehna pakhatah chuan Fire & Emergency Service chung changah, Lunglei Fire Station Ni 9.5.1974-ah Sub-Station mimal In luah a ni a. Ni 4.6.1977-ah khan mimal In chhungkua luah tura sak chu lei a ni a, Fire Department tan hian. A sak dan phung leh a hmanrua te a that tawk loh avanga tlu mai thei dinhmunha a din tak avangin luah zui zel ngam a ni ta lova. Saikuti Hall-a thawktute sownchhuah an nih phah ta a ni. Chhiatrupna thleng thei anih avangin he building hi thiah tura order chhuah a ni tawh a, ruahmanna a kal mek a. Kangmei leh chhiatrupna thleng theiah Lunglei Fire Station saw thawmthat leh tih changtlun ngai em em a ni. Tin, Driver an nei tlat lo mai a, police driver pakhat an pawt chawp a. Tin, Fireman pahnih saw emergency-a motor khalh phalna pek an ni ringawt bawk a ni. Chutiang dinhmunah chuan an ding a, khawngaih thlak tak an ni a. Kan Fire Department te dinhmun duhthusam loh avangin Lunglei khawpui thla a muang tawk lo a, ruahmanna kal mek awm anih bawk avangin khawngaih takin kan Minister zahawm tak hian kan harsatna min hriastsakin min lo react sela ka duhin ka ngen bawk a ni.

Pu Speaker, Sports chungchang, Dedmand 22 han sawi leh lawk ka duh a. Sport lam hi hmanni khan resolution-ah lawmthu sawina kan nei nual tawh a. Sawi tur tamtak awm mahsela kan sawi tam tawh lo mai ang a. Chuti chung chuan, he department lian lo taka ngaihin, kan ram a thalai leh infiam mite tana he sawrkar, Chief Minister zahawmtak kaihruaina hnuiaia Sport Minister leh a department thawhchhuah leh an tihsak hi lawmthu sawi nawn loh theih loh niin ka hria a ni. Nimin lawka boxing khawvel a Mizo tlangval a ber ni tura chherchhuak tute kha, direct emaw indirect in emaw an mahni hi an ni a. Football-ah phei chuan India ram huap inelna lianah leh club hrang hranga Mizo footballers thawn chuak a, hlawh tam tham tak neia, inchhungkhur leh khawtlang ram tana pawisa rawn thawn let thin tu chu he Department kutchhuak te hi an ni teuh mai a ni. Hockey leh contact sports dang dangah te pawh sulhnu an ngah a, medal engemawzat ram tihmingtha turin hnam chawimawi turin an rawn ak haw tawh thin a nih kha.

Pu Speaker, keini Lunglei lam tan pawh kut benna tur kan Minister zahawmtak hian department dangte nen tang rualin min tih sak a, a hlutna tangka ang zawnga chhut phei chuan a nuaia nuai, nuai sing chuang tum khata Lungleia Sport hamsawnna tum khata tangka lut hnem ber a la ni hial a ni. Football khelhna tur te, Futsal khelhna tur te leh Academy, Sports School changtlung tak turte bul tan mek a ni a, Sports Complex leh Hockey khelmual turte ruahman mek a ni a. Chutiang ruahmanna lian tak tak karah chuan football ground-a phul lem phah thar leh tur te, chungte avang chuan Lunglei thalai, infiam mite kan phurin chonaah kan ngai a. Infiam mite kan lawm tak zet zet a ni tih kha ka han sawi duh a.

Chutih lai chuan Pu Speaker, Lunglei SAI Center electric venga mi saw infiam mi, India-ah pawh lang tham enge maw zat lo chher chhuak tawhtu a ni a, MNF sawrkar hmasaa din tan kha a ni a, tunah sawn a mual hmar lam saw a min huam mai a, thawm that a ngai a, tangkai zawka hman a tul ngang mai. Hman deuhah kan Minister zahawm tak hian min hmuh pui tawh kha, min lo hriat sak sela kan duh hle a ni. Tin, Thuamluaia Mual, sawrkar hmasa hmalakna avanga Lungleia puipun awm apianga hman thina phul lem phah saw tunah chuan a lo hlui ta a, thlakte pawh a lo ngai ta a. Saw saw Minister zahawm tak hian min lo hriat sak sela a lawmawm khawp ang.

A tawp berah chuan Lena stadium chungchang, sawrkar hmasain hma a lo lak, kan Deputy Chief Minister leh Sport Minister-hoa hawn tawh saw siam zawh a ni a. Siam a nih chhan ang taka hman thuai thuai ni se, kan nghakhlel a ni. Saw Stadium saw *a bilha tho lo* niin a lang a, a tling tawk lo tih te, ram inpek leh lei thuah te, sak zawh hnua tunge mawhphurtu ni ang tih chungchangah te, khatiang thil kha ziaka fel taka dah a awmloh avangin tunah sawn eng emaw neuh neuh lian tham vak lo buaina a awm a. Hman hleih theih loin a la awm tlat mai saw pawi kan ti hle mai a, chinfel thuai ni sela a duhawm hle a ni. Kan Minister, kan department ten kan harsatna min sut kiang sak turin theihtawp min chhuah sak se tiin kan sawmin kan ngen a ni.

Tichuan Pu Speaker, heng Demand-te Pu Robert Romawia Royte Demand No. 22, 43, 48 leh Pu Lal Chamliana Minister zahawm tak Demand No. 8, 16 leh 30 te hi lungrial taka pass turin ka thlawp tih ka rawn sawi a ni e. Ka lawm e.

SPEAKER : Member zahawm tak Pu C.Lalsawivunga ka sawm e.

PU C. LALSAWIVUNGA : Pu Speaker, ka lawm e. Vawiinah kan Minister zahawm tak takte Pu Lalchamliana leh Pu Robert Romawia Royte-te Demand kan sawiho a ni a. Mimal ve ve hian an chungah lawmthu ka sawi a. Demand sawi kan nih avangin lawmthu sawi duhna leh sawi chak tam tak nei mahila kha kha lawmthu sawinaah min lo pawmsak hram se.

A hmasa bera ka sawi duh chu Demand No. 22, Sports & Youth Services Department-ah hian han lu ila, ka biala veng hrang hrang Sport lama hma kan sawnna atana

tih hlawhtlin tura kan Minister-in a sawi thinte kha min theihngihlh sak lo se tih kha a hmasa berah ka sawi duh a. Tin, PMJVK chungchang hi han sawi ve hrim hrim thanin ka hria a. Allocation of Business Rules-ah hian District Council leh Minority Affairs hi Home Department hnuaih a awm a, Sport lamin an kutken ta daih mai hi han sawi lan ve hrim hrim hi thanin ka hria a ni.

Tin, Sports hian Social Welfare leh UD&PA, Aizawl Smart City leh SEDP atangin sum tam tham tak an tham khawm a. Keini ang state capital expenditure awm mumal lohna, sum duh ang hman tur nei lo state-ah sum tam tak sport lama an luan khawm tir hi Department lehlam changtu Minister-te tan pawh a tlawm tlak lek lek em aw tih hi ka ngaihtuahnaah a awm a ni.

Demand No. 43, Tourism-ah hian han lut leh ila. Tourism-ah hian hmathlir kan nei tha kan ti a, mahse, kumina kan Budget atang hi chuan Tourism Industry din tur leh hmasawn tur hian beisei tur awm loin ka hria a ni. Demand No.48, ICT-ah hian, electronic khawvelah kan cheng kan ti a, a dik a. Amaherawhchu, kumina kan Budget han en hian IT infrastructure development atan nuai 4 chauh dah a ni a. Chuvangin ICT-a hmasawn tur chuan hmachhawp, beisei tur a awm hran lo a ni.

Demand No. 8, Taxation-ah hian han lut ila. Kan ram sum dinhmun thlirin kan intodelh ve theihna tur own tax revenue leh non-own tax revenue atan hian hmasawn kan mamawh a ni tih a lang a. Kan GSDP a pung tual tual a, heta tanga own tax revenue share kan neih hi a hniam tial tial thung a ni. Kan sum dinhmun tehna ber fiscal indicator-ah kum 2018-2019 GSDP atanga chhiah kan lak own tax hi 3.27% niin, kum 2019-2020-ah 2.76 % -in a tla hniam a. Kum 2020-2021-ah 2.09% niin kumin Budget Estimate-ah kan state thawh chhuah pumpui atanga 1.89% chauh kan la khawm dawn niin a lang a. Chuvangin kan state inngahahna sum thawk chhuaktu ber Taxation Department hi tihchak, thuam chak a ngai hle a ni tih ka sawi duh a ni.

Tin, Demand No. 30, Disaster Management & Rehabilitation Department-ah hian han sawi tur teh chiam ka nei lo a, budget-ah khan chiang takin SDRF-ah pawisa kan neih dan a lang a. Amaherawhchu, ka sawi duh chu kan Minister zahawm tak khan, ‘silpouline man to deuh deuhin kan lei deuh reng mai a, hei hi min ngaihtuah pui thei a ngem’ a tih kha he Demand atang hian ka sawi duh a ni.

Demand No. 16, Home Department-ah hian han lut leh nghal ila. A hmasa bera ka tarlan duh chu Dungtlang Police station, East Tuipui Constituency-ah leh Farkawn Police Beat Post khi thuam that a ngai khawp mai a, building leh security fencing te mumal taka siam a ngai a. Police tam zawk dahte pawh an mamawh hle a, motor tha zawkte pawh pek theih nise tih kha ka sawi duh bawk a.

A dang lehah chuan, Inner Line permit-atan porter thar hman niin ka lo hria a, khawngaihtakin kan Minister hian a kalmang tlangpui min hrilhfiah theih se. Tin, Inner Line guideline thar siam a awm tawh em, tun dinhmunah valid ILP nei eng zat nge kan ramah hian awm tihte kha min react theih chuan a lawmawm ngawt ang.

Kan hria a, kawng chhawngte kan buaipui em em a, traffic jam awm lohna khawpui tih te kan hriat dan a ni a, kan ngaithla zing em em a. Amaherawhchu, tun thleng hian Aizawl khawpui leh Lunglei, Champhai leh district khawpuiin kan problem hi chu traffic jam hi a ni. Traffic jam hi kan problem a la ni reng mai a, heng kan thu ngaihthlakte hi a tak hmuh a chakawm tawh khawp mai a, hmalakna tal hi hmuh a chakawm em em a ni. Aizawl khawpui dinhmun chu sawi ngai loin kan hre vek a, motor nawlpui intlan chhawk te, taxi leh two-wheeler taxi intlan chhawk te vawiin thlengin kan la kalpui a, a bikin taxi leh two-wheeler taxi khalhtute phei chu an khawngaihthlak em em a ni. Laon an la a, an neih ang chhun chhunin sum an tuak a, hetia intlan chhawk a lo nih hian an sum lak luh, an loan rulhnaah harsatna an tawk a, nitin ei leh inah pawh harsatna an tawk a ni. Chuvangin traffic jam awm lohna khawpua ka chantir thuai thuai hi a nghahhlelhawm hle a ni.

Tin, Pu Speaker, ramri chungchang hi tawi tein han sawi ka duh a. Ramri buai a lo awm hian keini Mizoram hian buaina kan siam hmasa ngai lo a, Assam lam atangin a lo chhuak thin a ni. Chutah chuan a tuar hmasatu leh hnuhnung bertu pawh ramri hrula khaw hrang hranga awmte khu an ni a. A hmatawngah hian an tang lo thei lo a, an tang thin a ni. Chuvangin Assam-Mizoram ramri hrula cheng khaw hrang hranga mi zawng zawngte chungah vawiin hian lawmthu ka sawi a. Sawrkar angin theihtawpin hmalak a ni a, a lawmawm ka ti a lawmthu ka sawi a. Amaherawhchu, ramri chungchangah hian hriatchian tur kan neiin ka hria a ni. Eng nge kan dinhmun dik tak, Cabinet meeting-in 1875-ah ‘hei hi Assam-Mizoram ramri a ni’ tiin pawm a lo ni tawh a. Chutah chuan khawi chin khu nge kan ramri, khawi chin khu nge kan humhalh tur tih vawiin thlenga kan la hre theilo erawh hi chu tan kan lakna tur leh kan ram tan, kan hnam tan nasa zual zawka tan kan lakna tur niin ka hria. Chuvangin ramri hrula chengte, khaw hrang hranga awm te tih hmasawn an tul a, kan Police duty te an fakawm em em a, kan chhuang a ni. Mahse, thu maia pun khawmna hmunah te an chungah lawmthu kan sawi ringawt hi a tawk lo a, tak takin lawmthu kan sawina hi kan police-te hian an dawng tur a ni tih hi vawiin hian ka sawi duh a.

Pu Speaker, khawngaihin, a tlang ka kawm dawn tawh e. Ramri-ah buainate a lo chhuahin buaina rawn siamtute hian min hmusit em em reng te hi a tlawm thlak hle a ni. Hei hi eng vang nge tih chuan, vawiin thleng hian ei leh barah kan la intodelh loh a, sum leh paiah pawh kan intodelh hek lo a, chuvang chuan engahmah min ngai lo a ni. Kan mamawh zawng zawng hi an hnen atanga kan lak luh a ni tih hi an hre chiang em em a. Pu Speaker, vawiin hian kan sawrkar pawh hian ei leh bar leh sum leh paiah kan intodelhna turin leilung hausakna Pathianin min pekte hi a taka kan hai chhuah a ngai tawh a ni. Sum leh pai, pawisa central atanga kan hmuhte hi mahnia thawk chhuak thei tur zawng, pawisa revenue earn

zawnga kan hman hi a hun tawh a ni tih hi Pu Speaker, ka sawi belh hram duh a ni e. Ka lawm e.

SPEAKER : Member zahawm tak Pu Lalrindika Ralte ka sawm e.

PU LALRINDIKA RALTE : Pu Speaker, ka lawm e. Demand No. 22, Sports & Youth Services Department atang hian ka tan ang a. Kan Minister hi kan hriat angin Minister chak tak a ni a, kan bial lamah pawh hma an rawn la dawn a, lung pawh an rawn phum tawh a, kan lawm khawp mai a. Chutih rual erawh chuan, ‘ani hi a bial a sAWN dawn, helamah hian a rawn tla thla dawn a ni ang’ an ti a, kan mi leh sate chu an lo zam ru khawp mai a. Amaherawhchu, ka thlamuan a, Davida leh Goliatha inbei ang deuh khan keini-te chu virvawm kan nei alawm ka ti a, ka lo tawng thlamuan a ni. Kan nguai em mai a, kha kha thuhmaah ka sawi hmasa a ni, Pu Speaker.

Ka sawi duh chu, football hi Mizo hian kan tuiin kan uar a. Tin, sawrkar pawhin tunhma atangin football hi a buaipui nasa a. Ka rilruah chuan football hi, professional Football-te pawh kan hria a, a kalphungte pawh kan hre vek a, Mizo chuan. Mi ramah chuan kum 18, 19, 20 vel an nih hian ei tlak tak a nih theih a, keini Mizo hnam angah erawh hi chuan kum 18, 20 bawr velah emaw football atanga sum hailuh teuh chu a harsatna lai a awm ve a. Entirnan London, UK-ah te chuan an va inkhelh khan hausakna nasa tak an earn thei a ni tih kan hria a, amaherawhchu chutiang chu kan ni ve lo tih kha kan hriat a thain ka hria a.

Kan uar zawng ai mahin kan theih zawng zawn chhuah hi a pawimawhin ka hria a. Tunhma khan India ramah pawh Talent Contest/Talent Search te an nei thin a, tunah pawh an la kalpui reng in ka ring a. Chutiang deuh chuan Mizoram-ah pawh hian kan theih zawng, kan mil zawng te pawh zawn a ngaihna chin te pawh a awm a. Entirnan, basketball-ah te hian kan physique atang hrim hrim hian khawvel huap turin kan tih ve chi a ni ang em tih te pawh kan ngaihtuah a thain ka hria a ni. (*Dy. Speaker-in Chair a la.*) Sawi tak ang khan Mizote ina kan theih zawng leh kan thiam ve ang zawng zawn chhuah hi a pawimawhin ka hria a. Physical ngai vak lo, entirnan diving, Japan leh Korea te an pumruain a mil ve deuhah te chuan khawvelah an tha em em a ni. Technical-in ka hre chiah lova, heng ang te pawh hi kan inzawn chhuah ve te pawh a tha em tih te rilruah a awm a. A nihna takah chuan diving ah te chuan a training a hautak nge chu kan hre lo nachungin kan tih ve theih tak tur te pawh a nih ka ring a. Chungte pawh chu kan ngaihtuah a thain ka hria a.

Tin, pakhat lehah chuan Marathon, thuizawng tlan kan han tih ang chi hi kan hnam tan hian khawvelah pawh kan lan ve theihna tur kawng niin ka hria a. A chhan chu kan ram leilung hi chutiang practice nan chuan a rem em em a, heng ang te pawh hi kan zawn chhuah a thain ka hria a. Khawvelah pawh marathonah hi chuan ram rethei te te Kenya te, en reng reng pawha fip tang mai ang chi kha khawvel huapah pawh an rawn lang thin a. Chuvang chuan heng kawng te pawh hi kan zawn a thain ka hria a. Tin, boxing te pawh hi *weight* a

ni a, kan theih zawng leh thiam zawng te pawh a ni tih kan hre tawh a. Heng pawh hi tun aia changtlung zawk leh a ril zawk deuh hlek a kan buaipui chhoh te pawh a tha em tih te kha ka rilruah a awm a.

Tin, a tawpah chuan badminton hi ka thiam ve zawng a nih vang ni lovin, khawvela No. 1 nih te chu a physical vak lo a, keini ang tiat pui hi khawvelah a champion theih a ni. Tin, national level-ah kan champion hian khawvelah champion thei deuhthaw kan ni. Badminton-ah hian India mi hi khawvelah pawh No. 1 an ni ve fo tih kan hria a. Badminton bik phei hi chu a inchhawp hnai pawhin ka hria a, keini tan phei hi chuan. India ramah kan lan chuan khawvelah kan lang nghal deuhthaw a ni tih kan hriat a thain ka hria a. Chuvang chuan badminton hi sum invest nan a tha lawm ni tih te ka rilruah a awm a. Chu chu ka han sawi tel duh a ni.

Demand No. 30, DM&R-ah hian rilrua lo lang nghal chu, lirnghing kan hria a. Mizoram kan awmna hmun hi lirnghing natna hmun ber a ni an ti thin a. Hemi kawngah hian ka rilru a awm chu Mock Drill te kan ti thin a, a tha tho a. Amaherawhchu, hetiang lo deuh hian awareness hi kan neih nasat a thain ka hria a. Mega-quake te hi lo thleng ta se engtin nge kan awm ang tih te, a hun a hriatloh a, chi-aina hrim hrim pawh hi, building te chhe rem rum lo mahse. Entirnan, bazar hmunah te ni se, building chhe lo mahse mipui chinain mi inchilhlum te pawh a thleng thei a ni. Chuvang chuan rilrua ka ngaih pawimawh zawk chu awareness campaign tha tak neia kan thanlen pui hi a ngaih ka hria a. Tumah a hrampaa zirtir ngai lovin kan thanlen pui a, awareness kan nei that a thain ka hria a. Naupangte pawh hian kan thanlen pui hi a thain ka hria a; chu chu lirnghing tamna ramah te pawh an tihdan a ni. Japan ramah te pawh lirnghing a tam a, naupangte pawh ni se lir a rawn nghing tawh chuan an tihtur leh tih loh tur kha khawi hmunah pawh awm se an hre nghal mai a ni, chi-ai lovin. Chu chu a pawimawhin ka hria a, kan sawrkar hian chutiang zawng chuan ngaihtuahna te pawh pu thei se ka duh khawp mai.

Demand No. 16, Home Department-a sawi duh ka neih chu, traffic jam kan hria a, traffic jam avangin kan intlanchhawk a, a thawl deuh a ni mai thei. Amaherawhchu keima ngaihdanah chuan, motor chhuak a tlem chuan a thawl ang chu, kha chu thil chiang sa a ni a, chu ai chuan a management hi kan ennawn a thain ka hria a. Tin, a lehlamah chua fair lo ka tih chu, miin motor a lei a, motor a lei chhan chu hman tangkai atan a ni, chet velna atana lei kan ni. ‘Vawiin i tlan ni a ni lo’ tih reng mai te hi a fair lo angreng hi ka ti khawp mai a, awlsamna tur atana motor lei ni si, ‘tlan ni, tlan ni lo’ tih reng te hi a buaithlakin ka hria a. Chu ai chuan a management hi kan ngaih pawimawh a thain ka hria a ni.

Tin, strict tak hian kal ila, hei tunah pawh Session lai hian an strict deuh a, traffic jam a awm tlem deuh a ni. Chuvang chuan hei hi chuti zawng chuan kan ngaihtuah a thain ka hria a. Motor chhuah tlem chuan traffic jam kha a tlem dawn a ni tih kha chu hriatsa a, chu chu ka han sawi tel duh a ni.

Tin, a tawpah chuan, Home-a hian ka ngaih pawimawh em em ka bialin kan thlir reng, kan beiseina vawiin thlenga nung reng chu, 4th IR Battalion Headquarters hi a ni. Rengdil-ah khuan a hmun tur te pawh en fel vek a ni tawh a, mimal ten an ram an pe a, kan lo thlir ve reng a. Vawiinah hian 4th IR Battalion Headquarters hi min tihhlawhtlin saka, a rang lama hma min lak sak turin kan duh a, Minister hi ka ngen duh bawk a ni. A lungphum hi 2013 khan phum tawh a ni a, tuna kan Deputy Chief Minister ten tunhmaa hma an lo lakna kalchho zel kha a ni a. Hei hi kan lo nghak ve reng a, kan beiseina hi min ti khawtlai sak rei tawh a, kan rilru a na khawp mai a. Tin, ‘advanced headquarters’ tih hi kan hre ngai lem lo a, a definition hi eng tiat nge a nih, eng nge awm tur tih leh eng nge awm lo tur tihte pawh min han hrilhfiah sak se a thain ka hria a. Amaherawhchu, kan nghah leh kan beisei chu advanced headquarter hi a ni lo tih min hriatsak pawh ka duh a. Khulaiah khuan rilru na tak, beiseina nei chung siin kan awm reng a, sawrkar hian a ti tak tak dawn lo anih phei chuan thudik min hrilh se la tih hi vawiin niah hian ka sawi duh a. Thudik mipuite hian kan hriat a pawimawhin ka hria a, rilru na takin beisei siin kan awm reng a, khu khu khawngaih takin min hriatsak a, sawkar pawhin ruahmannna lo kal chho tawh ang khan min tihhlawhtlinsak ngei turin ka han ngenin ka sawm duh bawk a ni. Pu Dy. Speaker, ka lawm e.

DEPUTY SPEAKER : Awle, tunah chuan Member zahawm tak Pu C. Lalmuanpuia ka sawm ang a, a sawi zawh hian Dr. Vanlalthlana, Member zahawm tak a lo inring dawn nia.

PU C. LALMUANPUIA : Pu Dy. Speaker, ka lawm e. Vawiinah kan Minister zahawm tak takte pahnih Pu Lalchamliana leh Pu Robert Romawia Royte te Demand sawi theia ka awm hi ka lawm hle a, Pathian hnenah lawmthu ka sawi a ni. Sawi tur a tam dawn khawp mai a amaherawhchu, a vaiin ka sawi hman lo a nih pawhin tawi te tea han sawi ka tum ang a.

Demand No. 22, Sports & Youth Services atang hian ka tan ang a. Kan Minister zahawm tak leh chak tak mai kan nei a. Pu Zoramthanga kaihhruai kan Chief Minister zahawm tak kaihhruai sawrkar thar a lo ding a, sports lamah hmasawnna thar kan han hmu a, sport policy-te kan han nei nghal ngawt mai te hi a lawmawm hlein ka hria a, a hmasa kan han ni thei te hi a chhuanawm hlein ka hria a, sawi tur tam tak a awmin ka hria a. Chu mai a la ni lo a, India ramah a hmasa ber atan infiammite tan Sports Industry-a puan niin infiam mite tan hmabak eng tak kan han chhawpchuak thei te hi a ropui ka ti khawp mai.

Sports lamah hian tan lakna tur tam tak la awm mah sela, heng a kalkawng, a policy mumal takte kan neia, Industry-ah te kan han puan chhohah hian infiammite hmakhua a eng em em mai a. Kan hmalam hun lo kal turah hian hlawhtlinna engin min hmuak ngei niin ka hre tlat a ni. Pu Dy. Speaker, chu mai a la ni lo a, kan sawrkar rei lote chhungin Mizoram State Games kan han nei theite kha a lawmawm ka ti khawp mai a. Infiam mite khatah khan

an rawn thangharh a, kan ramah eng an rawn hmu a. Nikum kalta chhung 2020 kha Covid-in min han tibuai lo se la chu han chhunzawm leh te pawh a chakawm em em a ni.

Tunhnai lawkah infiam mite tana thil lawmawm tak a rawn thleng leh a, WBC title fight-te kan han hmu a, a lawmawm khawp mai a. Kan Speaker hoin kan Minister zahawm takte leh kan MLA zahawm tak tak ten kan infiam mi titha tak tak, Sangtea leh a thiante sum fai khati zat mai an han pe te, an han lawmpui te kha a lawmawm khawp mai a. An in sensona kha a thlawn dawn lo a ni. Cash incentive kan han pe chho a, kum kal ta 2018-2019 chhung pawh khan Jeremy Lalrinnunga Weight Lifter, Youth Olympic Games Gold Medal dawngtu pawh kha kan sawkar hian nuai 15 zet a pe te kha ka sawi nawn lo thei lo a ni.

Chutiang bawk chuan kawng hrang hrangin tanpuinate pawh lo pek an ni tawh a. Tin, Hockey player Lalremsiami chu Asia Games, Youth Olympic Games-ah khan Silver Medal a dawn avangin nuai 10 pek a lo ni tawh te kha kan infiammite tan a belhfakawm hlein ka hria a, a lawmawm ka ti khawp mai. Kawng hrang hrangin Sports-ah hian hmasawnna kan hmu a.

Tin, ka fak duh pakhat chu Boxing chungchang nichina ka rawn sawiah khan han let leh ila. Boxing hi Mizo-ten kan theihna tak niin ka hria a, LPS Vision-ten Pro-fight hmang tein an han promote a. Tun hnaiah pawh kha WBC title te pawh an han thleng leh te kha an chhuanawm ka ti a, he House zahawm tak kaltlang hian LPS Vision chungah pawh lawmthu kan sawi tel duh a ni. Kawng hrang hrangin hmalakna, Khelo India-ah te pawh sum tam tak hmuh a ni a. Anmahni kaltlang hian nuai 2,743 zet hmuh a ni a. Tin, State Fund atang leh kawng hrang hrangin hmuh a ni te hi a lawmawm ka ti khawp mai. A vai chuan kan sawi seng lo ang a.

Tin, Aizawl Smart City hnuiah Sports Infrastructure atana hmalakna nuai 9,801 zet mai a awm te, ka bial chhung Edenthar-ah pawh field kan nei ve dawn a, phul lem te kan phah ve dawn a ni. Hetiang hmalakna a awm hi Pu Dy. Speaker, lawmawm ka ti a, kan bial pawh kan lawm em em a, he House kaltlang hian bial aiawh pawhin lawmthu ka sawi leh bawk a ni. Kawng hrang hrang PMJKVY te, State Fund atang te leh Article 275 atang te, Aizawl Smart City, UD&PA-a kan sum hmuh te pawh hi a lo thahnem hle mai a, nuai 60,998.89 zet mai a ni a, a thlamuan tlak hle a ni. Sawi tur a tam khawp mai a, Sports lam chu kan duh tawk ang a.

Tourism lamah ka kal leh ang a. Tourism Department an thawk tha a, amaherawhchu Covid avangin hmasawnna kal lai a tawp thup a, duh angin kal thei lo mahse an hmalaknate a tha thawkhat hle mai. Minister zahawm tak hian min lo chhinchhiah sak se tih ka nei a, ka sawi sei hman dawn si lo va. Ropeway chungchang Durtlang atanga Aizawl lam lo kal tur kha, Member zahawm tak Pu Zodintluanga khan a zawt a, unstarred Question-ah a chhanna ka lo hmu a. Ropeway chungchanga hmalakna mumal la awm si lo khan sum te pawh released tawh a ni a tih te, kha kha eng nge a harsat tih te, High Power Line tih te kha a ni

a. A hma khan khalai kha an hmu lawk lo em ni tih te, enga tinge thil kal lai hi hmalakna tur hmuw awm mumal si loin a zuzi mai dawn em ni tih te kha kan Minister zahawm takin min react theih chuan a lawmawm ngawt ang.

Tin, Information & Communication Technology, Demand No. 48 hi a pawimawh khawp mai a. Tunlaiah chuan mobile phone te Zokhua te ber thlengin communication a tan kan mamawh tawh a, zirna a tan pawh te pawh naupangte'n an mamawh tawh a. Tunlai Covid 19 hri leng karah phei chuan online class an kal a, an buai em em a ni. He mi chungchangah hian tower te neih tumin, signal tha neih tumin hma lak a ni te hi a lawmawm ka ti khawp mai a, an chungah lawmthu kan sawi duh a. Amaherawhchu thil pakhat, heng tower te hian radiation a pe chhuak nasa a, chu chuan cancer a siam thei a ni tih lai erawh hi chu tlem a han ennawna enzui deuh a tha ka ti a. An power pek chhuah kha a turu nge, khalai kha a checkna a awm em ka hre lo va. Kan in bul Chanmari West-ah pawh sawn tower pakhat a awm a, MZU atanga research scholar pakhat a lokal a, ka thisen te pawh ka test tir a ni. Kha an research beihna kha han chhutzui chi a ni em, power a pek chhuah kha a sang nge a hniam, eng zata pek chhuah tur nge tih lai kha lo enzui theih nise. Mihringte tana hlauhawm chin aia sang an lo pe chhuak em tih erawh kha chu lo enzui theih ni se la a lawmawm ngawt ang.

Tichuan, Demand No. 8 hi, Taxation a ti tha hle mai a, kan Governor Speech-ah pawh khan a lo lang a. He Mizoram tana a hnathawh rah kan hmu a, kan sum hnar pawimawh tak ani a, an chungah lawmthu ka sawiduh a ni.

Tin, Demand No. 16, Home Department hi an ti tha em em a. Kan hriat theuh angin Covid 19 hri leng karah pawh hemi State leh Inter-State kan ramri-ah te an duty tha em em a, an huaisen em em a. Tin, nikum October vela tang khan ramri buai te pawh kan nei a, chungah te pawh chuan an huaisen zia a takin ka hmu a. An tawrhchel zia te, tih tak taka hna an thawh zia te ka hmu ve a, Thinghlun leh Vairengte-ah pawh khan ka zuk kal a. Highway leh Inter-State Highway kawng te dan pin an ni rap rap a, khanga an hmalakna te, a hmatawng tu ber annihna te kha kan han hmu chiang em em a. An huaisenna leh an thawhrimna, a hun taka an chetna rah vawiinah a lo lang a. Kan nitin mamawh, chi hrang hrang a han tawp rup mai kha chu kan buai tlang a nih kha. Engpawh nise thuam chak an ngai a ni. Member zahawm tak tak te khan an rawn sawi tawh a, post ruak hnawhkhah tur a tam khawp mai a. Covid hian min tibuai lo se chu kan CM zahawm tak leh a changtu Minister te nen hian ruahmannan an siam ru ni khan ka hria a. Amaherawhchu kan tum lawk loh leh kan beisei lawk loh Covid in min tibuai tak avang hian kan duh angin hmalakna a kal hlei thei lo erawh hi chu a pawi ka ti khawp mai a. Amaherawhchu anni hi thuam chak an ngai a ni tih kha kan sawiduh a ni.

Demand No. 30, Disaster Management & Rehabilitation hi a pawimawh khawp mai a, kan bialah pawh kan tibuai nasa khawp mai a. Hunthar Veng leimin ka sawi lo thei lo a, kan lifeline a ni a. Kawng engkimah kan han tibuai nasa khawp mai a, kan Chief Minister,

kan Home Minister zahawm tak te leh Department hmalaknain khulai kawng leimin khu Disaster atangin min han buaipui a, tunah pawh khuan hmalakna kal mek a ni. Eng tikah emaw chuan khulai kawng min te pawh khu kan control ve theih pawh kan beisei a. Amaherawhchu a damna tak chu Pathian thu thu a ni a. Leilung hnuai a chet miau chuan harsatna lian zawk te a thleng a. Amaherawhchu kha leh chen enkawl loh leh hmalak loha a awm kha tunah chuan CM zahawm tak Pu Zoramthanga kaihhruaina hnuaih hmalak a ni a, theihtawp kan han chhuah a, a lawmawm ka ti a. Tin, hmun hrang hrangah pawh hmalakna a awm a, House zahawm tak kaltlang hian lawmthu kan sawiduh a ni e.

A tawp berah chuan vawiina Minister zahawm tak tak pahnih te Demand kan han sawi tak te kha he House zahawm tak hian pass ila tiin ka rawn thlawp a ni e. Ka lawm e.

DEPUTY SPEAKER : Aw le, a lawmawm e. Tunah chuan Member zahawm tak Dr. Vanlalthlana ka sawm ang a, a sawi zighthah Member zahawm tak Pu KT Rokhaw a lo inring dawn nia.

DR. VANLALTHLANA : Pu Dy. Speaker, ka lawm e. Kan ngawi deuh cher chuar a, ka rawn puak leh that dawn nia. Pu Rintluanga a awm lova, a khawhar thlak deuh mai thei e.

Pu Lalchamliana, Home Minister zahawm tak Department chan ho kan luhpui hmasa ang a. Ni e, Police post ruak tih kha kan sawi kan sawi a. Amaherawhchu hlawh hi tih tlem a ni a, lak belh tumna a awm lo niin ka ring a. Police uniform kum 2017 atanga nuai 500 dah tawh thin kha 250-ah a tla thla a. Kan Police hote tlema an lo tawp deuha hak tur an lo nei tha lo palh a nih pawhin hriathiam an ngai dawn a nih hmel a. Tin, Modernization of Police Force kha an tlahniam a, nikumah vaibelchhe 13 a awm a, kuminah vaibelchhe 8 leh a chanve vel a awm a, tan lak chu a ngai deuhin ka ring a. Hei, jail manufacturers tih hi jail atanga an thil siamna tur a nih ka ring a, hei hi an ti pung a. Jail tang ho te an chhuah hunah pawh an intunnun theihna tur thil ngaihtuah belhna tur a awm ni dawnin ka hria a. A tam lo a, a sing tlem chauh a ni naa, a tlahniam lo hrim hrim kha ka lo lawmpui a.

Anni hi pawnan an chhuah hunah pawh eizawnna tha an neihai nun ngil an neih theihna tur atan enkawl an ngai khawpin ka hria a. Tin, Mizoram Home Guard hian modernization hnuaih hian engmah hmuh a awm ta lo a, tin, capital outlay hrim hrim hi Home Department-ah hian a awm lo a, khawnpu atangin kan la mai tawh turah ka ngai a. Hei, CID hnuaih Economic Offences Wing hi mimal tak hian ka thawhpui ve thin a, kan buaipui ve zak zak thin a, training tha an mamawh a, an han inthlak kual a, thil thar te lo hriat a ngai tawh thin a chungah chuan tlema ngivet deuh tur te leh tuna mi awm ho te pawh tun aia training tha leh zual an neih theihna tur te hi dappui a ngaiin ka hria a. Hmanni ah Home Minister ka zawt a, SEDP-ah sawrkarna an chan tawh hnu hian engzat nge Home hian a chan ve ka ti a, 40% chauh an lo chang a. 1% pawh chang loa an awm hi a pawi ka ti takzet a ni. Function-ah a hman hmanin an infak siak a, tunah ngei pawh hian kan infak siak leh a

ni lawm ni ka ti a. Covid-19 hripuiin min tuam laiin hmanrua pawh nei tha thum loin hma tawngah kan theh chhuak a, zan rei tak tak thleng kan duty tir a, ramri buai nikhuaah an phen atangin a then phei chu pawr tak takin an lo au ve a, a taka ngaihsak nachang hrelo kan awm hi a pawi ka ti takzet a ni. SEDP-ah hian thil chitin reng a leng a, agriculture chauh ni lovin, PWD-ah te kan pawt, thil dangah pawh kan pawt, airport siam nan te kan pawt, police ho tan 1% pawh awm pha velo hi pawi ka ti takzet a ni.

Tin, hei police housing lamah hian, budget-ah han lut leh lawk ila. Kum 2016-17-ah khan nuai 950 a awm a, a kum leh 2017-18-ah khan nuai 834 a awm leh a. Hei tunah hian engmah dah a ni ta lo a, nikum khan nuai 19 vel dah a ni a, kuminah an nil thak mai hi chu a hmaa ka sawi ang khan a sawi hi chu a awl a, a taka tih hi chu a har a ni ang e. Sum bawm khawltu, khawnpui neitu kha ka rawn dilsak a ni. Tin, Mizoram Armed Police leh MRP-te promotion lamah an inhlau lutuk pawh hi a fuh loin ka hria a, MRP hi kum 20 an thawh tawh chuan honorary-in, an hlawh te pawhin a pha tawh e tiin an kaisang a, chutah chuan a hnuah confirmation te an nei chho ve zel a. MAP lam ve thung hi chu kum 20 an pelh tawh pawhin junior grade emaw khatianga harsa taka promotion an sual chhoh te kha a ngai a, hei hi chu enfel ngai khawpin ka hria a. Tin, Home Minister-in min react sak se ka duh chu, Bairabi-a a mau nursery 1st IR, 2nd IR leh 5th IR ten an inven chhawk khu kan Home Department hian a hria em? Kan hotupa ram anih vang nge ka hre lova, hei hi min react sak se ka duh khawp mai.

Taxation-ah lut ila, covid-19 chhuanlamin petrol leh diesel man kan ti sang a, VAT kan ti sang a, diesel 14½% in a sang a, petrol hi 25 % in a sang a chho bawk a. Hei hi road cess anga lak ka chak khawp mai a, a punna hi kalna tur fel awm sa hian la ila chutah chuan SEDP atanga PWD sum atana pawt chhuak lovin, heta kan petrol cess atang hian kawng siamna tur atan te, driver hote a conductor te pawh a ni ang khatiangular ho ngaihtuahna tur atan te, leh driver welfare atan te pawh a ni ang, khatiangular khan hman dan tur ngaihtuah ta zawk ila, awmze nei zawk hian a man kan tihpuna hi hmanna tur chiangsa anga tih kha nita sela, mipuite'n motor kan hmana petrol man a to kan tih kan tiha hi, kawng tha kan nei dawn alawm tiin kan inhnem ang a, chutah chuan a kawng siam tuteah accountability a lo awm leh ang a, mipuite hian kawng siamah hian ngaihtuahna kan seng zawk ang tih rilruah a awm a, rawtna ka han thlen a ni. Tin, Opportunement of taxes from IGST nuai 3,500 atangin nuai 5,000-ah a sang chho a, hei hi a lawmawm ka ti a, hmun dang atanga kan thil lei te a tawpah an rawn adjust kual a. Khamiah khan kan dawng tam belh dawn niin ka hria a, a lawmawm ka ti a. Tin, lawmawm ve deuh chu hei taxation ah hian hlawh hi a pung tlat mai.

A pathumna, Disaster Management-ah hian ka lut kawi zawk ang a. 15th Finance Commission-in Disaster Relief Fund atan vbc 47 min rawn pe dawn a, chumi a tan state matching share-ah vbc 5 kan lo dah lawk thlap mai a, a lawmawm ka ti a. Mitigation & Landslide Restoration Works nikum ti ila, kumin chu a la ni thei a, nuai 150 dah kha 50-ah a tlahniam a, hei erawh hi chu mitigation, lo invenna tur te, khatiangular atana a tlahniam ta duai

hi chu rilru chu a ti hrehawm deuh a, kan lo inven ngai tam tak kha a awm a, fur te a la rawn ni chho leh ang a, hetah hian a khawnpui bawk kha ka rawn dil chhuah sak leh a ni.

Tichuan, kan Minister in min lo hriatpui sela ka duh chu, Ramhlun Sport Complex saw hmanah a min hrep tawh kha a ni a, sawlaia kawr saw hmannah pawh a kawrpui kha a sir a pawp a, MLA Fund-in a theih ang angin kan lo thawm ve a. Tin, Ramhlun Sport Complex thlang field atanga tui rawn chhuak saw a tam thin khawp mai a, saw pawh saw en fel deuh hlek chu a ngaiin ka hria a, tlemin a rawn che leh deuh tan emaw ni chu aw tih tur chuan a awm a. Amaherawhchu a pangngai reng te pawh a ni thei a, saw saw en fel theih dan awm se a lawmawm ngawt ang.

Minister zahawm tak Pu Robert Romawia Royte chan Sports & Youth Services-ah hian han lut hmasa i la. Hei, kan Minister hi a vannei ka ti a, department dang ho an hlawh a tlahniam duak duak a, hmelriat neih that vang te pawh a ni ang a, a hlawh ho hi department pathum belkhawm hian a pung tlat mai a, ICT ah a han tlahniam ve a, nuai 14 vel chuan, a lawmawm viau a. Hei, 2020-21 December thleng khan SEDP kha ka han thlek dek dek a, hotupa berin 63% a hauh a, kan Sport Minister-in a department hoah 8% a hauh leh a, an che nasa bik a ni ang e, hmalakna a tam a ni ang e tih kha rilru ah a awm a. Amaherawh chu hripui karah thil tih hleihtheih loh laia a lo kal thei bik kha a mak chu ka ti deuh a, hripui karah police ho thuam that a ngaih laia 1% pawh kan pe theilo kha chu pawi ka la ti hle a ni.

Hei, kan Minister-in pawisa a lachhuak teuh thei hi a lawmawm ka ti a, a chak a, a ngaihna a hria a, a lawmawm ka ti. Amaherawhchu, thil pakhat buaithlak ka tih deuhhlek chu, Empowered Committee 19.3.2020-a meeting a neih ah khan, Pu Lalchhuanthanga zawhna, Sport Department-in pawisa a hmu te tiyah khan Education Department-in an dila kha a chang ta tlat mai a. Pu Dy. Speaker, I phalna in kan chhiar lawk ang e. “The state representative submitted a copy of declaration under the signature of Secretary of Govt. of Mizoram Shri Saidingliana to the effected management of the proposed Residential Schools will be handed over to School Education Department of the State and that the Education Department has assured them to do manage and bear the recurring expenditure of the Residential Schools”. Education department chan tur ni awm tak nuai 16,751 leh 70,000 kha Sport Department hian a chang tlat mai a, hei hi School Department lam ho pawh hian an it khawpin ka hria a, School Department-in a khawih tur awm tak si, School Department dil ni bawk si Sports Department-in a la tlat te hi Minister chak anih zia tepawh a tilangan ka hria.

Tin, PMJVVK hnuiah kan hmu teuh a, nuai 40,000 chuang kan hmuah khan Supplementary Demand for Grants-ah nuai 10,000 leh tih chauh lan tir a ni a, hei hi chu first installment a kan dawn a ni tiin sawi ni ta mai thin se, a bak hi kan la beisei e, tih te. Tin, nuai engemaw zah kan Minister zahawm takin approval kan hmu tawh, amaherawh chu last quarter-ah, January, February, March ah pawisa awmdan a zira sanction pek a ni ang tih te,

hmu tawh ang thawthanga kan sawi reng mai hi chu a fuh lovin ka hria a. Tichuan, Sport chungchangah kan Minister lo react a tana ka zawh duh chu, State Matching Share-ah hian engzat nge lut tur, PMJVK-ah hian State matching share ka hmu lova, Sport infrastructure thenkhat kha State matching share atana pawm a ni e tih a ni a, amaherawhchu 10% kha vaibelchhe 40 vel a ngai si a, chu chu engtia dah tur nge, nakinah kan la post mai dawn em ni, a vai kan hmuh hunah dah tur em ni tih te, ka rilru ah a awm a ka zawt tel a. Tin, Hawla Indoor Stadium bula Indoor Stadium zuk sak leh tur a khu engtianga tih tur nge? Tin, Ramhlun Sport Complex ka bial ami saw Aizawl-ah pawh Sport Complex lian ber chu niin ka ring a, sawtah sawn ka MLA tirk pawh khan Minister ka hmu nghal a, develop ka duh a, a project pawh central lamah ka umzui duh a ni te ka ti a, “Ka lo buaipui ang, a ngailo, basketball court pawh a chung ka tihsak ang che u, kan lo buaipui ang” a ti a, tun thlengin a chhuat siamna tur pawh MLA Fund-in kan la ti a, chutiangin Tennis Court leh Wrestling Hall chhuat siamna tur pawh MLA Fund atang bawkin ka buaipui a. Volleyball court te saw ka en a, Basketball Hall pawh chutiang chuan theih ang angin ka han ti ve a, a enkawlnaah nuai 25 tih te kan hmu leh bawk si a. Sawlai hmuna inkhel thin ka ni a, basketball hi ka hman chang changin ka la khel a. Amaherawh, chu sawlai hmun saw a hnim em em a, zu leh damdawi tih nan tlaiah an rawn hmang a, chuvang chuan enkawl a va ngai em! Hmun danga infrastructure neih chu a pawimawh, amaherawhchu, kan neih sa enkawl hi a va pawimawh tho em! Chuvang chuan, helam pangah hian kan thil neih sa te, kan infrastructure neih lai mek te enkawl hi a pawimawh hle a ni.

Pu Dy. Speaker, Tourism-ah hian ka han lut lawk ang a. Kan Minister hi chak ka ti hle mai a, Supplementary Memorandum 15th Finance Commission-a kan thehluhah khan vbc 86, nuai 95 kha kan dil a. Amaherawhchu State Specific Needs a rawn chhuak a, vbc 200 kha a dawng thei bik a, kan Dy. Chief Minister-in vbc 4,400 a dil laiin engmah kan hmu lova, District Council-te kan dil saka engmah kan hmu lova, kan Minister hi chak ka ti hle a, vision a nei tha ka ti. Tourism hnuasia thawkte pawhin an chhuang takzet a, a lawmawm ka ti thung a. Information, ICT ti tawh mai ang, hei hi Synergy kan tih, 1+1 chu 3 tih anga tichhuak thei department an ni hi ka rilruah hian a lang tlat thin a. He department hi tangkai taka hman a nih theih nan Pu Robert hi technology lam thiam, hria a ni bawk a. A ni hi hetianga khai chhuak thei turah hian ka beisei a, a hmalakna zel turah pawh duhsakna kan hlan tel a ni e. Ka lawm e.

DEPUTY SPEAKER : A lawmawm e, tunah chuan Member zahawm tak Pu KT Rokhaw ka sawm ang a, a sawi zawah Pu H. Biakzaua, Member zahawm tak a lo inring dawn nia.

PU K.T. ROKHAW : Pu Deputy Speaker, ka lawm e. Pu Deputy Speaker, Demand No. 22, Sport hi han sawi ka duh a. Memberte, a bik takin i dinglama thute hian sport chungchang an sawi reng reng hian a ler lamah an sawi thinin ka hria a. A bul lam hi an la sawi duh lo nge ni a, an sawi hmaih tih ka hre lova. A dik tak chuan Sport hi chu sawrkar hmasa Pu Lalthanhawla khan hma theih tawpin a la a ni. Hma a lakna pawh mizo

mipui hian kan hre em em a ni. Pu Zodintluanga hi Sport Minister a ni a, khati lai khan. A dik tak chuan District headquarters tinah tuna artificial turf kan tih a phah thei vek a, Boxing Ring pawh District Headquarters tinah a dah vek bawk a. Tin, tuna AR Lammual te pawh saw artificial turf a phah a, a gallery pawh tha takin a siam a, a mawiin a tha em em mai a ni. Tin, an hun lai khan thalaite pawh an phur a, football-ah pawh Mizoram kha India rama pakhatna kan ni. Khatiang taka hma lo latute vawiin niah an hming pakhat mah lam rik a ni ta lova, a bul chu Congress sawrkar, Pu Lalthanhawla kaihruaiin theihpatawp a lo chhuah avangin Pathian zarah hetianga kan thalaite pawh India level-a lo sang chho kan ni. Chuvangin khang hun lai khan Pu Zodintluanga, Sport Minister chak tak kan nei kha Mizoram hian kan vanneih pui ve a ni tih ka sawi duh a ni.

Tin, MNF party a rawn sawrkar ta a, Sport Minister atan mi chak tak, mi fel tak Pu Robert Romawia kan lo nei leh ta a, hei hi Mizoram kan vanneihna a niin ka hria, a ngaihna hria tunah Minister kan lo nei leh ta a. Sport-ah Dan leh Dun mumal tak min siamsak a, chu mai ni lovin, Pu Speaker, thil pakhat mak ka tih deuh erawh chu, Sport Department hetiang taka thalai te tana pawimawh, Sport Minister pawhin a theihpatawp a chhuah laia Sport budget-ah nuai 2,500 chauh dah a ni ta mai hi, he sawrkar hian sport hi a lo ngai pawimawh vaklo anih dawn hi tih min ngaihtuah tir a ni. A dik tak chuan Congress party kan sawrkar lai pawh khan sport-ah hian nuai 4,000 te kan dah a ni kum hnih kal taah khan. Tunah nuai 2,500 dah a ni a, tunah hian football leh volleyball MLA te kan bial tan min pe ta sela, he a Demand hi a zo ti tih mai dawn a. Chutiang taka tlem kan han dah saka hi a pawi ka ti a. Amaherawh chu kan Minister hi a chak a, budget pawn atanga sum tam tak a sawi chhuak hi a lawmawm ka ti a ni. Tin, thil pakhat kan Sport Minister-in nakinah a wind up na a min hrilh ka duh em em mai a chu, PMJVVK scheme-in a tum ber chu hnam tlem zawkte zirna leh hriselna bakah an skill te develop a, retheihna atanga chawi chhuah a ni a, chutiang anih laia Siaha District thlan a ni ve lo hi mak ka ti a ni. Lawngtlai District kan thlang a, Lunglei District kan thlang a, Mamit District kan thlang a, chute lain Siaha District thlan a ni lo hi mak ka ti a ni. Hnam tlem zawkte chawikanna policy anih chuan Siaha District chu Lawngtlai District anga No. 1-a awm ve tur a ni. Chuvang chuan kan Sport Minister-in a thlan dan hi engtia thlan nge ni tih min hrilhfiah sela ka lawm viau ang.

Tin, kan Sport Minister ka lo ngen duh em em chu UD & PA-ah khan Tipa-a artificial grass phah tur khan ka dil a, mahse town a puan a ni lova Tipa hi; town-a puan a nih loh avangin UD & PA-ah khan a leng ta lo a ni. Chuvang chuan kan Sport Minister zahawm tak hian Tipa-ah khawngaihin artificial turf kha min phahsak ve hram se tih ka ngen duh a. Tin, Tipa-ah hian Indoor Stadium kan nei a, Pu Hiphei hun lai khan a MP fund atangin a sa a, mahse tuna kan neih hi a hlui tawh lutuk a, a tla bal nasa tawh a, ka MLA fund hmangin Badminton khelh theihna turin ka repair a, mahse duhthusam a ni thei lova, rual awh a na hle a ni. Chuvangin Tipa Indoor Stadium hi tun aia tha leh changtlung zawkin kan Sport Minister hian min siamsak thei se ka lawm hle ang. Tin, Pu Deputy Speaker, Siaha Vengpui-a kan playground hi Siaha function engkima kan hman thin a ni a, mahse gallery tha kan nei lova, khawngaihin kan Sport Minister hian gallery leh pavillion tha tak min siamsak thei se

a lawmawm hle ang. Tin, Pu Dy. Speaker, ka bial Zyhno-ah playground tha kan neilo bawk a. Zyhno hi ka bial hmun laili a awm a ni a, khawthlang lamah Phura a awm a khawchhak lamah Chakhei a awm bawk a. hemi khaw pathumah hian playground tha tak a awm a, mahse mipui thutna tur kan nei lova, khawngaihin gallery leh pavillion min siamsak ve turin ka ngen bawk a ni.

Tin, Tourism, Demand No. 43-a sawilan ka duh chu, Palak Dil hi Mizoram chhunga dil lian ber a ni a, hei hi zin mite tlawh duh tak a ni. Tourism Department hian he dil hi a nature tichhe si lova tourist hip theihna tur policy te a awm em, enge an hmalakna khawngaihin min hrilh thei se kan Tourism Minister hian. Hemi atana rilru a lo sen tawh ka ring a, nakinah min hrilhfiah se ka duh khawp mai.

Tin, ka bial, Lodawh khaw bulah khian *Beino*, Chhimtuipui Lui a luang a, keini Mara Pi leh Pute hunlai atanga thawnthu inzawmna nei tlat a ni. He luidungah khian keini chuan ‘*Saphao*’ kan ti a, zinmite erawh chuan “Castle of Beino” an ti. Khi khi lung building ang mai hi a ni a, a ropui khawp mai a, tunlai phei chu tlawhtu an ngah em em mai a, zinmite a hip em em a ni. He Castle of Beino hi Lodawh atanga hnaite anih avangin zinmite han riahna tur leh chawlhma tur cottage leh restaurant-te, lodge-te emaw Lodawh-ah hian min sak sak turin ka ngen a ni. (**Dy. SPEAKER:** *Minute khat i la nei e.*)

Home Department chungchang hi tlem sawi leh ka duh a. Siaha District Jail hi a hlui tawh lutuk a, a tlabal nasa tawh mai a, jail tangte pawh hriatloh hian an tlanchhuak leh mai ang tih a hlauhawm a, khawngaiha a thar min sak sak theih chuan a lawmawm hle ang. Tin, Siaha SP office leh quarter hi a chhe tawh khawp mai a, tlangchhip a awm a ni a. UT kan nih laia sak tawh kha a ni a, a tlabal nasa tawh a, fur lo thleng tur pawh hi staff-te hian an huphurh em em thin a ni. Tlangchhipa awm a nih avangin cyclone-te a hlauhawm em em a, khawngaihin he SP office leh quarter-te hi a rang lamin min sak sak thei chuan a lawm hle ang.

Tin, Pu Dy. Speaker, a hma pawhin ka sawi tawh a, Chakhei khuaah khian Police outpost thar min dahsak hram turin ka ngen duh a. He khua hi border-a awm a nih avang hian a pawimawh hle a. Tin, Phura outpost-a OC hian vehicle mumal a nei lova, border area-a awm a nih avangin vehicle tha deuh provide hram ni se. (**Dy. SPEAKER :** *Khawngaihin, 4 PM a ri leh der tawh mai a, 5 PM-ah em ni kan chawl leh ang; Awle, 5 PM-ah chawl ang aw? Sawi zawm rawh le.*) Tin, he outpost-ah police personnel an tlem em em a, khawngaihin min pek belh theih chuan a lawmawm hle ang.

Pu Dy. Speaker, a tawp berah chuan, nichinah khan kan MLA zahawm tak khan a sawi tawh a, ka ngaih pawimawh em em chu, Taxation-ah hian tuna VAT tihpunna a bikin petrol-ah 5% leh diesel-ah 2.5% a ni. Chuvangin, petrol-a chhiah 20% lak thin chu 25%-ah tihsan a ni a, diesel-a 12% lak thin chu 14.50%-a tihsan a ni. He tax hi nikum June atanga lak tan a niin ka hria a. a dik tak chuan Pu Dy. Speaker, State dangte pawhin Covid-19 avang

hian petrol leh diesel man tihpun tawh mipuite hmakhua ngaih avangin tunah hian tihniam leh mek a ni. VAT hi state sawrkar thuneihna a ni a, mahse tunah hian petrol leh diesel man a san avangin mirethei tam takin an tuar tan mek a, thil engkim man a sang a, ei leh in man takngial pawh sang tawh tak a ni; miretheite tan khawsak ngaihna a awm tawh lo. Chuvang chuan, kan sawrkar hian diesel leh petrol man hi a rang lamin tihniam leh se ka ti a ni. Pu Dy. Speaker, hun min pek belh avangin ka lawm e.

DEPUTY SPEAKER : A lawmawm e. Tunah chuan Member zahawm tak Pu H. Biakzaua i lo sawm.

PU H. BIAKZAUA : Pu Dy. Speaker, ka lawm e. Kan Minister zahawm tak tak Pu Robert Romawia Royte leh Pu Lalchamliana-te Demand kan sawi thei hi a lawmawm ka ti a. Demand-a ka luh hmain Myanmar chungchang hi tawite han sawi ka duh a.

Kan hria a, Myanmar-ah buaina NASA tak a awm a, kan Chief Minister zahawm tak Pu Zoramthanga kaihhruai Mizoram sawrkar hian Myanmar-a kan unau harsatna tawkte a ngaihven em em a. Ka hriat ve chinah chuan Halkha leh a chhehvel khua a mite lo chhuk an tam deuh ber niin ka hria a. Lai fa an tam deuh ber awm mang e tih tur a ni a, tun chinah chuan. Central Minister pawhin kan Chief Minister zahawmtak hi a lo bia a, Mizoram-in kan lo mikhual theih thu leh thawn let an ngaihloh thu te ka Chief Minister zahawmtakin central lam pawh a hrilh a. Chutiang chuan an ni pawh in a tha an rawn ti a, an lawm a. Tichuan kan Chief Minister, kan Home Minister leh Minister dangte pawh an ni ang, an ngaihven theuh a, he sawrkar hian Myanmar buaina hi a phak tawkin a vei niin ka hria a, a lawmawm ka ti a. Mobile phone-ah kan Chief Minister fakna leh chawimawina, Myanmar-a heng buaina tawk mek kan Mizote an ni emaw, Lai fa an ni emaw, Kawl an ni emaw a tu mai pawh he chanchin lo hria apiangin an lo post a ni tih turin English te, Lai tawng te, Mizo tawng tea ziak hmuh tur tam tak, chhiar sen loh khawpin a awm a, a lawmawm ka ti a, ropui ka ti a. Kan Chief Minister inpeknaah buaina leh manganna tawk mek ten an thlamuanpui thu kan han hmuh hian kan CM hmalakna leh hnathawh te a thlamuanthlak em em a, a ropui hle in ka hria a ni. Thlaphang leh manganga awmte lo ngaihsaka lo buaipui hi kan Pathian thu pawh a ni a, chuvangin Myanmar-a kan unaute manganna au thawm leh helama lo tla thlate pawh lo ngaihven zui zel turin kan CM zahawmtak leh he Mizoram sawrkar hi kan inring a ni tih thawm te kan CM hnen atanga kan hriatin a thlamuanthlak ka ti a, keipawhin lawmthu ka sawi a ni.

Awle, Demand No. 22-ah lut ta ila. Sports & Youth Services hi a pawimawh khawp mai a, vawiina kan thalaite kan enkawl danin Mizoram hma lam hun a hril thui dawn viau niin ka hria a. Sport hi a malkhai ngawt nilovin thalaite tan pawh a hriselna, an lo upat hun thleng pawha taksa chakna leh hriselna tha an neih theihna tur, tin, ruihlo lamah te, HIV te, drugs leh zu te pawh kalsan duhna thinlung thalai ten an lo neih theihna tur department pawimawh tak niin ka hria. Kan thalai te hmathlir leh an awm dan zel tur ngaihtuahna thui tak neiin kan CM zahawmtak leh kan Minister, a changtu zahawmtak te, Mizoram chhunga

kan sum leh pai neih te a tlem si a tiin central sawrkarah sum tam zawk dilin engemaw zat an han hmu thei hi lawmawm ka ti a.

Hemi chungchangah hian a thenin an fak a, a thenin an sawisel bawk a, ‘sports-ah chauh’ tih te a lo awm zeuh thin bawk a, a awmzia hi kan hriathiam a tul hlein ka hria a ni. Kum rei tak he scheme hi a kal tawh a, tunhma chuan ‘PMJVVK’ tih a ni lova ‘Multi-Sectoral Development Project’ tiin hun reitak a lo awm tawh a. A hming hi hman deuh lawk khan an lo thlak kha a ni a, hemi chhung hian sum leh pai hmuh leh lakchhuah a tam lo em em a, sawrkar kal ta chhungah pawh khan tam tham he scheme atang hian hmuh a ni lo hrim hrim a ni. Tunah hian he scheme hnuaiyah sum engemaw zat hmuh a lo ni ta a, RD Block a huam kim lo hle a, ka bial Lawngtlai District-in an chang an ti nain ka bial chhunga RD Block pakhat pawh a huam chuang lo a ni. Chutiang chuan Lunglei District-ah pawh RD Block thenkhat chu a huam chuang lo a, Mamit, Lunglei leh Lawngtlai, a district angin a ni na a, heng District pathum teina State Games kan neiha point an hmuh pawh tam lemlo khawp mai.

Chutiang te tana sports infrastructure buatsaihna tur a sum leh pai tamtak kan siam leh a changtu Minister zahawmtak te hmalaknaa kan han hmu te hi a lawmawm kan ti a, mipui an lawm a, member-te pawh hi kan lawm niin ka hria a. Chutiang sum leh pai chu anih avangin, ‘Minority’ tih khan sakhua lam minority lam atanga an tehna niin a lang deuhin ka hria a, chuvangin district thenkhat, ‘engah nge a huam loh, engah nge block thenkhat a huam loh’ tih te pawh kha a kawng hi a dang ve deuh hlek a, a huam vek theilo niin a lang a, hei hi chu Minister zahawmtak pawhin rawn sawifiah thei turah ka ngai a ni. Tiangchuan sports lamah hian hmasawnna tur tamtak tun sawrkar chhungah kan nei tawh a, Sports Policy, 2019 te pawh kan nei a, sports hi eizawnna tlak a tlin theih nan industry ah hlan chhoh te a lo ni a. Chuvangin, sports hi a hlu chho deuh deuh dawn a, job reservation 5% lai kan han nei chho te pawh hi a lawmawm hlein ka hria a. Lawngtlai District te, Mamit te, Lunglei te a sports infrastructure lo awm thei tur Sports Complex te, Residential Sports School te, Basketball Court te, Volleyball Court te tam tak han awm thei tur hi lawmawm ka ti tak zet a, kan hotute hmalaknaah lawmthu ka sawi duh a ni.

Awle, hun a rei duh em avangin Demand No. 43, Tourism-ah ka kai chho ang a. Tourism lam hi Covid avangin tum leh beisei angin hna kal lai mekah a chak hlei thei lova, khualzinte an tam thei lova, department pawimawh tak sum leh pai kan lakluhna hnar te pawh a ni nghe nghe a. He department-ah hian ngen duh ka nei a, kan Minister zahawmtak pawhin min hriatsak se ka duh chu, Phawngpuitlang hnaih ber khua Thalang saw foreign lam atanga leh India ram chhung atanga Phawngpuitlang tlawh tura lo kal kum tinin mi tam tak an awm thin a, chung mite tan chuan thlenna emaw, restaurant emaw a awm lova, Thalang khuaah sawn Tourist Lodge dah a pawimawh khawpin ka hria a, kan image lanna pawh a ni a, chulaia thlenna leh chawlhma tur awm lo saw a remchang lo khawp mai a, chuvangin, Tourist Lodge emaw Rest House tha tawk tak saw laiah sawn dah theih ni ve hram se tih te ka han sawi duh a.

Nichina ka hmaa han sawitu khan ‘Beino’ a rawn tih kha, Lai tawng chuan ‘Bawinu’ tia sawi a ni a, Mara tawngin ‘Beino’ an ti a, Lai tawngin ‘Bawinu’ an ti bawk a, a hmun kha a thuhmun reng a. ‘Lungmak’ ti tein kan hria a, Kawrthindeng bul, Member zahawm tak Pu C. Ngunlanchunga bial a mi a ni a, 70% vel hi Lai ram chhungah a awm nghe nghe a, sawlaiah sawn kalkawng te pawh siam a, chawlhma eng emaw hmun han buatsaihte pawh a tul khawp mai a, a hmu lo an la tam dawn a, kan Minister pawhin min hriatsak se la a tul hlein ka hria a. Mi tam tak Aizawl atang pawhin an en tan mek tawh a, chu chu ka han sawi duh a ni.

Demand No. 48, Information & Communication Technology-ah hian lawmthu han sawi ka duh a. Ka bial chhunga school-ah te computer kan dawng zut zut mai a ni tih te ka han sawi hmasa duh a. Pu Deputy Speaker, a zo tep tawh a, tawi tein ka han sawi lawk ang e i phalnain. ICT tul zia tun lockdown atangin kan hria a, kan pute Delhi lam nen online-in an meeting-a thil tih tur, lungphum phum tur leh hawn tur bakah thil hrang hrang an ti reng thin a. Delhi-ah Covid avangin an chhuk theih lo a, ICT lamah kan chak a tul khawp mai a, tun dinhmun hi thleng lo ta ila ICT-ah hian hetiang hi kan ni thei lo ang tih a lang chiang em em a, a pawimawh hle in ka hria a ni.

Tin, Demand No. 16, Home Department-ah hian Pu Deputy Speaker, tawi tein ka han sawi leh ang a. Kan Chief Minister zahawm tak leh kan Home enkawltu Minister zahawm takte ramri chungchang an hmalakna te, Covid chungchanga kan harsatnaah te, kan Police Force-te an deploy dan leh hma an lak danah an fakawm hlein ka hria a, General a huaisen chuan a hote chu an huaisen mai a, chutiang ang deuh chuan kan hotute an fingin an tho thang a tha a, heng chungchangah hian kan pute’n min hruai dan hi lungawithlak hlein ka hria a. Harsatna leh manganna kan tawh tak takah chuan kan Police-te kan ngai a, kan rilruin kan beisei a ni. Ka bial chhungah thil tawite ka han sawi tel duh chu Sangau Police Station saw border a awm a ni a, a pawimawh khawp mai a, motor an nei chhe lutuk a, hmanlai Gypsy kha an la kawl a, repair a ngai reng mai a, chuvangin, Motor thar an ngai khawp mai tihte ka han sawi tel duh a. Tin, Bualpui Police Outpost saw Police Station puitlingah hlankai a tul khawp mai a, senso belh tur a tam ka ring lo. Building a awm vek tawh a, a thawkte pawh an awm a, Police Station puitlingah min hlankai sak se tih te ka ngen duh bawk a ni.

Demand No. 30-ah hian Pu Deputy Speaker tawite ka han sawi leh duh chu, chhiat tawk leh natural calamity avanga harsatna tawk kan awmin DM&R kan rilruin kan ngai a, kan beisei a, min hriatsak se tih kan duh thin a. Kum 2019 khan Lawnglai khua mi pakhat Tuipui Ferry-ah khuan a tla a, kan zawng a, chuta YLA leh MTP ten ka hnena an sawi leh min ngen tam ber chu tui tla zawnna hmanrwa Life Jacket leh thil tul pawimawh tam tak a awm a, chutiang chu sawrkarin a kawl ringawt hian tui tla hmuh theih a ni lova, YLA emaw MTP te hnenah emaw a nih loh pawhin tuipui kama awm khua VC-te hnenah pek leh kawltir ni se, rang tako mi chhanchhuah theih tur leh khatiang harsatna tawkte pawh an awm thei a. Tin, chhanchhuah theih loh, a zawn chungchangah pawh tui tla zawnna hmanrwa hi an

pawimawh thu min hrill a. Chutiang chuan ka bialah pawh Vartek kai chu tuipui kama awm a ni a, tui thiam an tam bawk a, a khaw bul hnaih vel leh he lam atanga kal ho chesual palh leh tui tla an awm chuan kan ruai ziah a, mahse hmanrua an nei lo a, a hlauhawm em em thin a ni. Chuvangin, tui tla zawnna hmanrua hi tuipui kama awm NGO te hnenah emaw VC te hnenah awm hian dah theih nise a tha hle dawnin ka hria a, ka han sawi tel duh a.

Tin, District Hospital bul leimin kha Zawhna leh Chhanna hunah khan ka sawi tel tawh a, DM&R Minister zahawm tak hian min hriatsak leh se la a thain ka hria a, hma lak chak chuan Damdawi-In building min tel mai tur kha a ven theih a, hma lak hmanhmawh a ngai khawp mai tih ka han sawi duh bawk a ni.

Kan Minister zahawm takte pahnih Demand kan han sawi tak te hi tha ka ti khawp mai a, kei pawhin ka thlawp a ni. Ka lawm e.

DEPUTY SPEAKER : Member zahawm tak Dr. ZR Thiamsanga ilo sawm ang.

DR. ZR.THIAMSANGA : Pu Deputy Speaker, ka lawm e. Kan Minister zahawm takte pahnih deamand kan han sawi leh thei hi a lawmawm khawp mai a. A hmasain Demand No. 22, Sports lamah hian han kal ta ila.

Kum 2019-ah khan hun chep tak karah Mizoram State Games kan han nei a, State kan nih hnua kan neih hmasak ber a ni a, kha khan Mizoram pumah awareness min pe tha khawp mai a, keini kan district-ah phei chuan kan piangthar hle a ni. Khata tang khan mipui hian sports-ah awareness nasa tak kan neih phah a. Tin, chumi hnuah kan Sports Minister chak tak hmalaknain kan department nen tangrualin theih tawp an chhuah a, kan Chief Minister hoin sports policy an han duang rup mai a. Chu mai bakah Sports kha Industry-ah an han puang leh a, Mizoram hi tun sawrkar-ah hian bung thar kan chuang a ni. Thalaite tan chuan he sawrkar hi ava han ropui em! chhenfakawm tak a ni tih hi Pu Deputy Speaker, an hriain ka ring a. Sports hi a hrim hrimah khawvel huapa Mizote min pholangtu ber a niin a rinawm a, eizawnnaah pawh tunah chuan a tha tawh a ni. Kan thalai tam tak football leh hockey eizawn nana hmang tam tak an awm a, kan ram pawhin a hausak phah tan mek a ni. Mizo hi kan lo fit khawp mai a, weight category ang chite a nih phei chuan; tunhnai lawkah WBC Title Fight kan neihah khan, kan han en tirh phei chuan engnge kan an ang aw kan ti a, kan lo khurh dat dat lai khan kan zuang ta dawrh dawrh mai kha a ni a, a ropui a ni, khata tang pawh khan mizote hi sports discipline hrang hrangah hian kan fit a ni tih kha a chiang a, a lawmawm khawp mai a. Boxing, hockey leh football-ah te Mizoram mai ni lovin India ram leh khawvel te pawh kan deng chhuak a, hei hi a lawmawm khawp mai a.

Mahni district kan sawi lo thei lova, Champhai hi tunhma chuan infiammi, sports lam ti thei tak thin an ni a, kan boxer, Zoramthanga pawh kha khilam atanga a rawn chhuk hnu khan Champhai-ah rei tak a khawsa a hman a, ‘Champhai pa’ kan ti thei a, Pu Rosema

te pawh boxing-ah Gold Medalist a ni a, chutiang chuan Champhai-ah khian football leh taekwondo-ah te international player te pawh kan nei a, tunhma chuan sports lamah kan tha khawp mai a, tun hnuah erawh chuan, sawi a hrehawm viau naa, khaw chhak lam atangin damdawi an rawn tawlh nasa a, zep rual lohin kan thalaite pawh a fan mek a ni. Chuvang chuan, sports hi tun aia kan uar chuan heng drugs zawng zawng leh ruihtheih thil lakah pawh hian Champhai mai ni lo Mizoram pum tan hian kan fihlimna tur hmanraw tangkai tak pakhat a ni. Tin, mihring taksa thlarau thleng pawh hian a hawlh thleng mai ang tih te pawh hi a rinawm a, sportsmen spirit hi chu a tha a, chuvang chuan kan hriselna a tan pawh a tha a, eizawn nan pawh a tha a, kan thalaite chher nan a tha a ni tih hi ka han sawi duh a.

MNF party sawrkar hmasak khan Champhai-ah kan Chief Minister zahawm tak hma laknain District Sports Complex kan han nei ve a, bul kan han tan a, sawrkar kha a lo inthlak ta si a, hmalak chhunzawm a ni thei ta lo a ni. Zotlang-ah stadium min han sak sak a, amaherawhchu a that viau rualin a lo tling lova, Mizoram State Games-ah pawh kan han tlan chhin kha kan lo chak ta viau mai a, Mizoram record te kha kan pel a, amaherawhchu a tak takah khan a lo tlin loh vang kha a ni ang chu, pakhatna kha kan ni thei ta reng reng lova, kan lang pha ta lo a ni. Chuvang chuan, ka bial chhung Champhai North-ah phei khi chuan sports hmun hi kan la nei lova, district dangte kan thik miah lo, a lawmawm lutuk. Amaherawhchu tunhmaa Mizoram sportsmen te lo chhuahna hmun Champhai North bialah phei chuan hmun kan la neih loh avangin, hei hi kan Minister zahawm tak hian min lo chhinchhiah sakin min lo react bawk se ka duh a, Champhai Vengsang-ah khian hmun tha tak mai SAI Centre tihna tur kha kan pe teuh mai a, khingte khi min han enfiah sak se la. Champhai hi badminton-ah hian Khelo India Centre, Champhai Badminton khian kan qualified-in kan hria a, chu chu criteria hrang hrang kan han en pawhin kan tling a, khingte pawh khi min han zir chian sak se kan duh a.

Hnahlan saw football thiam tamna hmun a ni a, Aizawl Club AFC-ah te pawh engemaw zat an awmin ka hria a, khatiang khan football-ah hian an tha khawp mai a, field puitling an la neih loh avangin, a bik takin Hnahlan khi SRDC area deuh thaw te a lo ni ve a, khilai khi mini sports complex tal chu khi lai chhehvel zawng zawng Myanmar border te, Manipur border te kan nih bawk avangin mini sports complex tal chu min dah sak ve se kan duh a, hmun pawh tunah hian kan nei a ni.

Lawmawm em em chu Rabung khuain football playground puitling an nei lova, hmanni lawk khan kan Sports Minister hmalaknain an nawr ta a, field puitling thei turin kan duang ta a, a lawmawm khawp mai a, Minister chungah pawh lawmthu kan sawi a. Hmun dang dang, Hmunhmeltha-ah te pawh hockey ground tur pawh hmun tha tak kan lo zuah a, hmanah pawh kan Sports Minister ngei pawh hian Hnahlan leh Champhai-ah te min rawn tlawh tawh a, a tak ngeiin khawchhak lamah pawh min rawn tlawh leh ngei se la, khilai hmunah khian kan theihna pawh hi min rawn ti chhuak thar leh se kan duh a ni. Kha kha Sports-ah chuan ni mai se.

Tourism lamah hian, Champhai district hi nichinah khan kan MLA zahawm tak khan a sawi tawh a, mizo history a hmun pawimawh tak tak, Lianchiari Lunglen Tlang, Thasiama Se No Neihna, Lamsial Puk, Vanapa chetna hmun Hnahlanah te, Rabung-ah te a awm thluah mai a. Mizo-in a kan ngaihsan em em ‘Chhawkhlei’ kan tihte hi khilamah chuan phun ngai lovin, tiang chuan Ngur tlang te, nauban te a tha em em a Hnahlan ramah te khian, khingte khi eco-tourism hmun atan a tha a, a chhan chu Champhai District hi Mizote dil lian ber, Rih Dil, amaherawhchu Myanmar-a awm ta, panna hmun a nih avangin khilaiah khian eco-tourism hi kan ngaihpawimawh a ngai a ni.

ICT lamah hian ka han kal leh ang a. Ka bialah khian inbiak pawhna hi a har khawp mai a, Vaikhawtlang te, Khuangphah te leh hmun dang dang pawh sawi tur a tam a, emergency-a han inbiak dawn hian khawi tlangah emaw te han lawn a ngai a, zan thimah te a buaithlak khawp mai a. Kan Minister zahawm tak pawh hi hma min lak pui turin ka sawipui tawh thin a, theihtawp min chhuahpui a, amaherawhchu vawiin thleng hian kan la hlawhtling lo deuh a, khingte pawh khi hma min han lakpui se la. Champhai-a kan internet line hrim hrim khi a tha lutuk lova, tunah khian air fiber wireless hmanga signal ‘bandwidth’ kan tih hi hman a ni ber a. Amaherawhchu Airtel leh Jio Company ten Aizawl leh Champhai inkar velah an han zam a, mahse a tha tawk lova. Tunah khian optic fiber ground wire hi P&E Department nena tangho pawha min tih sak ve turin, khawchhak tlangdung zawng zawngin kan chhawr ve turin min tih sak se ka ti bawk a ni. Taxation kha chu ka sawi tawh lo mai ang a pawimawh viau nain, ka sawi angah min ngaihsak mai se.

Home Department lam hi a pawimawh a, kan police te tun tuma Covid-19 kan han buaipuinaah leh ramri buaina chungchangah hian an chhuanawm hle mai a. Hei hi kan ram hruaitute zir niin ka hria a, kan Chief Minister te, kan Home Minister te ram leh hnam hmangaiha kum tam tak lo chhuak tawh an nihna a langin kan hria a. Chuvang chuan, buaina a han chhuak a ramriah, keini pawh a hmun ngeiah kan zuk kal a, kan police ten Assam police an tam zia tur pawh kan hria, amaherawhchu khang kha hlau miah lova position an la kan han hmuh te kha a ropui a ni. Chuvang chuan, kan police te hi an chhuanawm a, an fakawm a, ram leh hnam tan an inpe a, chu chu kan ram hruaitute zir niin ka hria a, an chungah pawh hian lawmthu sawi mawlh mawlh ngai niin ka hria a. Amaherawhchu an duhthusam hmun leh hma kan la pe hlei thei lo erawh hi chu a pawi a, duhthusamin hei kan police te pawh an tam lova, IR te pawh an tlem a, amaherawhchu kan hria a, Covid avangin kan inla hlei thei lo a ni. Hengah te pawh post tam tak a awm a, nakinah chuan kan la inhnawkhat ang a kan la indaih chho zel ang tih te pawh kha beiseina sang tak nen lo thlir ila.

Tichuan, traffic chungchangah, Mizoram traffic an indaih lo hle nachungin hetiang khawpa kawng zim, kawng teah pawh kan traffic police-te inpek nasat zia hi sawi loh theih loh niin ka hria a, an thawkrim a, chhun zan zawmin theih tawp an chhuah a ni a lawmawm ka ti a. Assembly Session hmasa, nikum lamah pawh khan an ban, an kut, an ke, an thluak

te an hmang a, an ding reng mai a, *standing allowance* te hi pek ve mai awm tak a nih hi maw le ka rawn tih tawh kha; an fakawm ka ti kan traffic police-te hi.

Tichuan ka bial ka han sawi lawk ang a. Pu Dy. Speaker, ka bial khi a hla a, chuvang chuan tlem a han sawi belh te pawh a awmin ka hria a. Pu Ngunlianchunga pawh kha a sawi rei viau kha maw le hmanni khan. Hnahlan khi Indo-Myanmar border-a awm a ni a, Inter-State Border a ni a, a piahah khian Khuangphah, khawlian vak lo a awm a, a thlang lawkah khian Vanzau, Myanmar khua, In pahnih pathum vel chiah awmna khi drug tawlhma hmun ropui tak a ni. Tin, opium te an ching nasa a, khita tang khian drug te an rawn tawlh nasa a, chuvang chuan Hnahlan-ah khian kan buai fo mai a ni. Kan hotute hnenah pawh ka sawi tawh thin a, Police Station hi kan nawr zing tawh bawk a, a ram pawh kan pe tawh a, kan la pekbelh zel dawn avangin hei hi kan Home Minister pawhin min lo chhinchhiah sak se, nakinah pawh min react se. Min react hunah pawh khan kan min pek ve ngei a tum thu te pawh a sawi kan beisei a ni.

Disaster Management & Rehabilitation-ah hian Champhai kawtchhuah New Saron leh Kanan bulah khian lei tawlh nasa em em a awm thin a. Khi khi kan sawrkar chak takin sum thahnem tak central-ah min ruahman sak niin kan hria a, hlawhtling turin theihtawpa hma min laksak ka han ngen nawn leh a ni e. Ka lawm e, Pu Dy. Speaker.

DEPUTY SPEAKER : E, a hlawhtling ngei ang a tiraw. Tunah chuan Member zahawm tak Pu C. Ngunlianchunga i lo sawm ang.

PU C. NGUNLIANCHUNGA: Pu Dy. Speaker, Pu Thiama hnunga sawi hi chu bawhpelh deuh pawhin a inthiam awm tlat a, chu chu a nia ka chan tlat. A hmasain Pu Dy. Speaker, hei kan House Leader a awm a, Home Minister Demand a ni bawk a. Kan hriat theuh angin khawchhak lamah kan unaute, Myanmar-in buaina namen lo an tawk a, chumi chungchangah chuan kan Chief Minister zahawm tak hmalakna te, Union Home Minister te nena an inbiak thu te whatsapps group ah kan lo hmu ve a, a lawmawm khawp mai a. Kan u leh naute pawh an thla a muang a, chutih rual chuan khilam atanga rawn chhuk khi an awm deuh reng a. Tun mai update-ah pawh hian Farkawn velah te an lo kal thla a, chutih rual chuan Assam Rifles te an lo tam ang reng khawp mai an ti a. Tunah hian CNA leh Burma sipai boruak a that loh zual avangin rawn kal thla tur kha an tam a, khilai Farkawn bul Tiau kai velah khian Assam Rifles an tam lutuk a, chu chuan an lo dang ve deuh bawk si nen khan harsatna tlem an tawk a ni tih te tun mai group update ah hian a awm a. Hei hi khawngaih takin kan Chief Minister-in Zofate, Zohnahthlakte tan *Pa* nih tling niin ka hria a, hemi kawngah hian.

Sawi tak ang khan ram pawn lama awm atangte pawhin lawmthu sawina a tam em em a, khalai kha kan hriatsak zui atan pawh a tha khawpin ka hria a. Assam Rifles ho hian an lo rikrap ve a, uniform tial nen an hmuh tawh chuan foreigner an nihna nen anmahniah hlauhna nasa tak a awm a ni tih lai kha a hmasa ah ka han sawi duh lawk a ni.

Tichuan pakhatna ah ka han lut nghal mai ang a, Demand No. 22, Sports & Youth Services-ah hian. Pu Dy. Speaker, kan thil sawi dan leh Pu Thiama te sawi dan hi inang reng pawh ni se, Minister infaknaah hian a lo chhuah leh dan hi a fuh lovang tih a hlauhawm ang reng ka ti a. “Minister chak tak, engkima chak” han tih te kha Pu Thiama te lam atang chuan a mawi mai a, keini lam atang chuan tunlai boruak nen khan “Minister bawhchak tak” tih te pawh kha ngaih loh lamah in ngaihsak lo ila, a chakna lai zawk kha kan sawi tum a ni tih lai kha ka sawi hmasa duh a.

Hei, kan hmu a, a lawmawm khawp mai a, keini a bikin Lawngtlai District pawh PMJVK scheme hnuia cover area kan nih angin sport-ah te pawh kar hmasa Private Member Resolution-ah pawh kan sawi vak tawh kha a ni a. Lawngtlai atan hian cheng engemaw zat ruahman a ni a, a lawmawm pawh ka ti khawp mai a. Chutih rual chuan, kan sorkar lai khan Lawngtlai-ah Central YLA playground-a phullem phah hi kan nghakhlel em em mai a. CEM, District Council-a ka nih ve lai khan DPR siamin Union Minister te kan zuk hmu ve a. Chu chu kan Sport Minister kal ta Pu Zodinthuanga Ralte ten min umzui sak a, Lawngtlai tan kan han hmu ve a, kan term chhung khan kan hawng hman a, a lawmawm khawp mai a. Kan kawmthlang mai a ni a, phullem phah hnu hian practice an awm ta lo reng reng a, tin, Lawngtlai khawpuin Independence Day a ni emaw, Republic Day a ni emaw Lawngtlai khaw huapa district function kan neih hrim hrim hian a hman theih ta miah loh mai a, an inhung thap a. a reh thiap mai a ni; chu chu a dinhmun ani a. Tunah hian hei, phul lem phah hi kan uar khawp mai a tunah pawh hian Lawngtlai Vengpui field, kan hunlaia laih-ah te phah turin ruahmann a awm ani tih ka hria a. Khi khi lo phah ta ila, Lawngtlai hian national programme entirnan Independence Day leh Republic Day lawmna te khawiah nge kan hman tak ang tih lai kha ka ngaihtuahnaah a awm a.

Tin, chutihrual chuan, kan Minister hi kan ngaihthlak tak ang khan Minister chak tak anih zia leh pawt chak tak leh bawh chak tak a nihna te vawiina kan sawinaah pawh hian a chiangin ka hria a. PMJVK hi minority consultation area-a hman tur a ni a, a guideline hmannah kan sawi vak tawh a chumi atang chuan vaibelchhe tam tak a pawt lut a, chu mai chu nilovin Social Welfare leh UD & PA atangin Sports-ah a pawt lut leh teuh bawk a. A department Minister te an awm ve thluah a, khatiang zawng zawng han pawt lut thei bika kha *Zawlpala leh Tuavnungi* Mizo thawnthu ang deuh khan Tuavnungi ko thiam nihna te pawh hi a chang a ni ang a tih te leh, *eng emaw* te hi a awm emaw ni le tih te ngaihtuahna a kal thui khawp mai a. Kan district bikah, ka bial Lawngtlai West a ni a, chhangchhe tak mai, Mizoram MLA Constituency zinga community hrang hrang, hnam chi hrang hrang awmna ani a, backward grant hmu khawpa hnufual kan ni a.

Tin, chutihrual chuan ka bial hi Christian minority concentration area a nihnaah hian Chakma Pawl ‘Zakhai’ kan tih te, ‘Rakhai’ kan han tih ang chi te tamna a ni a, hei hi an chanvo tur liau liau a ni a. A lan danin hei hian a tum tak chu Kristian-te zinga minority-te chanvo tur nia a lan lain, tuna kan PMJVK hi Lawngtlai khawpuiah kan bel ta vek mai a, hei hi keini Lawngtlai West tan chuan kan mamawh ber a la ni chiah lo a ni. Hei hi keini

chuan ‘kan duh lo e’ tihna lam nilovin kan la enjoy phak ve lo a ni. Chu ai chuan School-In tha te, kalkawng tha te, Damdawi-In tha te, tui in tur hnianghnar tha zawk te leh leilet WRC potential area ani a, kan leilet laih zau nan te; cheng nuai sangthum, sangli dawn mai Lawngtlai District-in a dawng a, a backward leh a minority zawk awmnaa an dawng lo hi chu a lungchhiatthlak angreng khawp mai. Chutihrual chuan tuna scheme lo lang hi ‘kan lawm lo e, kan lungawi lo e’ tihna lam ni lovin, hei aia mamawh deuh zawk hi keini chuan kan la nei a ni tih lai hi Pu Dy. Speaker, ka sawi duh a ni. Lawngtlai pawh Urban town ani tawh a, min duhsak ve tak tak anih chuan UD & PA hnuia *Khelo India* scheme atangte pawhin min han pe ve sela. Tin, PMJVVK hnuia minority area-in a cover, mihring mihrinna atanga pawha hnuful tak leh hniam takte chawikan nan hman ni ta sela duhthu ava han sam em tih hi ka sawi duh a. Tin, a kal dan tur tunhma guideline-ah chuan, state level a awm a, state level atangin district level-ah, sum pawh hi district level a lokal pawisa pawh DC a lo thleng thin a ni a, hetia Sports-a a kal takah hian engtin nge a kaldan tur hi chu hotute’n an hre turah ngai ila. Kan Minister hi ama department mai nilovin, a pawt chak hle a, a hnuk chak a, a bawh chak bawk a ni tih kha a langchiang hlein ka hria a, lawmpuiawm pawh ka ti.

Tourism-ah hian pakhat chiah sawi ka duh chu, sorkar hmasa khan Bunglang South-ah khuan Tourist Lodge tha deuh mai sak a ni a, tlema pilril deuh mual tha tak mai an pe a, tuma tlawhpawh lovin a awm a, hnimin a bawh vek tawh mai a, sum tam tak senga sak a ni si a, enzui theih ni se chu duhthu a sam khawp mai tih kha ka sawilang duh a ni.

Tin, Home Department chungchangah hian, he department hi an khawngaihthlak hle mai a, kha, kan han sawi a, ramri atana a tangkai zia te leh covid pandemic-in min tihbuainaa kan Police te tangkai zia kan hria a. Chutihrual chuan kumin budget kan en chuan an hlawh salary bikah hian nuai 3,779 leh nuai 81 ngawtin nikum an phak lo a ni. Police Department hian hlawh an lo siam thin hian pay head balance awm turin sum chuangin an lo siam thin tehreng nge police hi ban then tur nge an nih tih laia hi ngaiantuahna a ti kal thui khawp mai a Pu Dy. Speaker. Nge ni, kan Finance Minister leh Finance Department te hian budget-a lan mawi tumin revenue expenditure-ah 82% leh capital expenditure-ah 17% daha, a tak ramah erawh chuan Supplementary Demand 2021-2022 kumtawpa rawn tih leh tawk kha kan tum nge tih lai kha hriathiam a har khawp mai a. Tin, chu bakah kan hotute hi bial nei theuh kan ni a, bial chhunga police quarter hlui tawh zia te, a chhiat tawh zia te, an vehicle chhiat zia te thuamthat a ngaih zia te, keipawh ka bialah khuan Police Outpost pahnih a awm ve a, Lawngpuighat leh Bunglang South-ah a awm bawk a. Motor te hi an nei ve a, mahse a kal hleithei lo a, an siam hi a tam zawk a ni. Chutiang khawp chuan thuam that an ngai a, chutihlai chuan a thuam thatna tur lam reng reng a awm lo hi an khawngaihthlak hle mai a. Nikum lam Question Hours-ah kan ngaithla tawh a, NESEDP atangin 0.4 an han chang te kha, kan Minister hi pa tha tak a ni a, a dawh a ni; lungawina chi niin ka hre lo. Department thenkhat-ah a vum a vum lain, pawt chak leh chak lote kan inthlau hle a. He kan sawrkar hi ‘semi-dictator’ kan ti dawn nge, a thenah khawnpui lian tak kan dah a, chu khawnpui chu pakhat in a control a, Chumi va tlawnva va hnuk chhuak thiam kha a ni ta ringawt

maiin a lang tlat a ni; *need base-in a kal tlat lo.* Chuvang chuan Pu Dy. Speaker, kan Home Department hi a khawngaih thlak hlein ka hria a ni.

Pakhat chiah ka sawi leh ang a, Pu Dy. Speaker. DM&R changtu Minister hi a vannei tak zetin ka hria a, kei pawh kan sawrkar lai khan kum 5 zet ka lo enkawl tawh a, sum leh pai hi a hrampain a awm hran lo nain hei, SGMRF-ah hian kan hun lai khan 14th Finance Commission-in vaibelchhe 18 min pe a, tunah hian 47 crore a lo thleng a, nikum atangin. Chutah chuan mitigation-ah 20% hman a la phalsak leh nghal a, chutah chuan 9.4 crore kha mitigation-a hman theih a ni hi a vanneithlak tak zetin ka hria. Hei hi a hma kha chuan engemaw chhiatna a thlen zet loh chuan fund kha a hman theih reng reng lo a. Tunah chuan mitigation lo inven lawkna atan vaibelchhe 9 lai mai a awm ta hi a vanneih thlak ka ti a.

Lawngtlai District Civil Hospital thlanga KMNTP Road-in a tihchhiat avangin tuna project siam nghal a nih loh chuan, kei pawh uangpui chang lo i la, kum nga ka lo enkawl ve a, Phullen, Mamit, Khawzawl, Hunthar Veng, Lawngtlai, Saiha ah te leimin tamtak a awm a, DPR kan vawm thla teuh mai a ni; a rawn chhuah tak erawh chu a har khawp mai. Hei lai Hunthar pawh hi kan buaipui khawp mai. ‘Lamkal’, Zawlpala koh thiam ang deuh te pawh intirh a ngaihna chin te pawh a awm a ni. A tawp ah hei, sawrkar thar a lo chhuak hlauh a. Lawngtlai Hospital cheng nuaih tam taka sak khi tuna kan tih loh chuan a chhe mai ang tih hi a hlauh awm em em a. Chuvangin mitigation fund atang hian a dan leh dan lo deuh pawhin thawh ni hram hram se, RCC-in retain-a dal a nih loh chuan a min leh a hlauhawm dawn em mai a tih kha ka sawi duh chu a ni.

A dawt leh ah chuan Silpouline kha MLA zawng zawngin an sawi vek mai a, Pu Ruatkima’n a sem thin a, ke pawh han puah viau ka tum lain silpouline lehkha ka hmu a, tlemin a kang dai deuh a, kan mamawh a ni. Tin, mak deuh mai chu, tunah hian a te ber atanga a lian ber thleng hian silpouline hi kan mamawh a. Ka bialah phei chuan silpouline an neih chuan an hmang phal lo a, chhuar ah te an dah a. Silpouline an dil a, an hmuh zawh loh chuan, ‘silpouline em pawh hmuh zawh lo chu’ an ti a, vui tak an ni. Chuvangin silpouline hi lei leh ni sela. Pu Rintluanga bial ah phei chuan concrete building saknan an hmang tih kha tak tak a nih ka ring a, Aizawl khawpui angah chuan a ni lo ang a. Keini bial angah chuan an lawm em em a, mau hnah kan chih a, chu chu a lo rawp a, chumi khuh nan chuan an hmang a, thlamuang takin an chawlh theih phah ve a, chuvang chuan Pu Dy. Speaker, kan Minister hian leih leh dan kha zawng hram hram sela, mipuia pek anih loh pawhin MLA chinah tal hi chuan, kan sawrkar ve lai Minister ka nih ve lai kha chuan session a piangin bandle 5 vel hi, ruling leh ruling lo pawh, CM thlengin kan za vaiin, kha ngang pawhin i dawn kha, Pu Dy. Speaker, i lawm theih thin em kha, khatiang lawmnna siam kha a tha ni. Pu Dy. Speaker, hun min pek belh avangin ka lawm e.

DEPUTY SPEAKER : Ka han hrethiam deuh che anih kha. Tunah chuan Member zahawmtak Dr. F. Lalnunmawia ka sawm ang a, a sawi zawh hian kan Group

Leader, Pu Zodintluanga Ralte lo inring nghal mai sela. Awle, Dr. F. Lalnunmawia i sawm ang.

DR. F. LALNUNMAWIA : Pu Dy.Speaker, ka lawm e. Khua a tlai lam a kan nguai deuh hlekin a hriat a. Hun thatak min pek avangin lawmthu ka sawi a, kan Minister zahawm tak Pu Robert Romawia Royte leh Pu Lalchamliana te Demand sawina hun remchang mi pe hi ka lawm a. A hmasain Pu Robert Romawia Royte chan hi ka sawi hmasa ang a.

Demand No. 22, Sport & Youth Services tawite ka sawi duh chu, kan Minister hmalaknain Sports lamah hmasawnna hmel thar kan hmu zut zut a, a lawmawm hle in ka hria. SEDP kan keu let chuan, “Sport discipline hrang hrangte eizawnna tling khawpa hmang tangkai thei tura thalaite chherchhuah tum a ni ang” tih dah a ni a. Hlawhtlinna hmelthar kan hmu a, kawng kan zawh fuh chho hlein ka hria a. Thalaite discipline hrang hrangah eizawnna, hmasawnna an hmuh chho zel ang tih ka beisei a. National level-ah chauhlo pawh, international level-ah pawh hlawhtlinna kan hmu chho zel ang tih ka ring a. Hetianga Sport promoter Minister kan nei hi lawmthu ka sawi a ni.

Tin, budget kan en hian, budget piah mai bakah hian thil tam tak a awm zia hi a takin kan hmu tawh a. Budget a tlem leh a tam ai mahin budget piah lama hai luh a pawimawh zia kha a takin kan hmu tawh a. Hna nasatakan kan thawk mek a, sport lamah kuminah pawh nasatakin hmel thar kan hmu ang tih ka beisei a.

Mahni bial han sawi ta i la, ka bial chhungah hian football ground thar turte kan nei a. Chutih ruala ka sawi duh chu, Aibawk-ah sawn RD hnuaih NACPR atangin Mini Sport Complex siam a ni a, zawh a la ni lo a. Kum kal ta khan Covid-19 hrileng avangin chawlsan a ni a, tunthlengin chhunzawm a la ni lo a. Kan Minister zahawmtak hmalaknain chhunzawm a ni leh thuai dawnin kan hria a kan lawm hle a ni tih kha ka tarlang duh a. Tin, Football lamah, a bik takin Aizawl District Football Association-ah kan lo awm ve a, District football hote pawh kan lawm a, District hrang hranga football khelmual thar an awm chho te hi kan lawm hle a ni.

Tin, No. 43, Tourismah hian hmasawnna hrang hrang kan hmu a. Pu Dy. Speaker, hmanni ka zawhna chhannaah khan Tourism Developmentah hian Hmuifangtlang leh a chhehvel atan crore 250 project siam a ni tih kha kan hmu a, kan lawm hle a. A hlawhtlin hun ah chuan nasa takin sawlai tlangdungah sawn khual zin mite hipna tur hmun tha leh nuam, thalaite tan pawh hmun nuam tam tak kan siam dawnin kan ring a, kan beisei a, kan lawm hle a ni. Ka bial saw Tourism lamah hotspot a ni a, bial tawntirh atangin Hlimen ah Lalsavunga Park kan nei a, Aizawl khawpui thalaite tlaiah leng an tam thei em em a. A piahan a indawt phei zut mai a, Hmuifang, Sialsuk tlang thlengin nasa leh zualin thalaite tan pawh kan develop ka ring a. Tin, a piahan Sailam a lo awm leh a, hmanlai Lal Bengkhoaia khuaah pawh hmun nuam tak tak a awm a, develop tlak an ni tih kha ka sawi leh duh a. Tin,

Adventure lamah nasatakin hma kan sawn a, Eco-tourism lamah nasatakin hma kan sawn a, kan lawm hle a ni.

Tin, Demand No. 48, ICT hi tawi tea ka sawi duh chu, ICT lamah hian hma kan sawn nasain ka hria a, Covid-19 len lai khan nasa takin ICT tangkaina kan hmu a, internet leh network tha zawk te kan nei chho zel a, chutih rualin Covid-19 pandemic len laiin online meeting leh video conferencing hmanga meeting kan neih nasat zia te leh MCovid-19 leh Mpaa tih te kan hmang tangkai nasa a, heng zawng zawngah hian ICT department tangkai zia kan hmu a, a lawmawm hlein ka hria. Chu chu tawi tea kan Minister zahawm tak Pu Robert Romawia chana ka sawi theih ni sela.

A dawt lehah chuan Home Minister zahawm tak Pu Lalchamliana Demand-ah hian ka han lut ang a. A hmasain Home Department, Demand No. 16 hi tawi tea ka sawi duh chu, Pu Dy. Speaker, Home Department nen pawha inkaihhnawih a nih ve tho avangin kan MLA zahawm tak ten an lo tarlan tawh, kan thenawm Myanmar ram buaina chungchanga Chief Minister zahawm tak hmalakna chungchang kha kan tarlang ve leh lawk duh a.

Hei, democracy lam hawiin an kal chho a, an ram ralmuan lain kei pawh ka han kal ve tawh a, Myanmar ram chhungah. A nuam a, Zo-hnahthlak unaute kan han hmu a, hmun nuam tak mai a ni a. Chutihrual chuan, harsatna an han tawk chho a, Myanmar-ah democracy tundin leh anih theihna turin buaina karah mi tam tak mangangin an awm a. Buaina a sosang zel a, CDM thlawptu sipai leh civil mi raltnante an awm belh zelin a lang a ni. Hengah hian kan Chief Minister zahawm takin Pa chan changin heng kan unau raltnante Mizoram-a dawnsawn a inhuam thu leh an ei leh in leh chenna turte ngaihtuahsak a inhuam thu a sawi te kha ropui hlein ka hria a. Hengah hian Mizo hnam hravaitu, Pa chan chang kan nei tih hi a langin ka hria a, a thlamuan thlakin ropui hlein ka hria a ni.

Tin, Home Department-ah hian sum, budget kumina kan dah chu duhthusam a nilo maithei a, chutihrual erawh chuan a tul angin Home Department-ah hian Police tihhmasawnna tur sum hi pek belh ni se tih hi ka rawn rawt duh a. A bik takin ka biala Sialsuk Police Station hi tihhmasawn a ngai a, quarters leh police hmunhma vel te a lo tlabal tan tawh a, chu chu kan Minister zahawm tak pawhin min lo chhinchhiah sak se ka duh hle a.

Tin, Kulikawn Police Station hi Aizawl chhim lampang hovin kan hmang tangkai a, hmannah pawh jail tangte phurhna tur motor an mawmawh thu te Police hotute hnenah an lo thlen tawh a. Chuvang chuan, Aizawl chhim lam zawng zawng enkawltu Kulikawn Police Station saw motor tha deuh hlek peka tihchangtlun kan dilpui a ni.

Tin, Pu Dy. Speaker, kan Police-te an fit-in an hriselna pawh a lo tha ta hle a, sawrkar kal ta hun chhungte nena khaikhinin kan Police-te an felfaiin an fit em em a, ramri tea duty-in an huaisen a, thenawm ram te pawhin min zuam ta lo deuh tih te pawh kan hmu a, a

lawmawm hlein ka hria a. Hri leng karah, ram ri buai leh lirnghing karah te kan Police-te tangkai zia kan hmu a, tin, Covid-19 lock-down lain zan rei tak tak thlengin Police an duty a, Traffic Police chenin an inpekna leh an hah ziate kan hmu a, fak an phu ka ti a. Heng zawng zawng khaikhawmtu kan Home Minister zahawm takin a hun takah thil ruahmann a siam thin hi fakawm ka ti a, lawmthu ka sawi duh bawk a ni.

Tin, Demand No. 8, Taxation Department hi tawi tea ka tarlan duh chu, budget-a kan hmu angin kuminah chhiah lak belh thar a awm lova, chutihrual chuan chhiah lak dan tha kan nei sa a, heng chhiah te hi thahnem ngai taka kan lakkhawm hi a tulin ka hria a. Kum hniih/khat kalta khan chhiah pelo sumdawng enge maw zat an awm tih kha CAG report ah a lo lang a. Chhiah te pawh rinawm taka kan peka, tin, a department pawhin thahnem ngai taka chhiah an khawn hi a tul hlein ka hria. Delhi Sawrkar-in mipuite tui leh electric free-in a pe tihte kan hmu a, hengte pawh hi an chhiah lakkhawm atanga an pek ve tho kha a ni. Chuvang chuan chhiah hi a tangkai em em a, keini pawh chhiah thahnem ngai leh zuala kan khawna, mipuite pawhin thahnem kan ngaih chuan sawrkar tan zel a ni a, thil tam tak a ti thei a, hemi hmang hian kan thawk thei a ni tih kha han tarlan ka duh a ni.

A tawp nan Pu Dy. Speaker, DM&R chungchangah hian, hei leilungah chhiatna hrang hrang a thleng fo a, heng atana inbuatsaihna tura sum dah a ni hi lawmawmin ka hria a. Mitigation Fund, chhiat rupna thleng thei laka invenna te leh a thlen palha inchhawmdawl na tur sum dah a ni hi lawmawm hlein ka hria a. Tun hnaiah ka bial chhungah In kang pahnih leh huan kang pali kan nei a, hengah te hian chhawmdawl na kan han dil ve a, amaherawhchu, sum harsat lai anih vang te pawh a ni ang a, thil tih zung zung a nilo deuh a, hengah te hian rang zawka inchhawmdawl theih ni se tih te kha ka han rawt duh a ni.

Tin, Aizawl chhim lam kawtchhuah hlauhawm, Thakthing kham leh Ngaizel kham saw han tarlan leh hram ka duh a. Hei, fur a ni leh dawn a, furah lung tla a awm fo avangin mipuiten an hlau thei hle mai a. Hengte hi min enhian saka, a concerned department ten kham lung tla tur awm thei ang chi te min enfiah sak leh theih chuan vanduaina thleng thei kan pumpelh theih nan min ensak thei se tih kha ka tarlang duh bawk a ni.

A tawp berah chuan, kan Minister zahawm takte pahnih Demand hi pass anih theih nan phur takin ka han thlawp a ni e. Ka lawm e.

DEPUTY SPEAKER : Awle, dar 5 a la ri chiah lova, han inkoh lehna hman a awm tawh lo turah kan ngai dawn em niang? Kan chawl rih ang a, dar 5:30 PM-ah luh leh i tum ang u aw.

5:30 PM

DEPUTY SPEAKER : Awle, tunah chuan Group Leader zahawm tak Pu Zodintluanga Ralte i lo sawm ang.

PU ZODINTLUANGA RALTE: Pu Dy. Speaker, ka lawm e. Kan demand sawiho ni thumna a ni a, karleh tluan kan la bei dawn a, helaiah kan hun leh tha zawng zawng kan seng a, rorel turin. Kar lehah ni thum kan bei leh dawn a, Pu Dy. Speaker, a ho khawp mai. Vawiinah nilengin kan chai a, Minister te demand kan sawi a, kan Session chhung a demand kar leha kan neih leh tur zawng zawngha pawh sawrkar hnathawk salary chiah hi kan pass dawn a ni a, ram hmasawnna tur thil pass tur pakhatmah a awm lo a, a zahthlak khawp mai. Heti hian sawrkar sum tam tak kan seng dawn a, member ten sawrkar hnathawk salary chiah pass tur hian kan hun kan hmang a ni. Hei hi chu sawrkar kalphung tur a ni lo a ni.

Vawiinah hian ruling party te hian he kan Demand-for-Grant te hi an keu ve lo emaw ni chu aw ka ti a. Member zahawm tak Lengteng bialtu phei kha chuan kan Sports Minister hnenah khan Ngopa Tennis Court siamna tur te kha a dil a; kan Demand-for-Grant hi Minor Works-ah a nil a, Major Works-ah a nil bawk a, dil tur a awm lo, engmah dil tur a awmlo; an au thlawn mai mai a ni; a zahthlak lutuk. Hetiang mai mai a Budget kan han hmang hi chu Pu Dy. Speaker, a kalphung a nilo a ni.

Tin, Demand No. 22 hi, Sports Department hi kal lo se, hnathawk lo se kan ti emaw ni; MLA tam takte an bialah infiamnate, an bialah thalai infiamna tur football leh sports materials te an mamawh ve a, chung leina tur kumkhat atan cheng nuai 3,50,000 chauh a awm mai a ni. Engtin nge sawrkar a *run* ang, engtin nge kan Minister hian hna a thawh ang? Hnathawhna tur pakhatmah a awm lo a ni.

Chutiang chiah chuan department dang zawng zawngha han en a, sawrkar hnathawk salary chiah kan budget-ah hian a awm a ni. Kan sawrkar hian engtin nge kumin hi min kalpui a tum? Nichinah kan member zahawm tak Lawnglai West bialtu sawi ang khan, *Dictator* kalin kan kal a ni. Vawiina sum awmchhun chu Finance Minister-ah a awm khawm a, a tlawn peih leh a dil peih, a tlawn thiam thiam khan an dil chhuak a ni mai. Hetiang tur hi chu a ni lo, Pu Dy. Speaker. Kan ram budget-ah hian eng development nge kan pass pui tur a awm lo reng reng a ni.

Demand No. 22, Sports & Youth Service hi, nakinah lawm takin, kutbengin Ruling Party chuan an beng leh ang. Enge ni ben chhuah tur awm, football field pakhat pawh an bengchhuak dawn lo. Sawrkar hnathawk hlawh chiah a ni an ben chhuah dawn. Chuvang chuan kan kalphung hi kan thlak a tha ka ti khawp mai.

Amaherawhchu, Minister fachuam deuh te, duhsak deuh te an awm a nih chuan supplementary-ah hian a rawn vum leh thur ang a, ‘a va tam em em ve’ kan ti leh ang tih chu a hlauhawm khawp mai. A chhan chu vawiin ah member ten kan pass tura ka lo ngaih chu, Sports Department-ah hian hmasawnna tur heti zat pawisa an dah a, chung chuan khawilai hmunah nge thalaite hmasawnna tur atan ruahmanna kan siam ang, hmasawnna a awm ang, vawiin a kan pass tur hi zero a ni si a. Kan Sports Minister hian Chief Minister

hnenah kan hmasawnna tur atan a khawnpuiah a va dil dawn; vision awm lo sawrkar hmannah ka sawi kha, vision a awm lo. Min kaihhruai tum dan hi Ar khawthim dai-in kan kal a ni; a buaithlak khawp mai. Kan Minister te hi a tuk atangin an zin bo vang vang thei, hnathawh tur an nei lo. Serchhip Bye-election tur vang hian tiang hian an ti zawk nge niang a, hnathawk hman lovin. Ni 17-ah a zo ang a, Minister-te an bial lamah an liam sung sung mai ang. Kumdang ang sawrkar dan pangngaih chuan Budget Session a zo a, kan department chan theuh ah Finance atangin sawrkar in pawisa engzat nge min pek kan ti a, official-te nen kan han thukhawm a, khawiah nge kan priority sector, sawrkar flagship programme atan engnge kan tih dawn, thalaite khawvel atan engtin nge hma kan sawn dawn tiin dawhkan kan kil ho ang a. Chutiang chuan sanction an move ang a, Planning leh Finance-ah te an kal ang a, hmasawnna turin ro an rel dawn a ni. Vawiin ah pawh hian Minister pahnih demand kan pass dawn, kan pass zagh hian tih tur engmah an nei lo. Sawrkar hnathawk hlawh kha ti khan kan pass pui a, budget ho tak chu a ni; a ho khawp mai.

Chuvang chuan han sawi vak dawn pawhin sawipui tur hi a awm lo reng reng, Minister-te kan dilpui hi a ni ringawt mai a ni; kan dilpui mai loh chuan hnathawh tur a awm bawk si lova. Chuvang chuan, Pu Dy. Speaker, Supplementary Budget hi pass lovin nakumah an rawn pharh leh ang a, keini member ten kan pass loh, kan chai loh min rawn barh lui leh dawn a ni. Chutiang ang chu budget tha leh sawrkar tha in a tih a ni ngailo a ni.

Tin, vawiin hian Sports-ah hmasawnna result tha tak takte kan hmu a, kum hnih chhung inchherchuah chi pawh a ni emaw ni le ka ti a. Naupan tet atangin ‘catch them young’ hnuiah an zirtir a, chung zirtirna rah chu vawiinah a lo thleng hi a ni. India rama kan champion theihna chhan hi, mumal tak, thui taka lo kal tawh, khelmual tha neih avanga vawiina champion thei kan ni. Kum hnih chhunga champion tur inchherchuah theih a ni lo, hei hi chu khawvelin an hria a, thil kalphung pawh a ni lo.

Chuvang chuan, ‘lawmthu sawina tur’ an han ti thin a, kan lawmthu sawina tur hi ban khur pakhat pawh la laih loh vek a ni. A lungphum kan duh tawk a, bial hrang hrangah hian lawmthu an han sawi a, khatiang pawisa kha a takin rawn thleng se la, han hawng i la, chungah chuan member-ten lawmthu han sawi se la a lawmawm leh zual tur a ni a. Tunah chuan a thuin kan la kal a, a thuah lawmthu sawina kan nei a ni.

Tin, PMJVK-a ka sawi ve leh duh chu, PMJVK-in a tum member tam tak ten an sawi tawh a. Minority area-ah mi harsa zawkte education-ah te, health-ah te, social life-ah te, sports-ah te, skill development-ah te chung minority area-a an hmasawnna tur atan central sawrkar-in scheme a rawn ti a ni. Amaherawchu, tunah chuan vaibelchhe tam tak District capital-a khelmual siamna tur, a guideline-ah a theih alawm han tih, a guideline-ah chuan a theih mai a, mahse a tum a thelh rih a ni vawiin niah chuan. Chuvangin hengte pawh hi a lawmawm rualin, Member dangte’n an sawi tawh ang khan kan ngaihpawimawh zawk tur minority tak tak, zirna thate, tui intur thate, health sector thatna turte khatiangah khan

vaibelchhe tam tak kha kal zawk ni se chuan a ropui leh zual tur a ni a tih kha ka rawn sawi duh a ni. (*Speaker-in Chair a la.*)

Demand No. 16, Home Department-ah hian tawite sawi ve leh ka duh a. Kan ramah nikum lamahte harsatna kan tawk a, kan thenawm state te nen kan buai a, kan ei leh bar luh kawng ten min dal a. Chutih lai chuan khawchhak lama kan unau te'n kan mangan zia an hria a, kan harsat lohna turin ei leh barah engkim an inhuam thute an rawn sawi khan Mizo mipuite thla a muang em em a ni. Vawiinah harsatna an tawk ve leh a, kan sawrkarin a tih chin pawh a lawmawm ka ti a. Amaherawhchu, Zoram mipui ang pawhin, “kan sawrkar pawhin Central guideline a nghak a ni” tih order kan han hmute chu rilru a na a ni. Kan unau te an ni a, harsatna an nei anih pawhin “kan unaute u, engtik lai pawhin kan welcome a che u. Central sawrkarin a ti emaw, ti lo emaw inhnungah kan ding a ni. Ei leh barah in harsa a nih pawhin kan rawn thawn chho ang che u” kan ti tur zawk a ni tih kha ka rawn sawi duh a.

Tin, hmannah ka sawi tawh a, MNF sawrkar-ah hian sipai hi an inluling em em reng mai a, Assam Rifles tak ngial pawh kan ngam hlei thei tawh lo a ni a. Tunah chuan Assam Rifles-in a ti tih hi sawrkar ngaihdan a ni deuh ringawt tawh mai a. Khawiah nge kan sawrkar, Democracy kan ni a, mipuiin sawrkar kan neih chuan khing Assam Rifles-te chu ‘in tih tur ti rawh u, Mizoram sawrkar-in kan tih turah lo inrawlh tawh suh u’ kan tih ngam ve hun a nghahhlelawm khawp mai.

Tin, Member tam tak ten an sawi ramri chungchangte kha, kan sawrkarin 1875-ah ramriah kan pawm an ti a, hei hi a pawm mai mai nge ni a, 1875 ramria pawm hi luah kan tum tak tak em tih te pawh hi hriat a chakawm khawp mai. Tukin lamah kan ngaithla a, member zahawm tak takte an inchhuanna ber chu, tuna kan awmna chinah IR Police kan dah tih kha a ni a. 1875 ramri pawm si khan kan IR dahna kan pawm a hi a chhung khawp mai. Tin, Zophai leh hmun hrang hrang Saihapui V-ah te pawh inchhuanna tur kan nei lo. Chuvang chuan, ramri chungchang hi tuna sawrkar chuan sawi sawi ve tur anni lo, inchhuanna tur pawh a awm lo, sawi tak tak chuan kan duh loh chen chen kan sawi ang tih a hlauhawm a.

Demand No. 8, Taxation-ah hian ka kal leh lawk duh a. Taxation hi kan hriat theuh angin kan ram, kan hnam kan kal chhohna tur engkim mai phuhruk tu a ni a. Anmahni avangin sawrkar hnathawh te, development te a kal ve a ni. Department pawimawh tak a ni a, heng hi tun aia chak leh zuala siam hi kan sawrkar hian, (department hrang hrang an pawimawh lo e kan tih na a ni lo a) department tam takah sawrkar hnathawk a sang a sang tel te an dah laiin Taxation Department hi kei ka ngaihdanah chuan kan tih thata kan tih chak chuan department danga harsatnate hi a phuhruk zawk dawn a ni. A letling zawngin kan kal a, sum hmu tu bera hi kan ngaihthah leh si chuan awmzia kan nei dawn lo. Minister zahawm takin nakin a min react tura ka duh chu, hei, GSP Regime-ah hian bungrua State hrang hrangah check gate tam lutuk avanga motor kal hleih theih loh, insumdawn tawnna

harsa lutuk tih ziawm nan check gate tih tawp vek tur a ni a. Keini kan ramri Vairengte-ah khuan check gate chi hrang hrang khu a la tam lutuk a, heng te hi tih tawp kan tum em tih kha min rawn hrilh turin ka duh a.

Tin, pawi ka tih leh chu Covid avangin harsatna chi hrang hrang kan tawk a, kan hotute, kan sawrkar lamin an thusawina apiangah harsatna an sawi pawhin ‘Covid vang a ni’ tih hi a ni. He Covid vang hian mirethei, miharsate pawh a nghawng a ni, Pu speaker. Amaherawhchu chung mirethei, miharsate ti harsa leh zual turin petrol leh diesel man kan han ti sang mauh mai hi chu, kan tih loh tur niin ka hria a. Heng atang lo pawh hian tax lakna tur tam tak a awm a ni. Petrol leh diesel chuan mi zawng zawng kan ei leh bar, kan thil phurhna zawng zawng a nghawng avangin, hetianga Taxation Department-in, a department changtu mawh chu a ni lova, sawrkarin petrol leh diesel-a tax a tisang hi chu han tihniam thei tawh se la tih hi ka rawn ngen duh a.

Pu Speaker, a tawp bera tan chuan Disaster Management-ah hian tawi te ka sawi ang a. Nimin lamah te ka sawi tawh a, Kolasib District bikah kan harsat, kan mangan laiin Kolasib-ah mi tlawnmgai ten kan mi leh sa, kan unau state dang atanga rawn haw, Covid hri a len laiin, hri an kai dawn nge dawn lo pawh hre lovin motor-in an phur a, chaw ei an lo siam sak a. Khang zawng zawng a bat te kha kan han chhui chiang a, ‘Disaster Management lam atangin sum kan hmu lo’ tih te a lo ri leh a. Khang kha Pu Speaker, khawngaih takin hei hi Disaster Management mawh nge Finance lam atanga pawisa kan hmu lo zawk tih hi Minister zahawm takin min hrilhfiah turin ka ngen bawk a ni e. Pu Speaker, ka lawm e.

SPEAKER : Member zahawm tak Pu Vanlalhlana ka sawm e.

PU VANLALHLANA : Pu Speaker, ka lawm e. Mizoram hi Mizo mipuite ta a ni a, kan chhehvela kan unau Zohnahthlak zawng zawnge In pui a ni. Tin, a chhunga cheng Mizote pawh hi Nu leh Pa chan chang tur kan ni a, chu chu Pathianin min ruat dan pawh a niin ka hria. Boruak hi a inthlak a inthlak a, tun hma chuan Mizo in ti duh lo Zohnahthlak zingah te pawh an lo awm thin a ni. Amaherawhchu hun alo kal a, chung Mizo hnathlak lo inti duh lote chuan ‘Mizo ka ni’ tiin Mizoram lam an lo hawi a, an harsat an manganna an rawn thlen a, theih ang angin Mizo mipuite pawhin Mizoram chhunga mite pawhin kan lo tuamhawm a, kan in tanpui a, chutiang chuan hmangaihnain kan inkuangkuah tlang a ni. Manipur-ah Gangte te, Vaiphei te Mizo hnamah an inchhal tawh a, tin, kan hriat lar vaklo thlang lama Mizo hnathlak hnam 5 lai kha an chenna ram chawpa Mizorama in rin luh duh khawpin Mizoram an rawn ngai a ni. Tunah kan unaute Myanmar-ah hrehawm takin an awm a, tukin zing lamah khan East Tuipui lamah chawhma lam khan mi 20 vel ral tlan an lo kal a, Champhai lamah an phei a, chawhnu dar 2, 3 velah khan mi 163 an lo tlan thla leh a, chung chu engtin nge an awm zui zel dawn kan hre lo a. March Ni 3 khan kan Home Minister zahawmtak bial khaw pakhat ah refugee mi 4 an rawn tlan lut tan a, tichuan an pung zel a tunah 20 an ni a. DC te, Police te, BDO ten an tlawh a, community hall ah an riah tir a,

khawtlangin vehbur khawnin an chawm ringawt mai a ni. Engchen nge an chawm theih ang kan hre lo a. Engpawh nise chutiang chu an dinhmun a ni a, chutiang hun harsa an tawh lai chuan kan House Leader-in statement a siam a, “Kan unaute tan Mizoram a him a ni; kan theih tawpin kan pui ang,” tih ri te a ngaihnawm em em a, chung chuan a tung nung a, huaisenna leh chakna pawh a pe chho niin kan hria a a lawmawm a, lawmthu pawh ka sawi duh a ni. *Himna kulhpui* nih hram pawh an tan hian kan tih tur leh kan mawhphurhna pawh a niin ka hria.

Demand No. 16, Home-ah hian a bul tan nan Homeguard chungchang kan sawi duh a. Mizoram Homeguard-te hi UT tirh atanga piang ve an ni a, institution upa tak te pawh an ni ve tawh a ni. Tun hma chuan Homeguard-te hi koh nawmnah, tih duhdah te pawh an hlawh chin a awm a, amaherawhchu tunah chuan mihring kan changkang tawh a, homeguard volunteer-te inpekna te pawh kan hre tawh a, force dangte nen ang khat te pawhin kan en chin a awm a. Tunah pawh hian Mizoram, Mizo mipuite tan an tangkai em em a, bank hrang hrang vengtu an ni a, FCI kudam zawng zawng vengtu an ni a, DC residence-ah an duty a, Central Jail leh District Jail zawng zawng an veng a, Chief Secretary Bungalow-ah an duty bawk a, Power Grid Corporation an veng a, All India Radio an veng a, traffic police puitu an ni a, tun Covid hripui len lai khan frontline duty-ah an awm bawk a ni. Chutiang khawpa tangkai chu an ni a, chutiang khawpa tangkai an ni chung chuan hlawh an nei lova, lawmman erawh chu beitham tak, tlemte an nei thung a ni.

India ram pumpuiah Homeguard te hi volunteer tih an ni a, lawmman hi an hmuh tlem em avangin Supreme Court pawhin an mahni chhawmdawlna tur leh an lawmman a tipung a, police personal maximum pay, chu chu basic pay+grade pay+DA+washing allowance te hi ni turin a fix a, chu Supreme Court thu chu India rama State 23 te hian an zawm tawh a, Homeguard hian constable hlawh tlem ber hlawh phak thei tur angin order a chhuah a ni. Hei hi state 23-in an zawm tawh a, Mizorma hi ala zawm lo state 13 zingah kan tel ve hlauh mai a, chu chu kan Homeguard volunteer te pawh hian an vei ve hle a ni. Amaherawhchu 19th March, 2019 (nikum) khan he House-ah hian zawhna kan zawt a, Supreme Court thu hi Mizoram hian zawm a tum ve em tiin, chutih lai chuan ‘sawrkarin a ngaihtuah mek’ tih a ni a. Tunah zawhna kan zawt leh a, chutah chuan, ‘Department chuan a remti tawh a, finance clearance a awm hun hun ah hei hi tih pun a ni ang,’ tih kha chhanna a ni a, a lawmawm khawp a. Kan finance changtute pawh an awm a, chu chu khawngailh taka min lo hriatpui turin ka ngen duh a. Homeguard ten an duh ber chu sawrkar hnathawh ve a ni a, homeguard-a an experience atanga an theih ang tawka department hrang hrangah luh theihna chance awm ang te an melh ve reng a, chung chu hriain 2010 rules, office memorandum pawh tichhuah a ni a, chuta a lan dan chuan Police lak turah 10%, Excise & Narcotic Department-ah 5%, Forest Guard ah 5%, Prison ah 5% chutiang chuan an rules-ah hi chuan an dah ve thlap a ni. Amaherawhchu recruiement siamtu, a latu department RR-ah Homeguard te hi quota pek tur a ni tih hi a lang ve ta tlat lova, chuvangin hna thar an lak reng rengah khan, an la ve ta lova, Prison-ah pawh 2010 atangin 40 an la tawh a, mahse Homeguard an tel ve lova, Forest te, Excise ah te an luh ve theihna chance ah khan an lut

ve thei rih lova, chu chu sawrkar, Home Department hian khawngaih takin min lo ngaihtuah sak thei se tih kha kan han ngen hmasa duh a ni.

A dawt lehah chuan Police Department hi ka sawi duh a. Unstarred Question ka zawhna-ah khan, “Mizoram-ah sawrkar hna ruak engzat nge awm” tih chhanna chu, ‘Hnaruak hi Mizoram sawrkarah 14,000 chuang a awm a ni’ tih kha a ni a. Police Department-ah hian (ka hresual maithei a, Minister-in a dik zawk min la hriattir ta se) 3,500 vel hi hnaruak a awm niin ka hria a, chuti anih chuan Mizoram a hnaruak zawng zawng 25% hi Police Department-ah a awm tihna a ni ta a ni. Mizoram-a hnaruak zawng atanga 25% chu Police Department tihna a ni; a dang 75% kha chu department dang 40 velin an insem darh tihna a ni a. Law & Order kengkawhtu an ni a, hetiang em em a vacancy tam hi chu a pawiin ka hria a, Law & Order problem awm thei kan ni a, international border area kan ni a, chuvangin kan hotute’n hetiang em em lo deuh hian, police hnaruak hi a tul anga hnawkhat turin ngaihpawimawhah a neih thei lawm ni tih kha kan tarlang duh a ni.

A dawt lehah chuan, ramri chungchang kan sawi a, a lawmawm khawp a, kan ramriah buaina a awm zeuh zeuh a, amaherawhchu kan Police-te an huaisen em em a, anmahni avangin kan him thin a, amaherawh chu an duty post te, an barak te a chhe em em tih kan hria a. Member pakhat khan a sawi a, khulai phai area ah khuan IR battalion headquarter dah ve tur a ni tih te kha ka thlawp khawp mai, a tha ka ti, a tul a ni. Eng emaw thath thil thleng thei reng a ni, khulaiah khuan. Chuvangin Police tam zawkte buaina chingfel tura, leh Mizo mipuite tana security tling turin IR battalion hi a awm tha ka ti tak meuh a. Tin, lawmawm ka tih leh chu, 1986-ah *Memorandum of Settlement* signed a ni a, chu chu MNF party te leh India sorkar ten an signed a ni. Chutah chuan Mizoram ramri ni tura an sign hnana kha chu North Eastern Area Re-Organization Act, 1971 a mi ang kha a ni. Amaherawhchu, tuna sawrkarna neitute chu, 1971-a sign tute ngei, a lawmawm ka ti.

Tin, Demand No. 8, Taxation-ah hian ka kal ve leh ang a. Taxation Department hi sawrkar hnathawk department hrang hrang ten tha taka hna an thawh theihna tur atana pawisa tuakchhuaktu leh lakhawmtu a ni a, a tangkaiin a pawimawh hle mai. Tunhnaiah petrol leh diesel tihsan a ni a, mipui tan chuan phurrit a tling dawn tih a lang reng e. Amahrawhchu sawrkar pawhin a ti lo thei lo pawh a ni ang. Amaherawhchu, nichina kan ngaihthlak ang khan, heng petrol leh diesel man tihsanna a pawisa hi kawng siam nan hmang ta se thildang a hmang lovin, tichuan a petu tan pawh a pung zawng kha kawng repair nan leh a siam nana hman a ni tih a hriat kha chuan neitu nihna rilru nen, petrol man sang ang te pawh kha hriathiamna pawh kha thil awmthei a ni ang a. Chuvangin, road cess ang tepawhin kal ta se tih kha kan tarlang duh a ni.

A dawt lehah Disaster Management & Rehabilitation chung chang tawite ka han sawi duh chu, kan mangan nia kan pur department a ni a, chhiat tawk thin kan ni a, chungah chuan Disaster Management & Rehabilitation Department hi kan pur loh theih loh, kan pan

loh theih loh a nia a, an hnen atangin tanpuina a tul ang ang kan dawng thin te kha a lawmawm a.

Tichuan Sport Department-a ka sawi duh chu, Sport Department enkawltu Minister zahawm tak hi a chak khawp mai a, media lamah pawh a lar khawp mai a, Sport Department a chan atang hian *change* tam tak kan hmu a. Sports Policy an duang a, chumi hnuah Sport chu kan hriat ngailoh Industry a ni te min rawn tih sak ta a, ‘India ramah a hmasa ber kan ni’ tihah hian tlemin question ka pe deuh a. India rama State hlun zawk, upa zawk, lian zawk leh changtlung zawk tam takin tih nachang an hriat loh kha, State naupang te, a rethei ber khan Industry tihna chang kan hria kha, kan fing nge kan a aw, a thatna lai taka hi min hrilh thei se. Kei ina ka ngaiantuahna maiah hi chuan sports hi chu Mizo tawng chuan ‘infiamma’ kan ti thin a, Industry han tih hianin eizawnna, sports hian eizawnna a kawk deuh em tih te ka rilruah chuan a awm mai mai a, engpawh nise kan Minister in min hrilhfiah turah ngai ila.

R. Dengthuama Indoor Stadium kawtah open gym a awm a, kan Minister zahawm tak hian a hawng a, chanchinbu-ah te pawh kan hmu ang a. Kei pawh ka zuk kal a, state danga kan kal a kan hmuh thin a ni a, kan rama a awm ve kha a tha ka ti khawp mai a. Amaherawhchu, Information Department tena Press Release an siam ka en a, a sak man kha nuai 60 tih a ni a, site preparation-ah khan nuai 4 vel a ni a, a material kha nuai 56 man vel a ni ta a, chu erawhchu a to deuhin ka hria a, ka han enchiang a nuai 20 hi chuan a install theih a ni. Chuvangin a man hi a to uchuak hle mai a, hei hi chu a zialo deuhin ka hria a, a siam tu kha Arihan Company a ni a, Delhi Noida-ah khuan Arihan Company ni lemlo Company dang hian nuai 20 aia tlem hianin a material hi an pe thei a ni. Chuvangin, helai hi kan Minister hian han sawi fiah se.

Tin, ka sawi leh duh chu, hmanniah pawh ka sawi tawh a, a la chhinchhiah loh takin, Local Council inthlan dawn khan kan Minister zahawmtak hi kan constituency-ah a lo kal a, Durtlang North tlangval te nen inkawmin a hmunah te pawh an en a, Futsal hi a tiam a ni; chu chu a hriat tawhloh takin ka han remind duh a. Tin, field tha tak harsa lo taka cheihnum mai theih Brigade Field kan nei a, kan constituency chhungah, saw saw tha takin min han chei sak ve se, Durlang-ah field kan neih te pawh chei ngai em em a ni a, min han chei sak ve se tih ka duh a.

Demand No. 48, ICT chung changah hian, i dinglama thu MLA-te leh heti lama thute kan sawi a inang lo leh pek viau mai a. ‘School-ah computer min pe a kan lawm khawp mai a’ an ti vek mai a, veilam a thu te chuan pakhat mahin kan dawng ve lova, kar leh lamah chuan kan lo kal ve ang a, kan bialchhung School-a sem tur kan rawn dil ve dawn che a ni tih kha ka hrilh lawk duh che a ni.

A tawp berah Demand No. 43, Tourism Department-ah hian, Tourist Lodge kan nei nual a, department-in a enkawl lovin privatization a tul a ni heng hi chu, khawi khawi emaw

hi chu an privatize tawh tih ka hria a. Amaherawhchu, a vai hian privatization a tul niin ka hria; chutiang chuan tha takin an enkawl thei ang tih ka beisei a ni. Pu Speaker, ka lawm e.

SPEAKER : Tunah chuan Minister zahawm tak Pu Robert Romawia Royte, kan sawihona rawn wind up-a sawifiah ngai a tih te rawn sawifiahin, a Demand te House a pass rawn dil nghal se; ka sawm e.

PU ROBERT ROMAWIA ROYTE, MINISTER: Pu Speaker, ka lawm e. Zawhna leh sawite a tam a, 1:45 minute-ah ka zo hman lo ang tih ka hlau khawp mai a, a lar bawk a 1:45 hi. Engpawhnise, ka thiante erawh hi chuan an ning deuh nge ni, ruling lam hi chuan tawite in ti rawh aw an ti sap sap a, a tawi zawnga tih ka tum ang a.

Pakhatnaah kan sawi duh chu, Lawmthu a ni. Kan Member 23 laiin ka Demand Sports and Youth Services Department te, ICT Department te, Tourism Department te, a tam lo a tam loin in rawn sawi liam liam a. Nichina Group Leader zahawm tak pakhatin a sawi ang deuh khan, in thil sawi leh ka thil neih hi a intuha lo ang reng khawp mai a, a tlem leh kan buaipui a, a tam leh kan buaipui bawk si a. Session ka tel ve hmasak ber tuma helai hmuna budget kan sawi ho khan ka chanpual tlem bik zia kha min sawipui nasa khawp mai kha a ni a. Ka tih ngaihna hrelo khan a tawpah phei chuan vai tawngin ‘dekhe ga’ ka han ti kha a ni a. Kan Chief Minister zahawm tak kaihruainain theih tawp kan chhuah ang a, ‘thut mai mai bik ka tum lo, *dekhe ga*’ ka ti kha a ni a. Vawiinah pawh khan a tlem thu te kha kan ngaithla a, engpawh nise tunah hian tihdanglam theih pawh a ni tawh lova, hei hi hriain hma kan la dawn chu a ni phawt mai a ni. Tin, a hma pawhin ka sawi tawh a, tlem te pawh hi hman thiam tho theih a ni a, tin, tlema bul tan thang ka ni hrim hrim kei hi chu, engpawhnise kan kal ve naw naw thei turah ka ngai a. Department officer-te nen a kan han sawihoa kan inrawnkhwam pawhin lunglohah leh hnualna turah kan ngai reng reng lo, ‘theih tawp chhuah a ngai dawn a nih hi’ kum hmassa lama kan lo tih angin kan ti leh mai a ni tih a hmasain ka sawi duh a.

Kan hmalak chhun chhunte min hriatsaka, insiamthat ngaihna lai tur chite, rawtna tha tak tak Member zahawm tak tak ten kan department chungchangah in sawi avangin ka lawm hle a. Keimahin ka chhinchhiah mai a ni lova, ka department pathumte hi abikin kan inruat a, vawiina kan MLA zahawm tak tak ten kan department chungchang a rawtna te, sawiselna te leh thil chi hrang hrang insawi kha kan lo record a, laptop-te nen a lo inchhawpin kan lo record a ni. Vawiinah hian react vek seng lo mah ila a bika he review meeting hi ka department pathuma Head of Department-te leh Secretary-te nen insawite theih ang anga tihlawhtling turin hma kan la ang tih ka sawi duh a.

Tin, computer chungchang a sawi hnuhnung bertu kan Opposition Leader Pu Vanlalhlana'n a rawn sawi kha, ni e, kan thil hi a la rawn thleng tlat lova, inphalrai hun a la nichiah lo naa, a advance deuh hoin engemaw an hria a an sawi kha lo thik lo ula, ka rawn pe liam liam ang che u ang a, a sema sem kha a ni chiah lova, school pakhatah computer set

7, accessories leh functional printer-te kan pe ve a, a zir nan leh thil danga hman tangkai theih a ni a. Opposition leh Ruling hi kan thliar ngai lo tih chu kan budget leh project neihna hmun atang pawh hian a hriat a. Tumah kan dawng lo ang tih ka sawi duh a ni.

Point khatnaa ka sawi duh chu, sawrkar hmasa hunlaiin kan Sports Minister, tuna kan Group Leader zahawm tak leh kan Chief Minister hlui hmalaknate pawh a ni a, nasa takin Sports Department-ah hma an la a, zawh hmante pawh tam tak an nei a, zawh hman loh pawh an nei a. Kan Chief Minister hian ngaihdan pui tak mai a nei tih ka sawi thin ang khan, heng sawrkar hmasain an lo tih ang chhunzawm emaw an lo tih hleih theih tawh loh, a scheme tawp vang emawa an lo chhunzawm tawh loh thleng pawhin a that chuan chhunzawm leh zel hi kan pu duh dan leh MNF party pawhin kan duh dan a ni a. Chutiang chuan keima department enkawl pathumah hi chuan theihtawp kan chhuah ve tih ka sawi duh a. Bul an lo tan tawh tha tak a zawh pawh kan nei a, an lo pamtul deuh tawh, a scheme tawp vanga hmalak chhunzawm tawh loh, kum khat dawn an lo chawlhsan tawha funding source dangte dapa han chhunzawm ang chi te pawh kan nei a, chu chu Tourism Department leh Sports Department-ah pawh a ni tih ka sawi duh a. Tute'n emaw New Capital Complex-a Aizawl Indoor Stadium lung an phum thlap tawh, Pitarte Tlang, Republic Vengthlang-a han suan daih ang chi te, Lammual-a Governor leh Chief Minister te'n lung an phum tawh RG Stadium a suan daih engemaw thar deuh anga tiilan kha kan policy a ni ve lem lova. Keini chuan sawrkar hmasate'n an lo tih kha kan chhunzawm mai a ni.

Pu Ngunlianchunga, Lawnglai West bialtu zahawm takin Lawnglai field a sawite pawh kha 7 or 8 August, 2018-a hawn kha 2019 August pawh khan a sanction kha Delhi-ah kan la um zak zak a ni, dem thu an cheng chuang lova. Ka sawi awmzia zawk chu, an hunlaiin an hawng tawh a, buaipui pawh a ngai lem em ni ti zawngin kan ngaihtuah lova. Kan hotu hmasate'n an lo hawng tawh si a, installment dang lo chhuak thei lo, contractor-te manganna hi solve tum teh ang tiin central Minister-te pawh ka hmu a. 2018 August-a hawn kha 19th September, 2019-ah sanction order kan rawn hawn a. Chutiang chuan sawrkar hmasa nen tha taka indawhzawm kan duh a, hma kan la a ni tih ka sawi lang duh a ni.

Zauva Memorial Tennis Centre, Lunglei-ah sawn tha deuh mai, sawrkar hmasa lama bul tan chhoh kha Minister ka nih ve pawh khan ka tlawh vat a. Chutiangah pawh chuan thui tak an lo kal tawh a, an ruahman dan pawh a tha viauin ka hria. Phur takin kan chhunzawm a, hawn theihin peih a ni ta a. Kan Chief Minister zahawm tak hi Lunglei-ah Mizoram State Sports Academy lungphuma a kal dawn tho avangin nichin khan min hawn sak la ka ti a, a ni chuan, "Pu Hawla ten hawng zawk se a tha ang em, lo rawn la" a ti a. Kan Chief Minister thin Pu Lal Thanhawla pawh tel ve se tihte kan sawi dun a, a tel theih pawh kan ring a. Pu Zauva, Pu Mama brother-in-law, Pi Rosie pasal kha a ni a, a hriatrengnate pawh hi ropui taka hawn pawh kan tum a, hawn tlakin a tha bawk a. Chutiang chuan hma kan la a ni tih kha thil dang a ka pakai hmain ka han sawi duh a.

Tin, department hrang hrangin Sports Department tan hian hna an thawk nasa a, a hre fuh chiah lo te'n, 'Sports Department hi department hrang hrang sum hi a huikhawm vak vak mai a' te kan ti mai mai a, khatiang lam kha a ni miah lova. UD&PA chu urban infrastructure siam tur an ni a, urban infrastructure chu sawrkar hmasa lam atang pawhin nasa takin an siam a, Sports Department atan pawh UD&PA-in nasa takin tan an la a. Chutiang tho chuan tuna UD&PA Minister, kan Dy. Chief Minister zahawm tak pawh hian Sports Department-ah hma a rawn la a.

Keia tih a ni lova, kan Deputy CM zahawmtak nachang hriatna leh kan thalaite mamawhna hria a Urban Area-ah chuan che vel a ni tih te hi kan hriat a pawimawh a. Tin, RD Minister zahawmtak Pu Lalruatkima pawhin hmalakna tamtak a nei a BADP ah te, chumai piah lamah Sports Complex hawn mai theih hmanni lawka hawn te pawh a awm a, hawn leh mai tur te pawh ala awm zel a. Sports hi Minister mimal pakhat maiin, 'hei chu ka ta, ka pa hawn' han tih mai chi a ni lova, chuvang chuan sawrkar hi chu kan ta a ni tlang a, indal zawng emaw, kan hung min rawn daiah emaw Sports department hian kan ngai reng reng lova. Chutiang bawk chuan funding source chungchangah pawh, sports kha chu Allocation of Business Rules-ah Sports te, Sports Stadium chi hrang hrang te kha Sports Department ina kan tih ve tur a ni a, a sum hmuhna tur zawn pawh kha kan mawhphurhna a ni a. Kan pu berin Mizoram Budget a tam tawklo tih hriain Union Budget-ah sum a tam tih hmuchiangtu, Mizo zingah chuan a hmu chiang bertu a ni ang em aw ka ti, chutiang chuan ama kaihhruainain kan zo a. Tun hmaa Sports Department ina sum an lo hmuh ngai lem lohnaah te kan han hmu a, nuaih 275 te chu nise kan buai lo ang a, PMJVK-ah pawh hian heti tak hian kan ti lo ang a, amount a tam deuh avanga engemaw taka kan sawi vel pawh hi a dik chiah lo deuhin ka hria a.

PMJVK, hman atanga thil lo awm tawh MSDP thlakna pawh hi kum rei fe a ni tawh a, a hming hi. Mizoram-in sum kan hmu thalo em em thin tih hretu ka ni a, a hmuh dan tur te pawh hi theih ang anga han ngaihtuah ve ka ni a. Youth Sector-ah te pawh chuan thalaite tan he scheme-ah hian sum hmuh theih a ni tih te kan hria a, project te kan siam a, kan umzui bawk a, tiang chuan sum te kan han hmu a min lawmpui liam liam a, a lawmawm ka ti a.

Tin, khaw tam takin tunah hian phur tharna te an nei a, facilities tha tak tak te pawh hi an nei dawn a ni tih ka sawi duh a. Ka department-a officer pakhat phei chuan, "Sir, Ministry of Atomic Energy atang te pawh hian Futsal Ground siamna tur hi kan hmu thei anih chuan a pawi chuang hlei nem maw le. Khawi atang pawhin hmu ila an sawisel theih a ni hlei nem" te min ti fiamthu a. Chutiang chuan kan sawrkar hian PMJVK scheme kan hmang tangkai hi kan zavaiin kan lawm a ni tih te pawh ka sawi duh a. Allocation of Business Rules bawhchhiatna lam aiin a tih hlawhtlinna a ni tih hi he House zahawm takah hian ka sawi duh bawk a ni.

Tin, National Education Policy chungchang hi member te thusawi ka react hmain ka sawi leh lawk duh a. Hei, National Education Policy hi a hma atangin Sports Minister ka

nih angin comment te leh eng eng emaw ni hi min rawn tih ve nasat avang leh consultation te leh minister-te sawihona hial te siam anih avangin engemaw chen ka hre ve a. Helaiah hian Sports te, Games te, Arts leh Crafts chi hrang hrangte hi a dah pawimawh khawp mai a National Education Policy thar hian. Kan Minister zahawm tak phei chuan chiang zawkin sawi sela, ani tawngkam te a lo thiam deuh a, a ngaihnawm viauin ka ring a. Council of Ministers meeting-ah te pawh kan Education Minister zahawm tak ruahmannain briefing pawh department lamin an rawn nei tawh a, chutianga thil pawimawh chu a ni. Chulaiah chuan kan hriat ve mai maiah, Sports hi enge anih tih kan hriat zel nan pawn a thani ka hria a. National Education Policy-ah hian “English” tih tawngkam hi a document pumpuiah hian vawi 5 chiah a lang a, “Sports” tih tawngkam hi vawi 30 a lang a ni. Chuvang chuan, Education leh Sports hi kan in hnekhnaih tir viau a ngai a, “Mathematics” tih hi vawi 27 a lang a, India ram ina zirna a kal chhoh pui danah hian tel ve te pawh kan tam zel dawn niin a lang a, ‘Inclusive Education’ kan lo tih fo thin te pawh hi a takin a thleng ve dawn tawh ni te pawn a lang a. Chuvang chuan Mathematics tuin emaw a zir ang khan games ah te emaw, physical activities te pawh nakinah a la rawn ti chho zel turah ngai ila, *policy document* a la ni mai a, mahse hemi zul zui hi chuan central sawrkar leh state zawng zawng hi kan kal chu a la ngai ang a. Chutiang ang zawng chuan ngaihtuahna zau tak helaia member te hian kan put a pawimawhin ka hria a. Sports Minister ka nih vanga sawi pawh ka ni lova, Sports Minister ka nih hma daih pawhin sports leh education te integrate a tul zia te, *integrated education* a tul zia lo ngaihtuah ve tawh thin ka ni a, chuvang chuan helaia sports ringawt ti leh thil dang ti lo ti ang chi zawng kha chuan in tih chi anih lohna lai a awm a. A hrim hrimin kan sawrkar hian sports hrim hrim hi a ti reng reng lo, sector tinah leh department tinah hian theih tawp a chhuah a, sports aia hma la nasa leh hma la lian hi department hrang hrangah hian an tam a ni tih te pawh hi ka sawi duh a. Kan sawrkarin eng hi nge a ngaihpawimawh tih chu kan budget bu kha en ula, kan resource neih ang ang allocate a nih danah khan kan sawrkar ngaih pawimawh chu a lang maiin ka hria a. Chutiang a nih laia ‘Fachuam’ han in tih bik ang chi te, ‘CM-in a duhsak’ han tih ang chi te hi, kan group leader pakhat phei hi chuan a hrat mah mah deuh em aw ka ti a. Kawng lehlamah chuan kan pu hian min duat ang tho hian ka duat ve tho a nia.

Vawiin chu ka hun a ni bawk a, ka han sawi ang a, Finance-ah te pawh hian kan han chhunglut ve ham ham ani a Sports Department hian, ‘both ways’ a ni kan sum kal vel dan hi, a nuai, sing chuang te pawh hi kan han chhung lut ve a, Finance te pawh hi an lawm ve thin a. Hetiang zawng hian Sports Department hian tan kan la tih hi ka sawi duh a. Hmanniah thawi deuh takin ka sawi a, hetia kan theih ang anga hma kan laka hlawhtlinna te a lo awm hian, a phenah leh a kaihhnawih advantage tam tak hi a awm thin a ni tih hre vek tu kan ni. Kan hriat angin GST-ah 12% a ni a, infrastructure-ah 50% kha State chan a ni a, 1% kha infrastructure-ah reng reng chuan Labour Cess-ah a kal a ni tih kan hria a. Sports Department, department te reuh te pawhin hetianga kan han hmuhchhuah ve ang ang a taka hmalakna te a awm a, hlawhtlinnate a kal chho zel turah ngai ila, approved tawh leh approval minute te awm vek tawh, a tam zawk chu sanctioned tawh te anih avang hian a tak pawhin a lo thleng vek turah te ngai ila, la realease kim lo mah se. Heng atanga sawrkarin a sum fai,

a sum a hmuh tur hi nuai sangthum chuang lai hi a ni ve a ni. Chuvang chuan, 10% a tum ve tur kha chu a tam ang a, a sak chhuah tur pawh kha a tam dawn a lawm. Tin, a scheme hi a then lai chauh in sawi duh a, a scheme hi in zir chiang thoin ka ring a, gap filling project angah chuan kha scheme-in project a neihna ang sharing system kha a ring ang tih a ni a.

Entiran, *Khelo India* ang chiah District Sports Complex emaw, District Stadium emaw sak tur a ni a, ‘upto 50 crores a theih ang’ a ti ringawt a Sports Ministry chuan. A sum kha an neih leh si loh avangin kha kha ‘gap’ a ni ta a ni, India Sorkar Financing System-ah chuan. PMJVK khan Centrally Sponsor Scheme emaw Centrally Sector Scheme emawa *gap* a neiha kha a va breach theih avangin PMJVK kha breach turin kan ti ta a. Khelo India Scheme-in chu chu a tih theih ang a tih sum an neih si loha kha, externally funded atan te hian scheme an nei niin ka hria a, kan Sports Ministry hian fing takin khatiang khan scheme a duang a. An Budget-ah chuan sum chu a awm lo, mahse a funding ti duhtu ministry emaw, foreign funding emaw, private partners emaw khan an rawn funding duh tana *gap* chhut theih nan khatiang kha a awm thin a, chutiangah chuan gap filling project ang chi khan eng emaw zat hi chu kan identify a. Kha kha Khelo India Scheme-ah chuan 100% funding anih avangin a gap filling-na tur atana a concern scheme sharing system kha a tawm ang tih anih avangin tunah hian thutlukna tak leh anmahni atanga sanction engmah chu kan la hmu lo naa, a tam zawk hi chu 100% a ni thei ang em aw tih hi kan ngaihdan leh kan bargain dan chu a ni tih kha ka sawi lang duh bawk a ni.

Tin, PMVJK guidelines hrim hrim hi kan chhiar tho a, kan sawi duh lai kha eng emaw te lai kha a ni thin a, a project hi a line department-in a siam ang tih a ni a. Chu mai a ni lo a, a execute ang tih a ni. A project hi Mizoram State Sports Council chuan nguntakin kan ngaihtuah a, Mizoram State Sports Council Act-ah khan Sports Council hi Works Department, construction pawh ti thei, management pawh ti thei anih angin sawrkar hmasa awm tawh zawng zawngah MNF sawrkar hmasak laia Act hi siam a ni a, Congress a rawn sawrkar lai pawh khan Mizoram State Sports Council hi Construction Department angin a function vek a, keimahniah pawh hian, kan detail zawng zawng pawh kan thawn thla vek a, approval kan dil a, Mizoram State Sports Council hi PMJVK keimahn Sports project-a implementing department atan min rawn pawm thlap a ni tih te kha ka sawi duh bawk a ni.

Tin, Dr. Vanlalthlana, Aizawl North-II bialtu MLA zahawm takin Residential School te pawh School Education-in an manage ang tih kha a dik a, chu chu kan ruahman dan pawh a ni. A manage kha chu a sak zawh tawhah a ni a, kan Minister zahawm tak nen pawh vawi tam tak kan sawi a, Chief Secretary hoa committee-ah pawh sawiho a ni a, empower minute-ah pawh a rawn lan kha. Helai hi thui deuh sawi tur a awm nain tawi tea han sawi ka duh a. Residential School hi EMRS lo awm tawhna block levelah dil a harsat avangin, kan duh bawk si a Sports adopted School leh Sports School atan. Chuvang chuan, Sports School angin rawn identify ula, chutiang chuan rawn dil ula mi ti a, chutiangin Sports School anga kan dil a ni tih kha ka sawi duh a. DPR-ah pawh detail takin a awm a, football field a awm ang tih te tailoring centre a awm ang tih te, chi hrang hrangin a awm a, ka sawi

vek seng lo a. Education Department hmunhmaa sak chu W. Phaileng-ah leh Kawrthah-ah a ni dawn a, Education Department-ah a kal mai turah ngai ila. A bak erawh hi chu Sport emaw PPP mode emawa kan kalpui a that ka ring a, chu chu Mamit, Lunglei leh Lawngtlai-ah, khawpui hmunte a lo ni a, education hmuna sak a ni dawn lo a, PPP Mode-a rawn tihchak tak tak pawh hi tunah hian Sports School *run* chak an awm mek tawh a ni tih pawh kha ka sawi tel duh a ni.

A tawi zawngin PMJVVK hi dan ang thlap a DPR te siam a ni a, dan ang thlapa rawn sanction a ni a, dan ang thlapin kan implement dawn e, quality pawh maintain kan tum khawp mai. A bialtu concern zawng zawngte ka ngen duh chu, a hna te a tam a, a lian a, uluk taka monitor a ngai dawn a, hengah hian kan official-te, DC leh a hote leh block level ah pawh set up a awm a, khangte bakah khan a bialtu MLA te chu public leader leh mipuite aiawh kan nih angin a building sak hmangah te leh thil hrang hrangah min lo monitor pui a, lo intitatu viau tur pawhin ka sawm duh che u a ni.

Tin, Pu C. Ngunlianchunga, Lawngtlai West bialtu MLA zahawm tak sawi kha a pawimawh riau mai a, ka theihngihlh hmain, “PMJVVK hi Lawngtlai khawpui, Chawnhu leh Bungtlang South-ah te chuan kan mamawh vak hlei nem, a thlang lam deuhah” tih kha i bial mipuite kan lo rawn ang a, Lawngtlai khawpuia College Veng te, Chawnhu te, Bungtlang South te kan lo dah tumna ‘suan mai rawh’ a tih kha Ministry lam te pawh kan zuk be rawn leh ang a.....

PU C. NGUNLIANCHUNGA: An niin suan an phal chuan, mahse, Lawngtlai College Veng te khan suan an phal ka ring lo reng reng a ni. Pu Speaker, khawngaihin ka hming a mention takah chuan, kan mamawh ber a ni lo e, kha aia mamawh kha kan nei a ni ka ti a ni. A awmdan chu Pu Speaker, minority area, concentration area tiha minority tak zawk te chu Lawngtlai thlang lam amite an ni tih zawk kha ka sawi a ni.

PU ROBERT ROMAWIA ROYTE, MINISTER: Ngawi rawh, ‘minority’ tih hi ka han hrilhfiah ang che, mizote pawh hi minority vek kan ni. Religious minority anih chuan Mizoram-ah chuan Mizote chu minority kan nei thei lo, religious-ah....(interruption).. Ngawi rawh, Minority Commission-in a sawi fiahna hetah hian a awm vek a lawm.

PU C. NGUNLIANCHUNGA: Chutiang anih chuan engatinge Champhai te, Kolasib te, Serchhip te, Hnahthial te, Khawzawl te, Saitual-te an tel ve loh, chu zawk chu. MSDP kan kalpui lai pawh khan chu chu guidelines anih avangin tunhma phei chuan Lawngtlai khawpui chhunga dah phei kha chu an remti lo hrim hrim zawk.

PU ROBERT ROMAWIA ROYTE, MINISTER: Ka sawi fiah chuan a rei mai thei a, mahse a tawi zawngin ka han sawi ang e. Minority tih hi hrilhfiah dan tam tak a awm a, mahse Minority Commission hi India ramah chuan a thuneitu an ni. National Commission for Minority Act, 1992-in ‘minority’ a tih chu ka han chhiar lawk ang e, “At present, 6

communities namely – Muslims, Sikhs, Christiasn, Buddhists, Zoroastrians, (hei hi ‘Persis’ tihna kha a ni mai a) and Jains has been notified as minority communities under section 2 (c) of the National Commission for Minorities Act” tih a ni. Mizote hi ‘christian’ kan nih chuan minority kan ni em em tih hi ka sawi duh a.

PU C. NGUNLIANCHUNGA: Pu Speaker, Mizoram-ah chuan christiante hi minority kan nilo, anih chuan kan Chief Minister zahawm takin D.O. letter a pek proposal in zuk thawn tlak pawh an remti lo a ni lawm ni, a area a ni lova?

PU ROBERT ROMAWIA ROYTE, MINISTER: Pu Speaker, khalaia a bawp lawka lak ringawt chi kha a ni lova, minorities awmna rau rauah khan parameters tam tak a awm a, hei hi a guidelines a ni a, nangpawhin i nei tho a, literacy rate chungchangah te, female literacy rate chungchangah te, work participation rate te, female work participation rate te, percentage of household with self drinking water, hetiangah hian lo hniam sela chuan Champhai pawh khi minority a ni mai dawn a, Aizawl pawh hi minority a ni mai dawn a ni.

PU C. NGUNLIANCHUNGA: Chu tak chu a nia ka tih, khatiangah tak khan Lawngtlai khawpui aiin minority-ina a tum zawk chu... (**SPEAKER :** *Ngawi lawk rawh u; helai hi rawn address rawh u, nangmahni kha inhnial lovin aw.*) Pu Speaker, khulai backward bik, minority bik entirnan Tuichawng te, Pu B.D-a bial te, ka bialte; Lunglei khawpui vang a ni lo, khatiang tuiin turah te, in leh loah te, khawsakna hrang hrangah khan, kan duh zawngin kan pawt rem mai mai a ni.

PU ROBERT ROMAWIA ROYTE, MINISTER : A va nuam ve, “Minority community is in majority” tih lai pawh hi a ril fuin ka hria a. Kei pawh DPR siam lai pawh khan ka ngaihtuah a, minority community kha majority an nihna area-ah, chutiang anih chuan 15% a ni tih te, hetah hian detail deuhin a awm a, uluk deuhin hei hi kan zir a, chumi zir chuan kan ti a, an lo tih dan pawh hi a dik thlap a, 2011 census base-a an tih a ni. Chuvang chuan, Chhingga Veng, ka bialte pawh saw heng an tehnah hian lo hniam ila chu, 100% christian pawh ni ila minority concentration area-ah an rawn puang ve ang a, hetiang benefit hi kan dawng ve thei.

PU C. NGUNLIANCHUNGA: Chuvang reng chuan a lawm, Pu Speaker, chumi an tehnah atang chuan tuna kan sawi area te kha an rawn tlanna chhan chu, chu zawk chu a ni. Lawngtlai khawpui ai chuan a thlang kha tuna kan mamawh hi, entirnan IAY, MSDP atanga kan tihte pawh khan Lawngtlai khawpuiah rethei tak tak chu an awm ve, mahse khutah chuan Rangva-In chu sawi loh, Di-In, Mau -Ina awm an nih avang khan kha mite chawikanna atan khan kan ti reng a ni. Pu Speaker, a tum dik tak pawh a ni; khatih lai khan kan Minister zahawm tak Pu R. Romawia hming han lam ila, ani pawh khan, “minority hi inhnial theih viau a ni, keini pawh India ramah chuan Christian-te minority kan ni tho a sin maw le” a ti a. Mahse he scheme-in a tum tak chu a rawn chhiar chhuah ang chiah khan, mi

rethei zawkte leh thinglang mi harsa zawkte chawikanna tur scheme zawk a ni, Pu Speaker. (**SPEAKER : Awle, Minister kha tibuai tawh suh u.**)

PU ROBERT ROMAWIA ROYTE, MINISTER: Hei hi uluk taka zirchianga thil tih a ni a, ‘minority in majority’, minority ni chung sia majority nihna criteria te kha a awm thlap mai a, he thil an lo tih dan hi a fel khawp mai a tih kha ka sawi duh a.

Tin, district headquarter kha district headquarter an nih ang khan an district chhunga minority concentration area a awm avang khan district headquarters kha an ‘eligible’ ve a ni tih kha ka han sawi duh a. College Veng te, Chawnhu te pek kha i duh loh viau chuan kan lo inrawn tha leh ang a.

PU C. NGUNLIANCHUNGA: Pu Speaker, khalai kha ka duh lo viau lam nilovin kan mamawh zawk chu kha aia thlang lam hian an mamawh zawk a ni, chawikan an ngai a ni, ka duhlo lam nilovin; keini chuan kan bialte kan ngaihtuahna vang zawk a ni. Khalaia consultant firm Mizoram ami pawh nilo te nena sum siam tumna ringawt, Guwahati mite nena inmawngzawma thil tih hi a tha lo a ni kan ti zawk a ni.

PU ROBERT ROMAWIA ROYTE, MINISTER: Pu Speaker, House zahawm takah hian serious taka thil sawite pawh a ngaiin ka hria, keini ina project-te plan-te kan siam lai hian Lawngtlai lama awmte pawh kan rawn a, kan bialtu MLA zahawm tak Pu H. Biakzaua phei chu a thawk hah em em a, DC nen an kal kual a, thil hmanhmawh thlak kha a ni si a, chutiang bawkin VCP te, mihrang hrang....

PU C. NGUNLIANCHUNGA: Pu Speaker, MDC inthlan dawnah remchanga hmanga enkual pui a ni deuh mai lo maw, khalai te pawh kan hre ve a lawm. Lai District Council ah MDC Election kan nei dawn a, kei pawh bialtu ka ni ve a, concentration area chhunga MLA ka ni ve, he House-ah hian Pathian leh mipui zarah ka awm ve, min rawn ve em kei, rawn tlak ka ni ve lo em ni, “thlei bik kan nei lo ang” titu Minister kha engatinge a tawngkam a danglam leh thin? Thudik i sawi ang.

PU ROBERT ROMAWIA ROYTE, MINISTER: Engpawh nise, helai chhung lo ah te pawh kan inbe zel thei a, sawlaiah a awmna tur atana lo inngaia phur tak takte an tam tawh a, Lawngtlai khawpui chhung leh a chheh velah te, Bungtlang South leh hmun dang dangah, chuvang chuan helaia kan thawm te hi an hriat chuan kum 2023 Election boruak te pawh hi a khawih danglam ang tih te pawh a hlauhawm a, chuvang chuan sawi thui tawh lo mai ila... (*Interruption*).....

PU C. NGUNLIANCHUNGA: Pu Speaker, khalam kha chu, kan hmaa awm chu mipa kan ni a, kan do ngam ang, kan su ngam ang tih lo hre rawh se. A ngam chuan amah pawh lo kal rawh se, *dekhe ga*, chu chu a ni mai. Chuti vakin kan hlau lo, thil tha kan duh chuan a thih pawh kan thi ngam a lawm.

PU ROBERT ROMAWIA ROYTE, MINISTER: Chuvang chuan, engpawhnise inrawn a tul leh kan lo inrawn ang a, sawn te pawh an lo duh zawk em tih te pawh zawh a ngaih leh, a ngai kher pawhin ka ring lo a, an phal lo bur tawhin ka ring a.

Tak takina, fiamthu deuh te pawh inngam thilah kan han ti bawrh bawrh a min hrethiam ula. He project hi chu a tha thlawt a ni tih hi a tawi zawngin ka sawi duh a. Sum kan hmuu ngai loh naah sum kan han hmu ve hrim hrimte pawh hi a lawmawm khawp mai tih kha ka han sawi duh a ni.

A vaia ka react chuan a rei lutuk deuh maithei a, ka sawi ang khan kan chhinchhiah vek a, hmalak ngaiah chuan hma kan la zel ang tih ka sawi duh a. Mahse han sawifiah ngai ve deuh chi, han sawifiah te pawh a sawitute'n han react an phut laite kha a awm a. Pakhatnaah chuan Pu C. Lalsawivunga, Aizawl South-I bialtu zahawm takin, "Allocation of Business Rules a kall a, hetiang a awm laia Ministry dang danga Sports-in sum in lalut thin hi" tih lam deuh niin ka hria a, kha kha chu ka sawi tawh a, nichinah khan. Hetiang hi Allocation of Business Rules kall lam a ni lo tih kha ka sawilang duh a. Tin, PMJVKY tih te pawh kha a ri a, tunhma Session-ah te khan lo ri lo ri tawh thin se la Mizoram hi kan changkang deuh tur a ni a, a lo ri tam ngai lo a, engpawhnise a lawmawm lamah ngai ila. Tin, kei leh ka department hi chuan, in hre vek a, Mizoram sawrkar-ah budget tam kan nei ve lova, Sports lamah thalaite an tuihal a, mamawh a tam si a. Sports mai a ni lova, youth development lam te, hostel te, thalaite mamawh phuhrukna tur hi a tam si a, kan budget-ah sum a tam si lo a, a theihna ang angah sum kan zawng thin a, kan la zawng zel dawn a ni tih ka sawi duh a ni.

Tin, Pu V.L. Zaithanzama, Aizawl West-I bialtu MLA zahawm tak rawn sawi rik, a thusawi rawn sawi hawnnaa, "Sports Minister-in ramri chinfel a ti a, Assembly zawhna a chhanna-ah ramri chinfel chutiang kan hre lo a ti leh bawk si" a tih lai kha, helaiah khatiang zawhna in rawn zauwchhuak hlauh kha a lawmawm ka ti khawp mai a, social media ah eng engemaw hi react ka duh lem lo a. Ni 27 January, 2021, Republic Venga ka thusawina ah, 'Ramri buaina Mizoram sawrkarin a handle dan te, tunhmain zirlaite ramri vengin an thawk chhuak a, police leh a force zawk te an tawmim a, an kut phuar an ni a, an ke phuar a ni a, chuvang chuan zirlaite'n an ti lo thei lova, zirlaite leh YMA te, thalaite'n ralhuam nei lovin hma an tawn thin a. Vuak an tuar a, silai thlenga kah te an tuar a, hetiang dinhmunah hian kan Chief Minister leh kan Home Minister huaisen tak hmalaknain, khatiang ang kha ni tawh lovin Pu Zoramthanga sawrkar hnuah chuan ramria buaina a lo chhuah a DC ho meuhin thlamte an rawn hal a, thlaite an suasam a. Covid hripui len lai laia motor lo lut tur te an dang a, road block rei tak an tih khan sawrkar force te an che a. Mizoram luah chin pawh tunah hian a zau hret a ni tih kha function-ah ka sawi a. Ramri, boundary line chungchang kha function-ah vawikhatmah ka sawi lova, boundary line chingfel tawh anga rawn post tu pawh, 'A ti' rawn ti tu pawh kha kalphung thar lam atangin a ni tiin kan naute'n an sawi a, kha bawk kha a hnuah ...*(interruption)*...

PU C. LALSAWIVUNGA : Pu Speaker, social media-ah khan chiang takin a lo lang a, a post tu chu thuhran lo ni se la, “Ramria buaina awm hi Mizote duh danin chinfel a ni” tih kha an rawn ziak dan a ni a, a sawi zo chiah a ramriah buaina a rawn thleng leh a ni zawk. React tura ka beisei bawk kha ka sawi nghal ang a.

SPEAKER : Ngawi lawk rawh u. He House-ah hian social media hi kan base thin a, heta awm te sawi hi thudik zawk a ni tih hi hriat tur a ni a, tun hnuah reng reng.

PU ROBERT ROMAWIA ROYTE, MINISTER : Pu Speaker, a video record hi ka la kawl vek a ka thusawi tluan parh kha, chuvang chuan an en duh chuan a en theih a. Ramri, boundary line chungchang kha ka sawi lo reng reng tih kha ka sawi duh a. Tum aiin kha thil kha social media thil chhuak atangin party PR te eng eng emaw inpuhmawhna a awm a, a pawi ka ti khawp a. Keimah hrim hrim hi chuan ngaihdan tawk ka thiam ve zel mai a, mahse zawhna a awm takah chuan ka sawifiah a nih chu.

Tin, Er. H. Lalzirliana'n Lengpui-ah te, Rajiv Nagar leh Rawpuichhip-a project-te hi engnge kan thlen chin tih a rawn zawhna kha, hei hi sawi chakawm loh deuh deuh te pawh a awm a, mahse sawi a ngai tawhin ka hria a. Lengpui ah khuan Minister ka nih hlim khan hmalakna a awm a, inthlan dawn hnaih chhoh vela Tourism Department atanga hmalakna nia ngaih a ni a, tin, nih pawh a ni a, ti mai ang. Sum sanction dan kan han en a, cheng khatmah sanction a awm si lo a, chuvang chuan kal zel chi kha a ni lo a, ‘ti tawp rawh u’ pawh ka ti chuang lova ti khan a tawp zui mai a, chu chu Lengpui a project tawp ta anga a bialtu zahawm takin a sawi kha a ni a. Eng emaw ni chu tih uaih chu a awm a ni, mahse khata tana sanction kha pakhatmah a awm loh avangin khawi khawi a mi emaw sum hman tumna te pawh a lo ni maithei e, kha kha a kal zel ta lova, a kal zel loh chhan kha chu khata tan khan sum a awm loh vang a ni.

Tin, ‘Rajiv Nagar-ah Tourist Lodge a awm a, maintain a ni mang si lo a, thawktute an awm lo’ a tih pawh kha, Rajiv Nagar atan hian sum sanction cheng khatmah a awm lova, Ministry of Tourism atangin, mahse sak chu a ni a, hawn te pawh a ni a. Fel zan lo deuha ngaih theih thil a awm avangin staff han dah pawh department lam tan hian a remchan loh deuh hlekna lai kha a awm a. Tin, enhian deuh ngai tih ang chi deuh a department pawh ina a chhuanchhe zawnga han tih rup rup phei chu kan duh lo ang, mahse enhian deuh ngai thil a ni a, sanction awm miah lo a sak a ni. Chumi awmzia chu khawi emaw lai sanction a ni mai ang em tih te chu ngaihtuahnaah a awm a, hetiang thil hi kan official te han zawh sek sek pawh hi ka hreh thin a, dik tak chuan.

Tin, Pu Zodintluanga Ralte zawhnaah khan thil lang a awm a, han sawichhuah takah chuan Tourism chungchangah khan. (**SPEAKER:** *Ngawi teh, Sports kha i zo tawh em ni, Tourism-ah i pakai daih si a?*) La zo lo e, a hming ka ziah tlar ang zawng hian ka sawi a ni. Kan han sawi pawlh nawk nawk a mahse fiah deuh deuh zelin ka rawn sawi ang.

Chal lang Tourist Lodge atanga Durtlang ropeway chungchang kha, hei pawh hi 2018 MLA inthlan dawn tep khan nuai 1220 bawr vel, (a zah chiah ka hre ta lova) hmanni zawhna chhannaa rawn sem vek tawh kha lo ennawn leh ula a hrechiang duh chuan. Pawisa hi pek tawh a ni a, mahse hna an thawk bawk silova, chuvang chuan hei pawh hi a buaithlak khawp mai, kan official-te pawh an lu a hai khawp mai tih kha ka sawi duh a. Vawi tam tak warning te pea pawisa kir tura tih a ni a, tunah hian kan Legal Adviser ten case an zirchiang mek a, Lok Ayokta lamah nge kan thlen ang ACB lamah tih hi ngaiantuahna a awm mek a ni. Kan Legal Adviser te a tul chuan Law Department te nen pawh kan la inrawn ang a, kha kha zawhna a awm takah chuan sawifiah a tulun ka hria a.

Chutiang deuh tho chuan Sakawrhmuaitlang-ah khian skywalk a awm a, khilaiah pawh khian engmah tih hma hian sum hi tam tak release a ni tawh a, kan hun hma khan ti mai ang. Kei pawh ka han kal tawh a, a tlangchhipah chuan ka lawn lo naa hnathawk turin kei pawhin ka tur a nasa a, hauh te pawh ka hau a, mahse progress a awm hleithei lova. Dan ina kawng a zagh mai hi chu heng velah hi chuan a ngai dawn a ni tih kha ka sawi duh a, sawi hrehawm tak, zawhna te a awm takah chuan sawi loh theih siloh thil a ni.

Tin, Pu KT Rokhaw, Tipa bialtu zahawm tak ina a sawi, ‘*Beino*’, Lai lamin ‘*Bawihnu*’ an tih bawk chungchang a sawi ang khan, hmun mawi tak a ni a, hmannah a thlalakte kengin Ministry lamah ka zuk kal kualpui a, Addl. Secretary pakhat phei chuan, “Rawn ti thla ula, hengte chu foreign ram kan tlawh huai huai thin tam tak ai chuan a mawi hi maw le, DPR te rawn siam ula kan lo en dawn nia” an ti a, kan naute’n tunah an ti vel mek a, a hmuna kal turte pawhin officer te kan intir a, an kal tawhin ka hria a. Beino (Bawihnu) te pawh ni e, ‘BB’ te hi ti mai ila tha mai em aw ka ti a, Mara ram leh Lai ram inzawmna lai anih avangin, helai hi hmalak kan tum e tih kha ka sawi duh bawk a ni.

Tichuan, Pu Vanlalhlana rawn sawi, ‘Gym kha a to deuhhlek em’ tih kha keipawhin a to chu ka ti angreng a. Hei hi kan la tih than loh te pawh a ni a, mahse kan official lam chuan a quality te competition hrang hrang tender-in hetia ti hi kan ni ve a, best quality anga ngaih a ni e an ti a, keipawhin ka zuk en a, a quality khu chu a tha thlawt a, Arihant Company a ni a, Arihant chu tha tak mai a ni a, chi hrang hrang a tam khawp mai a treadmill ang deuh hi a ni a. Treadmill pawh hi 2,80,000/- man te, 3,00,000/- man te, 6,00,000/- te, 5,00,000/- man te a awm a, pheikhawk ang deuh hi a ni a. Chutiang tho chuan phul lem te pawh hi a ni a, phul lem te pawh hi alo into hleih thei khawp mai a, chi hrang hrang hi a tam mai a. Chuvang chuan tuna kan Gym hi chu mipui lam chuan an lawm narawh a, an hmang tangkai a, zing atangin tlaiah thalaite fitness lampang ngaipawimawh an lo tam tawh a, mahse, “tih leh hunah chuan fimkhur taka lei tawh tur anih hi” tih Pu Hlana amah ngei a hmuna kala ngaihdan a nei pawh kha a tha ka ti khawp mai. Frank deuhin kan sawi ang, a quality chu a tha, tin, official lam atanga an sawi dan chuan a warranty rei a ngai a, warranty mai a nilo a maintenance hi. Maintenance miah lova market-a lei tawp anga lei anih chuan a rate kha chu a tlawm deuh ang a, mahse a maintenance kha anih loh chuan a technical angreng a, fit tur pawhin anmahn company engineer kher lo chu an pawm lova, chutianga

tih vel deuh chu a ni e an ti a. Chuvang chuan, a gym hrim hrim hi chu a tha ber chi angah chuan ka ngai a, mahse a rate hi chu competitive fitting zawnga mumal taka kal ai chuan hei ai hi chuan restricted mai lo deuh emaw a kal chu ni ila hei ai chuan a tlawm theih keipawhin ka ring ve khawp mai. Mahse nasa tak chu a ni kher lo ang. Nuai 20 tih vela kha chu a theih ka ring lo, khutiang khu chu a quality azir a ni. Nimin pawh khan Pu Mama Sports, Minister hlui nen hian kan sawi a, khu Hawla Indoor Stadium hnuiaia punching bag leh treadmill lo dah te khu a tha khawp mai a, a quality khu hmannah kan zuk en a, a rate pawh a to fang a, a tha law law tih hi chu a tha a nia tih hi kan lo experience tawh atang chuan, mipui hman luh luh tur ang hi chu a tha law law hi a tha tih hi chu kan ngaihdan deuh pawh a ni tih kha ka sawi duh a. Enchian ngai lai chu kan lo enchiang ang a, kan tih leh hunah chuan fimkhur nan pawh kan lo hmang ang tih kha kan Opposition Group Leader zahawm tak kha ka chhanna ni mai sela.

Tichuan, sawitu kha kan tam a, mi pathum laiin kan sawi a, a mal mala react dawn chuan a rei lutuk dawnin ka hria a. Pu L. Thangmawia rawn sawi heritage storage zawnga khilaia kan hnam sipaite sulhnu ang chi te kha a pawimawh khawp mai. Tin, Lengteng tlang, Mawmrang tlang tih te pawh kha kan chhinchhiah a, Pu B.D. Chakma in, ‘lungphum a ni a, engtin nge hma an lak’ tih kha, a hmunah te pawh va kal a ni a, tunah hian a material te chah mek a ni tih kha ka chhanna ni se. Chawngte kha a procurement lam zawng chuan hma an la mek e tih kha ka sawi theih chin nisela.

Tin, Dr. K. Pachhunga sawi Sairep tih kha ka hnenah lehkha pawh a rawn ziak tawh a. Kan Department zirchian tura tih tawh a ni a, thil dang a sawite pawh kha kan chhinchhiah e. Tin, Pu Lalrinsanga Ralte’n Vairengte Sport Training Centre a that zia leh climate te pawhin a zir a tih kha kei pawhin a hmunah ka zuk en tawh a. Tin, MLA ka nih hma pawhin ka hria a, khulai khu kan ngaihpawimawh tak a ni a, DPR pawh kan submit tawh a, a lo chhuah leh chhuah loh emaw leh a hun thu kha chu keima sawi theih a ni lo a, beiseina sang tak kan nei a ni.

Tin, Pu Lalrintluanga Sailo’n, “Kan chan phak ve loh tura kan ngaih kan han chang phak ve ta” a atih kha, an lawm ang tho khan department leh sawrkar lam pawh kan lawm tih kha ka chhanna ni mai se la. Tin, Pu Zaia kha nichin khan ka react tawh a. Tin, Pu Ramthanmawia, East Tuipui bialtu zahawmtakin Vangchhia a sawite kha pawimawh tak a ni a. Vangchhia khi ASI site a ni daih mai a, Mizoram-ah hetiang hi kan ngah lo a, kan hre reng, min rawn pui nan official-in lehkhaa an rawn tih hian kan ngaihpawihmawh lutuk a, DPR pahnih pathumah khilai bik khi chu kan tel e, sanction erawh chu kan la nei lo an tia nih hi.

Tin, Pu Zothantluanga, West-III bialtu zahawmtak ina a sawi zawng zawng kha kan chhinchhiah thlap a. Tin, agreement sign-a, privatized-a, a biala tourist lodge lo awm tawh ang chi te kha, agreement te lo sign-a term neia thil tih a ni a. Kha tia thial buai buai theih kha a ni chiah lo a, en that ngai ang chu kan lo en tha ang e.

Tin, Phunchawng football field a rawn sawi pawh kha tunah tihtheihna sum kan nei lo a, ‘Kan lo chhinchhiah e’ tih kha ka chhanna ni mai sela. Chutiang deuh tho chuan Dr. Vanlaltanpuia, Lunglei North bialtu zahawmtakin a sawi pawh kha kan lo chhinchhiah a, tourism a tih te pawh kha a hlut zia hi kan hmu chhuak ve zel a ni. Mithiam an ni bawk a, kan department chungchangah hian advice te pawh hi min pe fo a. Tunah hian foreign ramah Covid a la tam vek a, kan hriat angin nizan lamah phei kha chuan ram hrang hrangah a pung leh nasa a. Chutih mek lai chuan zin thin ho hian zin an thul thei chuang si lo a. A bikin Northeast lamah hian rawn kal nasat te pawh an duh a. Hman ni Tourism Ministry-ah ka zuk kal pawhin ‘in open deuh rawh u’ te pawh min lo ti a. Hei, kan in open zel a, a lawmawm a. Chuti lai chuan local tourist lam siamthat i rawn sawi kha kan pawm thlap e. Tin, Pangzawl Tourist Lodge kawngpui siam ina a tichhiat tih te kha, sum awmloh avangin kan intiam mai thei lova, kan lo chhinchhiah ang e.

Pu Lalrindika Ralte, Hachhek Bialtu zahawm tak ina a rawn sawi kha kan lo chhinchhiah thlap a. Vawiin chu ka lawm khawp mai a, a hma khan khulaia facilities kan dah thu kha pawmlo zawng khan ka lo ngaithla a, enga ti nge maw le ka ti a, khulama ding ve tura min lo ngaih deuh avang khan... (Dr. VANLALTANPUIA: Pu Speaker, a DPR ang zawng pawh khan Pangzawl Tourist Lodge kha chu min ngaihtuah sak thei lo maw?) A DPR kha chu kan siam thei mai ang a, engpawh nise state plan atang chuan kan ti thei lo phawt a, BADP funding hi kan beisei vemek a, chungah te chuan a rem chuan kan ngaipawimawh dawn nia. Pu Lalrindika Ralte in a ngaihdan a rawn sawi kha ka lo chhinchhiah thlap a, a chungah ka lawm hle a. Khu lama din tih te kha a sawi a, Aizawl East-II in min la phal lo nasa a, khu lama din kha ka la tum reng reng lo tih kha ka hrilh duh a....(Amah a awm lo ani maw?) Kan facilities a duhlo deuh emaw ni aw, te ka ti thar a. Aizawl East-II lamah hian kan la tui khawp mai tih kha ka sawi duh bawk a ni.

Tichuan, Dr. Vanlalthana zighthna leh a thu rawn sawi pawh kha kan chhinchhiah thlap a, kan vanneihna lam te pawh kha a rawn sawi a, kan lawm a. Central sawrkar te, state sawrkar experts team te ina ...

DR. VANLALTHANA : Pu Speaker, khatah khan rawn react se ka duh, state matching share kha engzatnge dah tur ni ta tih kha, ka han sawibelh lawk ang a, Pu Nguna pawh kha a buaina niin ka hria a. State matching share ah vaibelchhe 40 vel ngai dawn anga ngaih a ni a, kan neihsa te nena han tihrem dawn pawh khan, kan resource kha SEDP-ah vaibelchhe 400 a ni a, kha pawh kha nise a pawt hek leh duai dawn a, thil dangah kan mamawh bawk sia kha. Hei, Khelo India Scheme-ah 100% central assistance a ni a, vaibelchhe 9 leh a chanve kan dawn kha chu kan sawi tel miah lova, state matching share a pawt hek nasa si a tih kha min han hrilhfiah se.

PU ROBERT ROMAWIA ROYTE, MINISTER: Awle, Pu Speaker, chhan ka han tum ang e.

Nia, 90:10 ang chi hi chu a scheme a hi chu a vang a, sum hmuh zung zung pawh a har a, component thenkhat hi chu Khelo India gap filling anga min pawm sak chuan share kha a ngai dawn lova, a scheme-ah khan chiang deuha zir chuan a awm a, kahtiang bak kha a nilo maithei a. Engpawhnise, kan sawrkar leh kan CM ina a sawi thin, 90:10 ang chi hi chu harsa pawh nise sorkar tan hian a hlawk em a, mipui tan a hlawk bawk a, kan tithei zel turah ngai ila tiin kan CM zahawm tak pawhin a sawi thin a. State share-ah hi chuan harsatna lutuk awm lovin a tih theih mai ka ring a. Tin, 90:10 na nana hi chu that pawh a tha a. Chu chu state share chungchanga kan ngaiantuahna chu a ni a, vawikhata pek phut tur a ni dawn lova, a rawn release base a pek chhoh zel kha a ni mai a, vawikhatah an rawn release vek bik lova. Tin, sanction amount kan sawi hian approved amount emaw tih te a awm thei a. Sawrkar sawi dan phungah chuan sum sanction minute te a awm thlap hi chuan chumi zah chu kan nei e han tih ngam a ni a. A nihna takah chuan state budget vawiina kan pass ngei turte emaw ka budget a ni emaw, kan hon. Home Minister budget a ni emaw kan han pass ang a, Home Deptt. te, Sports Deptt. te chuan heti zah hi sum kan nei an ti mai dawn a, mahse, a takah chuan sum hi chu central sawrkar atanga a rawn luh hunah a awm dawn chauh kha a ni a. Chuvang chuan, sum sanction emaw, sum awmzat sawi nan ziaka thil a awm tawh hi chuan hetiang hian kan sawi mai thin a, a release zat te te khan kan lo sawi lem lo naa khalai kha ka sawifiah duh bawk a ni.

Pu K.T. Rokhaw, Tuipang Constituency bialtu rawn sawi kha, hmalak kan tum khawp mai, saw saw chu a chhuanawm tawp a, tourist destination saw. Tin, an sawrkar rei rei nen an lo ti lova, kan tih khalh dawn a ni.

Tichuan, Palak Dil pawh saw keipawh ka va en a, ka Minister Pu K. Beichhua ho hian kan va kal a, a pui ka ti khawp mai, a ram vel lai saw a nuam bawk a. Sawng saw kan Tourist tak tak ho chuan an duh zawng a nih ka ring a, ran sa te a la tam a, saw pawh saw kan project-ah kan telh ve tih kha ka sawi duh a. Sanction a la nih miah lova, approval pawh a la awm lo tih erawh chu ka sawi duh a ni.

Pu H. Biakzaua kha chu ka chhang thui lo mai ang. Ka chhan tawh ho khan a cover turah ngai ila. A mamawh rawn sawi leh repair ngai tih ang chi te, lung mak tih ang chi te kha chu kan chhinchhiah vek e.

Tichuan, Dr. Thiamsanga khan, ‘khawthlang lam leh chhim lam ringawt in hawi’ a tih lai kha, kawng lehlamah chuan khawchhak hawi zawng hian sawrkar hi a awm rei tawh a, khawthlang lama thil neih loh hi khawchhak lamah khian a tam ang reng a, mahse, kan tilo ang tihna a ni miah lova. He House zahawm takah hi chuan sawi mai ila, externally aided project hi PMJVVK ai hian a sum hi kan hmuh hmasak zawk kan ring a, mahse, Covid-ah kan buai chho laklawh a, eng eng emaw awm nen kan hmu har ta a, sum hmuh hmasak tura kan ngaih lampang kha a dawngah in tang rih a, kan hmu ang tih pawh a la chiang chiah lova, screening committee-in min approve sak kha a ni rih a, tin, Niti Aayog-in min

recommend sak tawh a kan tanna pakhat kha, hmuu hunte chu a la awmin ka ring a, scheme dangah pawh hian project chu kan submit nual a ni.

Tichuan, Professor F. Lalnunmawia'n Hmuifang 'Skywalk' tih vel a sawi kha, hei hi Hmuifang chauh kha a ni lova, Hmuifang leh a chheh vela tourist facilities chi hrang hrang siamna tur atana viable ticket funding project hnuia kan dil a ni a, tunah principal approval pawh kan la nei lova, kan submit thla leih leih chauh a. Mahse, Govt. of India in tourism te a ngaihpawimawh dan te han ngaihtuah hi chuan kan hmalakna hi (a hun chu a sawi theih loh a) hlawhtlin hun hi chu kan beisei ve a ni.

PU ZODINTLUANGA RALTE: Pu Speaker, Sports lam a kalsan hma khan Hawla Indoor Stadium kha tunah khuan thalai ten a za rualin an hmang thin a, zanah dar 11 thleng te, bengchheng lawm ri te a ni a. Secretariat atanga sawn hi vawiinah chuan secretariat Office strategic diktak a ni a, khulaia sawn khu Sports Minister kha a lawm zawk em? Tin, Rajiv Gandhi Stadium te pawh Lammuala awm ai chuan tuna kan sawn khu sawn mai mai ni lovin strategic tak leh parking felfai taka awm khu amah hi a lawm zawk lawm ni ka ti a ni.

PU ROBERT ROMAWIA ROYTE, MINISTER : Pu Speaker, ka sawi chhan zawk kha chu kan sawrkar hmasate thil lo tih hi kan zah thin khawp mai a, tihhlawhtlin hram kan tum thin tih kha ka sawi pah khan ka sawi tel mai a ni a. Tin, Hawla Indoor Stadium tha tak lo sak te pawh khu sports person tan leh Sports Minister tan phei chuan lawm loh theih loh pawh a ni lova.

Tichuan, ICT lamah hian sawi tur tam tak a awm naa tawi te ka sawi duh a. ICT budget kha nuai 400 leh tlem kha a ni mai a, a tam lova. Mahse, budget tam ringawt pawh hi a ni lova, a hawl thui khawp mai tih kha ka sawi duh a. Tuna M Covid an tihtar em em te hi ICT department-a kan software engineer ten an rawn duan chhuah a ni a. Thildang tam tak pawh tunhnaiah tih an nei a. Hun ka la rei tawh a, ka sawi thui tawh lo ang a. Helaiah bifurcate a tha em MSAC te nen hian a indip deuh em, hmun khata awmkhawm lo hian tih kha, a department hi a lian lova, bifurcation han tih te hi fimkhur taka ngaihtuah ngai a ni a, khala kha ngaihtuahna kan la hmang lo tih kha ka chhanna ni sela. Tin, Inner line permit chungchangah te leh thil dang tam takah ICT atang hian hma kan la ve a ni tih kha ka sawi duh a. Tin, computer chungchang te leh school 71-ah computer 7 theuh kan sem dawn a, hman deuh khan school 41 kan cover tawh bawk a, kan cover bak pawh hi a cover hram hram kan tum a. 100% central funding te a ni a, a inthlahrun awm lutuk lova, ITC pawh hian kan han lawm vena chu, kan budget aia tam daih hmasawnna hna kan department hian a thawk chhuak a, an fakawmin ka hria a. Sawrkar hmasa hun lai atang pawhin ICT hian awards tha tak takte an dawng a, tuna Covid leh Covid related problems management system hrang hrang an siam hian National Award a dawn te hi a in rinawm khawp mai tih kha, a sawi nan chuan a la hma deuh mai thei a, mahse an thawh nasat zia leh an thawh that zia sawi nan ka han hmang duh a.

Tin, Tourism-ah pawh hian dan leh hrai siam ngaite, Tourism policy te, tourism policy pawh hi kan chhuang khawp mai a, ‘Mizoram Responsible Tourism Policy’ kan ti nghe nghe a. He House zahawm takah hian ngun taka kan ngaihtuah ngai leh kan ngaihtuah zui zel pawh tul deuh chu tourist tam lutukna ram hi an culture leh social life vela phawsawlh deuh leh engemaw culture chhe veka tourist ina an chil phul leh an ecological balance thleng pawhin an nun chu sawiloh, khawvelah hian a tam tawh mai a ni. Chuvang chuan mizo chu Christian kan ni a, chumai bakah kan culture vawn him tlat duh kan ni a. MNF Party phei chu ‘hnam party’ in tia, Mizo hnam a dalna tur emaw a nih ai chuan thil dang zawng zawng pawh dah tha thak ngam party kan ni a. Chuvang chuan Tourism Policy kan puan pawh hian ‘Mizoram responsible tourism policy’ kan ti ngat a. Chuvang chuan duh duha tourist tih tam hum hum ringawt lam ni lovin mumal taka regulatea tourist lo kal te pawhin responsible taka tourist-te pawh an rawn chet kha kan phutin kan beisei a. Kha kha tourist attraction a ni letling thei ve bawk a ni tih te pawh kha ka sawi duh a. Pataya-ah pawh kan kal hlawmin ka ring a, an society khawsak dan te, Goa thleng pawhin an culture pawhin NASA takin a tuar a, economy lamah leh thil danga an hlawkpui laiin. Mizoram-ah chuan balance awm takin tourism-a hmasawnna hi kan hnam tana him kan Kohhran tana him kan sakhuana tana him zawnga tourism development hi kalpui a nih theih nan a policy hmingah pawh ‘responsible tourism policy’ kan ti a ni tih kha ka sawi duh a. Tourism-ah pawh hian Sports-a kan sawi ang tho hian externally aided project atangin sum kan beisei a, screening committee pawhin min approve sak tawh a, kan lawm khawp a. ₹1,000 crore lai a ni a, a tak takah hian DPR-te an siam chho ang a, Crore 1,000 hi an sanction kim ang em tih erawh kan hre lo a. Eng emaw zat chu hetianga screening committee-in a approve tawh sanction loh hi a la awm miah lo tih hi official-te min hrilh dan chu a ni a, beiseina sang tak kan nei a.

Kan MLA hrang hrangin kan bial atan kan thlakhlelh leh kan lo beisei ang chi pawh kha hetiang sum tam tham kan hmuh chuan kan inpuiin kan sawiho zel thei ang tih ka ring a. Sports-ah pawh chuti tho chu a ni a, Sports-ah hian Vaibelchhe 1250 kha screening committee-in funding tura min recommend sak a ni a. Mahse tum aiin a buaithlak zek a, EAP hi a kaltlang tur department-te a tam em em a, a tam zawk chuan tunah hian kan kaltlang tawh a, tah hian beiseina kan nei a.

A tawp berah, kan Mizoram budget hi beitham viau mahse he budget chauh lo hian budget dang central lam atanga sanction kan han neih sa te, approval kan han neih sa te leh kan la neih belh tura kan beisei mekte nen hian kan han tang tlang ang a. Covid avanga sum harsatna leh thil tih harsa chung chung hian he Department pathum - ICT Department, Sports leh Tourism Department hi kan kal naw naw ve theih kan ring a. Kan official-te, kan Commissioner leh Secretary te, kan Director leh an thawhpui zawng zawngte a number chuan an tlem, mahse kan thawhchhuah hi chu a tam viau a ni tih te pawh hi uang tak pawhin ka sawi duh a ni e.

Awle, Pu Speaker, ka Demand:-

Demand No	Purpose	Amount (in ₹)
22	Sports & Youth Services	25,61,31,000.00
43	Tourism	10,89,78,000.00
48	Information & Communication Technology	4,59,27,000.00
TOTAL		41,10,36,000.00

te hi 2021-2022 a hman atan he House zahawm takah hian min pawmpui turin ka rawn ngen e. Pu Speaker, ka lawm e.

SPEAKER : Awle, Minister zahawm tak Pu Robert Romawia Royte-in a Department chante :

Demand No.	Purpose	Amount (in ₹)
22	Sports & Youth Services	25,61,31,000.00
43	Tourism	10,89,78,000.00
48	Information & Communication Technology	4,59,27,000.00
TOTAL		41,10,36,000.00

te hi House-ah pass a rawn dil ta a. Rem ti apiangin, ‘remti’ ti rawh u le. (*Members: Remti*) Remti lo kan awm em? (*An awmlo*).

Awle, tunah chuan Minister zahawm tak Pu Robert Romawia Royte a Demand-te: -

Demand No.	Purpose	Amount (in ₹)
22	Sports & Youth Services	25,61,31,000.00
43	Tourism	10,89,78,000.00
48	Information & Communication Technology	4,59,27,000.00
TOTAL		41,10,36,000.00

House-in lungrial takin a passed ta a ni. (**Pu ROBERT ROMAWIA, ROYTE, MINISTER** : Pu Speaker, ka lawm e.)

A dawt lehah kan kal ang a. Minister zahawm tak Pu Lalchamliana, kan I demand sawihona te windup-a sawifiah ngaithe rawn sawifiah House-ah pass rawn dil nghal bawk turin kan sawm e.

PU LALCHAMLIANA, MINISTER: Pu Speaker, ka lawm e. Ka Department 3-te Demand a ni a, a te lam atang hian han tan i la a. A hmasa berah Taxation chungchang hi ka han sawi ang a.

Kan hriat theuh angin India ramah July Ni 1, 2017 atangin GST kan hmang a, ‘One nation, One tax’ principle a ni a. Chu chu state tinah kan tihdan phung a inang vek a, chu chu Taxation Department hian a enkawl a. Chu lo leh a tax a lakna chu GST-in a huam ve loh item, heng - petrol, diesel leh zu kan tih atang chhiah lak hi Value Added Tax dan hnuai a lak a ni. Tin, Profession Tax a awm leh a, hei hi a tam thei lo hle mai a. A chhan chu Indian Constitution, Article 276 Clause II-in a tam berah ₹2500/- lak tura a tih avangin hei hi state sawrkar thu ni loin India sawrkar thuhnuai a awm a ni. Tin, Registration of Farms & Society, hei hian Society registration-te a khawih a, registration fee atangin pawisa hi a la lut ve a ni.

Kan hriat theuh angin Covid-19-in khawvel a tibuai a, chu chuan kan sawrkar pawh hi nasa takin a nghawng a ni. March thla 2020 atangin Mizoram kan buaipui ve a, April thla phei kha chuan vaibelchhe 14 leh nuai 35 chauh GST kan la lut a ni. Kan target vaibelchhe 600 (a hnua vaibelchhe 600.13-a tih pun leh tak kha) kan phak lo hle mai awm mang e kan ti a. Vanneihthlak deuh maiin February thla tawp khan kan target kan khum ta a ni. Vaibelchhe 610.75 ani a, hei thla khat a la awm a, engzatin nge kan khum ang tih chu sawi theih loh mahsela vaibelchhe 40 or 50 te chuan kan khum mai awm mang e tih hi kan beiseina a ni. Member zahawm tak Pu Zaithanzama khan engzat nge kan hmuh ang tih a zawhna kha, hei hi kan chhanna ni nghal mai sela a tha ang e.

Tin, department hmalakna ve hi a chau khawp mai a, department lian kan ni lo a. GST Act-in a phut angin chhiah petu ten an harsatna leh an lungawi lohna an put luh te, tax pek chungchanga pe tha duh lo te han thina lungawilohna an thlenna tur Appellate Authority hi mamawh a ni a. Chu chu GST Council chuan state tinte'n helam ngaituah biktur tur Additional Commissioner appeal nei theuh rawh u min ti a. Hemi chung chang hi Session hmasa lamah pawh khan kan sawi chhuak tawh a, kan Chief Minister zahawm tak hmalaknain department chuan bawh zui nghalin tunah hian post thar siam turin proposal theh luh a ni a. Hei hi a hlawhtlin ngei pawh kan beisei a, a hun tur erawh chu kan sawi thei mai rih lo a ni.

Tin, infrastructure lamah, District 4 - Aizawl, Lunglei, Champhai, Kolasib-ah te hian mahni building ngei kan nei ve tawh a. Mamit bialtu zahawm tak sawi ang khan Mamit lamah khuan kan buatsaih mek a, kan sak mek bakah mimal In pawh lei sak tum a ni. Siaha lamah pawh office leh staff quarter tur sak mek a ni a, Serchhip leh Lawngtlai-ah hian ram kan nei tawh a, plan leh estimate pawh kan theh lut tawh bawk a ni.

He Department, Demand No. 8 hi Member zahawm tak tak 13-in an sawi a, chung zinga ka sawi duh chu, clarification ngai, Lengteng bialtu zahawm tak khan professional tax chungchang hi sawifiah deuh theih a ni em ti a. Ka sawi tawh ang khan Indian Constitution hnuai a ₹2,500/- bak lak theih a ni lo a, chuvang chuan Chief Secretary leh Peon te an pek zah a inang reng alawm tih kha thil awm thei a ni. A chhan chu thla khata ₹20,000/- la chin chuan ₹2,500/- kum khatah professional tax an pek a ngai a, thla khata ₹20,000/- la tling lo hi sub hrang hrang a awm a, ₹5,000/- hnuai lam la lut hi professional tax awl an ni a. ₹5,000-

8,000 la lut hian kum khatah ₹900/- an chawi a. ₹8,000-10,000 la lut hian ₹1,440/- kum khatah an chawi a, ₹10,000-12,000 la lut hian ₹1,800/- kum khatah an chawi ve bawk a. ₹12,000-15,000 late chuan ₹2,160/- kum khatah an chawi a, ₹15,000-20,000-te chuan ₹2,340/- an pek a ngai a. Hei hi monthly instalment pawhin an pe thei a ni.

Dr. K. Pachhunga'n chhiah pek hrehna rilru hi kan tih danglam a ngai a ni a tih hi a dik khawp mai a. Sawrkar hi amahin a ding thei lo a, kawng hrang hranga mipuite hnena chhiah lak khawm hi a sum hnar a ni a, kha kha mipuite hnenah vek a sem chhuak thin. Kohhran nen hian ka tekhin thin a, Kohhran pawh hi mipui ten thawhlawm thawh lo ila a ding thei lo a ni. Chutiang ang chiah chu a ni a, kan District Council nih lai rilru te, kan UT nih lai rilru te kan paih bo tawh hi thil hun tak a ni tih kha ka sawi duh a ni.

Tin, a awm tawh lo naa, member zahawm tak Pu Zaithanzama thusawi 'Taxation hi thuam that zel a ngai' a tih kha a dik khawp mai a. Restructuring tih tum a ni em kha a ti a, tunah hian restructuring hi kan sawi ri ve mek a. A chhan chu Officer pakhat emaw Inspector pakhat hian hna chi hrang assessment siama, chhiah pelo an awm em tih te, field chi hrang hrang kha a thawk a ni. Heng hi an hnuiah hian Division of works te hi awm ve thei sela, an thil khawih hi a mumal zawk thei ang tih hi kan ngaihtuahnaah a awm a. Mahse hei hi la tih puitlinloh a ni.

Tin, chhiah pe tha lo umzui tu tur tribunal hi din a ni tawh em a ti a, din a la ni chiah lova, mahse, central sawrkar-ah chuan Aizawl-ah hian Tribunal Bench siam ve ni se tha kan ti e tih hi kan thlen thla tawh a ni tih kha ka sawi duh bawk a ni.

Tin, Dr. Vanlalthlana, Member zahawm tak khan petrol leh diesel te hi VAT ang zawng a chhiah ti pung lo hian Cess ang zawng hian ti pung ila a tha lawm ni tih kha a rawn sawi a. Tin, hei hi Opposition Leader zahawm tak Pu Vanlalthlana khan a rawn thlawp bawk a. Ka hriat dan a sual em aw, a rei ta deuh a, kan ngaihtuah lai khan. GST hnuiah hian CESS lak a remchang lo tih kha official lam in min hrilh dan a ni a. Eng pawh ni se, kan lo en zui ang a. Keipawn khatiang chi deuh kha ka ngaihtuahnaah a awm a, kan ngaihdan a kal hlawm tha viau a ni tih kha ka sawi tel duh a ni.

Tin, Member zahawm tak Palak bialtu khan VAT hi tih tlem a hun a ni a ti a, a ngaihtuahna zawnah chuan a dik viau mai thei a, mahse, diesel leh petrol-a chhiah kan tih nikum June Ni 1 atanga hman tan tur kan tihpun hret lai khan Northeast India-ah hian a khaikhinna kan zawng a, Arunachal tih lohah chuan kan hniam filawr lak a ni. Chuvangin State dang ai sanga tih a remlo ang a. Arunachal erawh hi chu China border-a awm a ni a, India sawrkar hian a duhsak zual bik bawk si a, Arunachal aia sang deuh hlek, midang te tlukpui deuh thuak hian i siam ang u tiin thutlukna kha kan siam a ni a. Mahse, hei hun a lokal zel a, tunah chuan a hniam ber dawttu kan ni ta bik lova. Petrol bikah hian keini aia rate sang hi State 4 an la awm a, diesel-ah hian a laihawl chiah, State 3 keini aiin an sang a, State 3 keini aiin an hniam a ni tih kha ka sawi duh a. Chuvangin hei hi chu mipuite pawhin

rit an ti lutuk lo e tih kha kan ngaihdan deuh a ni a. A hniam zawnga kal kha chu kan ngaihtuahnaah a awm rih lo a ni. Ka hriatsual loh chuan tun hnaiah Nagaland chuan sang deuha an lo tih thin kha 5%- emaw niin an ti hniam a, chuti chung chuan Nagaland chuan petrol litre-ah ₹90/- chuang a lei laiin keini chuan ₹90/- tling lovin kan la lei thei a ni tih kha ka sawi duh bawk a.

A dawt leh-ah chuan Demand No. 30, DM&R lam hi ka sawi ang a. DM&R hi organization te tak te, hnathawktu pawh tam vak lo, mahse member zahawm tak tak ten an sawi ang khan chhiat ni that niah hian mite tan nasa takin an tangkai thin a, tangkaina tam tak an nei a ni. Tunah pawh hian hmun hrang hrangah DM&R atangin helai hi min siam sak rawh u tih demand te a awm a, mahse tunah tak hi chuan mitigation fund kan han tih bik vaibelchhe 9 zet kan neisha pawh hi central atangin guideline kan rawn siamtha dawn an tih avangin kan la khawih che thei lo va, kan la hmang thei rih lo a ni tih kha he House zahawm tak hi kan hriattir ni ta se. Hei, Department te tak te, budget pawh tlem te ni mah se la central sawrkar in Covid kan beihpui lai khan chuti zat chu in hmang thei ang an ti a, 35% STRF te kha Covid donaa hman min phalsak a. Chutiang chuan Health & Family Welfare bikah pawh hian hmanraw lei nan crore 3 chuang kan pe a. Chung an bungraw leite chu a hmanhmawh thlak avangin Delhi atanga thlawhnaa rawn phurh a ngai a, a phurh man ringawt pawh hi nuai 16.25 kan pek a ngai a ni. Tichuan SDRF sum atanga Covid donaa DM&R-in sum a semchhuah tawh zawng zawng hi nuai 1,347.3996 lai a ni. Tin, heng bakah hian Prime Minister Office atang khuan ‘PM CARES’ an ti a, stranded migrants ho enkawlna tur bik atan vaibelchhe 3 leh nuai 22 lai kan dawng bawk a ni tih kha kan sawi tel duh a ni.

Tin, chhiat ni, that ni lo thlen hian ka sawi tawh angin, directorate-ah chuan thawktu tlem te an awm a, a set up-ah hian district tinah hian District Disaster Management Authority, DC chairman-na hnuiah din a ni a, chuta CEO chu Addl. DC anni tlangpui thin a ni. Chungte hnenah chuan relief pawisa, in kang emaw, rialin a tichhia emaw, thliin a tichhiat emaw, leimin in a tichhiat emaw, khang kha an awmna district DDMA hnenah khan chhiatna tuar te'n an thlen thin tur a ni a, an niin a theih anga rangin heng hi an lo buaipui thin a ni. Chuvangin Directorate-ah kher kher emaw, a nih loh leh DM&R Secretary hnenah kher emaw harsatna, an chhiat tawhna kha thlen lovin anmahni district-a khatiang buaipuitute'n ruahmanna an siam a ni tih kha kan mipui te pawh hian lo hria se a lawmawm khawp ang.

Tin, kan hriat angin, nikum khan vawi tam tak khawchhak lam Champhai leh a chhim lamah lir a nghing a, bungrua emaw, in leh lo a tihchhiat emaw te hi official-a report kan dawn dan chuan nuai 316.35 lai a ni a. Hei vang hian mipui khilai bial mipui te an chiai a, a bialtu te leh khilai District Hqrs. DC ten theihtawp an chhuah a, khaw 25 a nghawng a nih kha. Theihtawp an chhuahna a zarah rei vak lovah mipui te pawh thlamuangan an awm a. Khang an material mamawhte bakah khan rilru lama an mamawh te pawh DM&R leh University tangrualin khatiang khan an han thlamuan a ni tih kha kan hriat a ni. Tin, lirnghing ngaihthlaka chhinchhiahna khawl hi a pawimawh ve tho a, hei hian lirnghing chu

a veng hauh lo a, lirnghing lo thleng tur pawh a hriat tir thei chuang lo nain neih ve hrim hrim hi thil tul a ni a, record tha tak kan nei theih nan te. Tunah hian seismic station hi Mizoramah hmun hniah, Directorate of Geology & Mineral Resources hi Aizawl leh Siaha DC Complex hmunah National Centre for Seismology, NSC Indian Metrological Department Ministry of Arts & Science New Delhi ten an mahni sum sengin an din a, tunah hian DC Complex Champhaiah NSC ten survey rawn neiin Champhaiah din beisei a ni a. Tin, tunah hian North East Institute of Science & Technology Jorhat-in Pachhunga University College leh DM&R tangkawpin Mizoram chhunga lirnghing ngaihthlakna khawl tam zawk bun tura hma lak mek a ni bawk a ni.

Tin, hmanni a zawhna kan chhan tawh ang khan, project hrang hrang Mizoram hmun 14-ah crore 280 chuang man tunah hian a buatsaih a, a theih chin chin phei chu Home Ministry-ah theh thlak tawh a ni a, tunah hian kan hnathawh kal mek chu, Restoration of National Highway 54 leh Mitigation of land sinking area at Hunthar area, hei hi cheng nuai 2,086 leh 45,000 man a ni. Tin, Rebuilding of totally wash away damage infrastructure by floods during 2017 under Ministry of DoNERs, hei hi cheng nuai 1,483 man a ni a, Member zahawm tak Pu Ngunlianchunga hun laia project an lo siam kha a ni a, amaherawhchu an sawi chhuak hman lo a, tunah alo chhuak fel tawh a ni. PWD-ah hian, road and bridges tan nuai 815 kan pe a, Agriculture and Allied Sector I&WR-ah nuai 333 kan pe bawk a. Tin, social infrastructure work Tlabung leh Sairang-ah Safe house sakna tur nuai 335, hei hi record-a lan dan chuan PWD hnenah kan hlan tawh bawk a ni.

Tin, Thakthing kham phei saw kan House Leader zahawm tak pawh hian min enpui tawh a, hei hi kan tlin ang em, tlin lo ang em, saw saw siam theih a chakawm hle a, chuti rual rual chuan Bawngkawn-ah Hauva Petrol Pump bul hnaiah sawn kawng chhak leimin siam tur te pawh a awm a ni tih kan hria a, heng hi kan tlin dan ang zelin ngaihpawimawh kan nei a ni tih kha kan sawi duh bawk a. Tin, Covid vang a ni deuh pakhat a, a tirah khan state dang atanga lo lut kha tih thianghlim a ngai kan ti a, covid hri kha alo bei loh nan fire tender motor-in a pawn leh chhung kan phuh thianghlim a, chutah chuan fire tender kan neih sa kha kan indaih ta silo a, State Disaster Management Authority, Chief Minister hoa kan thath khawmnaah kan thlen a, fire tender 3 lei min phalsak a, tunah hian alo thleng tawh a Disaster Management sum atangin. Tunah Directorate, Fire & Emergency Service-ah khuan fire tender tha deuh deuh mai 3 a awm a, hei hi la flag-off loh a ni a, reiloteah hian flag-off theih kan inbeisei a, hei hian kangmei kan dona kawngah thahru tam leh zual min pek theih kan beisei a ni.

Tin, chhiatni thatni alo thlen hian YMA te hi kan thapui ber an ni a hengah hian kan mamawh e, an ti a, chuvangin chhiat ni that nia an chet chhuah zung zung theih nan DM&R atangin Bolero Camper kan lei a, disaster equipment engemaw zat kan pe tel bawk a ni tih kha ka sawi tel duh bawk a ni. Kha kha DM&R dinhmun tlangpui ni ta sela.

Member 15 laiin Demand No. 30 hi min sawipui a, a lawmawm hle mai a. Mamawh sawi a tam vak lova, an sawi zinga lar deuh chu, ‘Zotlang bula retaining wall leh gabion wall min siam sak thei se’ tih Dr. Vanlaltanpuia’n a sawi a. Hei hi ka duhdan tak chuan District Disaster Management Authority-ah thlena, an niin project report fel fai tak DPR rawn siam se la, thawh thuai thuai ni se tih kha ka ngaihtuah dan a ni. Tin, Member zahawm tak, Pu Lalrindika Ralte in lirnghing chungchangah awareness, inzirtirna a tam a ngai a ti a, hei hi a dik ka ti lutuk a, thil tam berah hian awareness kan neihloh avanga harsatna kan tawh a awm a, tunah pawh hian central sawrkarin lirnghing thuta inven dan tur, inchhunga awm chu chutiang chu a ni tur a ni tih ang chi, saptawnga tih pawh kha mizo tawnga leh ni se kan ti a, kan let zo tawhin ka ring nghe nghe a, heng hi mipuite hnenah kan sem darh thei turah ka ngai a ni.

Pu Muanpuia’n a bial Hunthar leimin chungchang a rawn sawi a, hei hi hna kal mek a ni a, an design khu a tha tawk ang em ka hre ve thiam lova, a hmunte han bel chiang ve ula, a lo that hlauh chuan a tihzia dawn em a ni tih kha ka han sawi duh a ni.

Member zahawm tak Dr. Vanlalthlana’n Ramhlun Sports Complex bulah tui lo irh chhuak a awm a tih kha, hei hi kan directorate lam pawhin lo hria sela, a endiktu tur Geology lam leh mithiamte a rang lamin lo intirh ni sela a tha awm e.

Tin, Dr. Thiamsanga’n Champhai kawtchhuahah leimin nasa deuh awm ngaihven a ngai a ti a, kan intir tawh a, kan Minister zahawm tak Pu Manuna pawh hian Delhi-ah te kalin a zuk bawhzui tawh a, a la hmin hleithei lova, Lersia Field leh kha kha thil kal lai mek a ni tih kha ka han sawi duh a ni.

Tichuan, Lawngtlai Hospital thlang leimin kha Pu Biakzaua leh Pu Ngunlianchunga’n an sawi ve ve a, member zahawm takte khan, an sawi zing tawh bawk a keini pawh kan rilruah a awm a ni. Chutilai chuan, mitigation fund kan neih tur zawng zawng hi 9 crore vel a ni a, sawi tawh ang khan 280 chho vel a ni a, kan indaihlo khawp mai a. Hei hi, khulama tangin guideline te rawn awm se ngaihpawimawh turte zingah dah ngei ngei chi niah ka ngai a ni.

Chhiat tawh thilah rang taka tanpuina pek theih ni se tih Prof. Mawitea’n a sawi a. hei hi kan duhthusam a ni a, chutiang tur chuan District Disaster Management Authority pawh, Administrative Deptt. emaw, Directorate atang pawhin hriattirna lo pek kan tum ang e.

A tawp berah Home Department-ah kal i la. Home Department han tih hian, Home hnuaiah hian establishment paruk lai a awm a, chungte chu: Police, Fire & Emergency Service, Prisons, Forensic Science Laboratory, Mizoram Home Guard & Civil Defense, Sainik Welfare and Resettlement Board te an ni a. Kan budget nikuma mi nena compare-na kan member zahawm tak tak te’n an han sawi a, min lungchhiatpui deuh emaw ni chu ka ti

a, Sap ina, ‘Crocodile tears’ chu a ni em lo ang chu. Engpawnise, Pathian khawngaihna zarah Finance Minister, tuna kan CM, term hmasa lamah khan MOS angin ka lo chhawmdawl ve tawh a, finance lampang hi ka hre vak lo naa, ka hre ve nial nual a, awmlo ngena tap rual ni tawh lovah ka inngai deuh a ni. Kan hriat theuh angin Covid hripuiin min bawhbet a, chuvang chuan hmalak a har em em a ni.

A hmasa bera Home chungchanga ka han sawi duh chu, Lawmthu a ni a, Covid chungchang LLTF te, VLTF te, tin, sorkar hnathawk department hrang hrang amite leh kan Police thahnemngai tak takte, an hnathawhna, an impekna hi lawmawm ka ti takzet a. tun hi hun remchangah lain lawmthu ka han sawi duh a. Tin, a dawt lehah chuan ramri-ah harsatna kan nei thin a, kan hriat theuh angin. Hengah te hian a bik takin Bairabi mipuite leh an hruaitute, Vairengte mipuite leh an hruaitute, kan ram leh hnam humhimna atana tha an thawnha, an thahnemngaihna ka ngaihtuah let changa piangin lawmawm ka ti a, awmhmun atang pawhin an chungah lawmthu ka sawi thin a ni tih kha ka sawi duh a.

Kan hriat angin Assam leh Mizoram inrinaah hian hmun li, hmun nga laiah inremlohma, ramria harsatna kan nei a ni. Tun hnaiah Thinglun-ah a ni a, tin, Bairabi Zophiaah a ni a, Vairengte-ah a ni a, Saihapui ‘V’ lamah a lo ni leh a. Tin, kan sawi hmaihloh tur Medili khu Leiina min daidanna a ni a, mahse tun hnaiah hian Assam-in Lei helam pawh kha kan ram a ni an la rawn ti ta a ni. Chu bakah Tripura nen khumi Zampuitlang dunga Thaidawrtlang-ah khuan, Sahmul thenah emaw a kawngpuia inri mai tur niawma kan lan laiin 2012 atang khan Tripura hoin kan remruatna tihbuai chang an rawn neih zeuh zeuh bawk a ni. Chuvangin ramriah hian harsatna kan nei fo thin a, hemi chungchang hi House-ah hian kan sawi thin a, mahse tihfel a har ngang a ni ang e.

Kan mi hmasa miropui Brig T. Sailo pawh kha term khat leh thla 7 vel ro a rel a, tin, Chief Minister la ni rei ber term nga lai Chief Minister tawh politician ropui berte zinga mi Pu Lal Thanawla pawh term 5 lai a lal khan a chingfel hleithei bik lova. Khatih hun laia an thlen san ber kha chu Chief Secretary level inbiakna a ni a, an ngaihdan a inang lova, a tawp tawp ni mai awm takin record-ah a lang a. Keini MNF sawrkar Pu Zoramthanga kaihhruai pawh hi, hei, term 2 leh a chanve dawn kan lo ni ta a, kan la chingfel thei biklo a ni. Chuvang chuan chinfel hi a har em em mai a, a tawp tak takah phei chuan state leh state inkara chinfel tur pawh niin a lang ta lova, India Constitution Article 3-na ah chuan, “state ramri ti zima ti zau thei tu chu India Parliament chauh a ni” tih kha vawiinah hian kan sawi duh a. Nichinah khan Group Leader zahawm tak 1986 inremna pawm tute chuan 1971 reorganization ina ‘ramri’ a tih kha an pawm a, chuvang chuan ramri-ah hian sawi tur an neilo a ni tih tluka sawi angin ka lo ngaithla a. Mahse Pu Speaker, 1986 inremna atan khan tute nge theihtawp chhuah kha? Second khat pawh ngaihtuah lovin ‘ka Lalthutthleng ka kian ang’ titute pawh kha an awm ve bawk a. Khang hote pawh khan engnge sawi tur an neih bik a, a rawn hawn apiang chu a te emaw a lian emaw, ram chhuakin Sai emaw, Sakhi emaw pawh rawn hawn sela lawm takin kan lo pawm ang kan ti theuh a, khatih hun lai khan remna kan duh em avangin. Chuvangin, thil hlui kal tawha nasa taka inbeih hi a tul lemin ka hre lova, amah,

kan founder president tih dan takin, ‘A ngawi teh u, Pute u, han inleh han inleh hi chuan a nam lai hi chu kan lo nei deuh vek a ni’ a tih ang deuh khan, han inleh han inleh hi chuan tute pawh hi insawisel thei kan niin ka hria a.

Engpawnise, ramri chungchangah hian hmannah ka sawi tawh a, 2018 lai khan ramri veitu Joint Action Committee on Inner-line Forest Reserve ten Prime Minister-ah Memorandum an theh lut a, chu chu engnge in comment tiin vawihnih vawithum central sawrkarin Mizoram Chief Secretary hnenah lehkha a rawn thawn a, a tawpah chuan kha JAC in memorandum a thehluh thil pahnih 509 sq. miles-a zau Inner-line Forest Reserve, Assam-in a enkawl tak hi Mizoram-in enkawl leh rawh se tih leh, ramri chingfel turin boundary commission hi din ni rawh se tih point hniih kha, khami chungchang ngaihdan kha an rawn zawh fe hnuah, sawrkar ngaihdan he JAC rawtna hi keini pawhin kan thlawp e tiin kan thlen ta a. Chuvang chuan a tawp khawka ramri chingfel tur hi chuan Boundary Commission emaw, anih loh leh inbiakna emaw kan neih hi a ngai ta a. Boundary Commission pawh hi awm ta sela, an tih dan a kha kan pawm kher ang em tih pawh hi zawhna awm thei tak a ni tih te pawh hi ngaihtuahnaah awm tel mai mai se a thain ka ring. Kan Police-te an fakawm thlawt a, Covid duty-ah hian mi 3,000 vel, a vanglai kha chuan kan hmang a, rim takin an thawk a, chutih rualin Aizawl lamah carfew te kan lo ti a, carfew duty rim takin an thawk bawk a, chutiang zelin traffic control-na lamah te pawh an ti tha em emin ka hria a. Tin, zu leh drug dona, a manna kawngah pawh nasa takin hma an la a ni tih kha kan sawi tel duh a. Chuvangin kan Police te hi fak tlak an ni a, India ram Police te zingah hian, ‘second to none’ an ni e tih hi ka sawi duh a ni.

Harsatna tam tak karah hma lakna chhe te te kan nei ve a, kumin kum kal chho mekah hian Special Investigation Wing, SP(CID) Crime hnuiah case pawimawh zual - pawngsual, thualthah, bomb puak chungchang leh sum leh pai hnuiai thubuai lian zual pawisa lem man chungchangte leh thildang pawimawh takte chhui turin Special Investigation Wing din a ni. Tin, tunlai thiamna ‘Internet’ kan han tih ang chi te hmangin Cyber Crime a lo pung ta zel a, hemi lam a inpe bik tur hian Cyber Crime Police Station nikum November thla khan hawn a ni bawk a. Tin, chumi belhchhah tur chuan Cyber Forensic Lab-cum-Training Centre, hei hi Prevention Against Woman & Children Project hnuiah din a ni bawk a. Tin, inbiakpawhna tichangtlun zelna turin Digital Data Communication distric pariatah din fel a ni ta bawk a ni. Tin, Traffic nichinah pawh kan sawi a, management tha tak a awm theih nan leh Traffic Awareness a awm theihna turin leh control tha tak a awm theihna turin awareness compaign hi a khat tawkin kan traffic lam hotu ten an nei reng bawk a ni. Tin PHQ Complex-ah khian Training Home changtlung tak mi 30 vel vawikhata an training theihna turin siam fel a ni tawh a. Tin, NLCPR project hnuiai Thingkah-a 3rd IR Batallion Headquater tur cheng nuaih 2,842.28 hmanga sak chu tun March thla chhung hian zawh hman tur a beisei a ni.

PU C. NGUNLIANCHUNGA: Pu Speaker, khawngaihin khalai a kalphung kha, mimal ram a kal black-topping loh hi an zo hman dawn em, an tifel tawh em ni? Mimal ram a sut avang khan khawih an phal ta lova, black-topping tih lohin a awm si a.

PU LALCHAMLIANA, MINISTER: Chulai chu hmanah khan vawikhat ka lo sawi tawh a, ka lo mang nghilh tawh a nih chu. Kan lo enzui tur chi a ni ang.

Police Training School, Thenzawl saw tihchangtlun mek a ni a, Outdoor Firing Race te tihpheisui a ni. Tin, Aquatic Training Centre (Tuihleuh Zirna) leh Digital Classroom pawh siam tawh a ni a. Heng bakah hian Multi Purpose Hall, Training Barrack I & II-te, Obstacle Course-te pawh tunah hian hmalak mek a ni.

Tin, harsa chung chungin Police Headquarters hian hengah te hian hma a la mek a, High School zirlaitan Student Police Cadet-ah enrollment a tih theih a, Uniform chi hrang hrangte pek an ni. Tin, heng zirlaita hi Mizoram chhung district tinah, district thenkhatah pali te, thenkhatah chuan pakhat te an ni a, chungah chuan mi 44 zel leh Community Police Office (CPO) pahnih zel, an vaiin zirlai 880 an ni. Tin, CPO hi 40 tunah hian tih mek a ni a. Hemi atan hian ₹91,00,000.00 lai kan nei nghe nghe a. Heng hi school tinah teaching aid, outdoor activities an tih nan ₹50,000/- theuh kan pe dawn bawk a ni.

Police-te hi kan indaih lo hle mai a, VDP (Village Defence Party) hi tuai thar leh ni se tiin hmalak a ni a. VDP-te hi Village Defence Organisation Rules, 1981 hnuaiah Mizoram-a khua leh veng hrang hrangah din a ni a. Tunah hian record-a a lan dan chuan khaw 341 velah VDP hi an la ding a ni. Heng hi thuam that a, plastic, signal light, breathe analyzer, hruihrual, flash light, fluorescent jacket, raincoat, gumboot, nihliap, PA set, radio, stretcher, jacket leh lukhumte pawh pek tum a ni a. VDP unit 1 atan hian ₹1,69,000/- ruahman a ni a. Tichuan, VDP unit 341 zingah tunah hian unit 200 target a ni a, hemi atan hian cheng nuai ₹33,87,000 ruahman a ni tih kha Police Department hmalaknaah sawi kai ka duh bawk a ni.

A dawtah chuan Fire & Emergency Service-ah Lunglei lam aiawhtu zahawm tak te pawh khan “Lunglei-a Fire Station building a chhe tawh a, insuan a ngai a, Saikuti Hall an luah ringawt mai a” an tih kha a zia lo khawp mai. Engpawh ni se, Fire Director-in thahneungai takin vaibelchhe 47.45 man lai mai project MHA-ah a theh thla a, a hlawhtlin theih chuan Fire Station tam ber hi tih puitlin a ni ang tih ka beisei a ni.

Ka sawi tawh ang khan, DM&R atangin Fire Service hian fire tender pathum a nei dawn a ni tih ka sawi kai duh a ni. Tin, Fire lam sawi lai hian, tunlaiin inkang kan hre tam hle a, a pawi takzet a, enge a chhan kan hre chiah lo naa, thenkhat hi chu kan fimkhur loh vang niin a lang a ni. Tin, ram kang pawh a lo thleng leh mai ang tih hlauhawm khawpin ram kal meizu ten tihlum lova an meizuk bung pah mai mai te a la awm a, heng hi tilo thei se kan duh ngawih ngawih a ni.

Tam takah chuan inkang hi electric current kal sual a ni an ti a, electric current hi a kal sual thei nge, kan hman dan a dik tawk lo, bulb kan dahna kan fimkhur tawk lo nge, a wiring ng het leh ng het loh pawh kan check thalo tih hi ngaiantuah tham tak a ni a. Engpawh ni se, mipuite hian kan In te, kan ram te a kan loh nan ngaiantuahna thar hmangin i fimkhur ang u tih ka sawi duh a ni.

Forensic Laboratory Science hi tumahin kan sawi lova, *behind the scene-a* department tangkai em em a ni. Tunah hian India ram pumah Mizoram Forensic Science Laboratory hi case pending nei ngai lo awmchhun a ni a, case te ber atanga a lian ber thlengin Ni 30 chhungin examination result an tichhuak hman zel rih a, a lawmawm em em a ni. Kum 2020 chhung khan case 822, exhibit 6026 exam a ni a, pawi khawihna hmun 53-ah kalin enfiah a ni. Tin, Mizoram-a court hrang hrang ah expert testimony tum 160 an pe tawh a ni. Tin, pawi khawihtute man annih ngei theih nan *finger print data base* siam a ni a, pawi khawihtu te finger print hi 5,982 lai chhinchhiah tawh a ni. Tin, Nirbaya Fund Scheme hnuaiah hian FSL hi nasa taka tih changtlun a ni a, tunah hian DNA division tih changtlunna atan leh Cyber Forensic dinna tur atan pawisa pawh a awm a ni tih te pawh kha ka sawi duh a ni.

Tin, Group Leader zahawmtak Pu Hlana khan Homeguard chungchang kha a rawn sawi a, Homeguard te hi an tangkai ang hu hian an lawmman kan la pe ve thei lo hi a pawi ngawt mai a, amaherawhchu kan sum dinhmun ten a zir ve hunah chuan kan ngaipawimawh a ni tih kha ka sawi duh a ni. Hmun hrang hrang ah an duty mai ni loin revenue earner an nihna lai a awm ve a, target hi cheng nuai 3,57,83,000 min pe a, November thla thleng khan nuai 18,35,735 revenue a earned ve a ni. Tin, tun kum kal mekah hian Homeguard volunteers 135 leh staff 1-in visit training CTI Sesawng-ah an zo a ni. Hemi hun chhung vek hian Transport Deptt. atangin enforcement staff te CTI ah an training a, mi 16 hlawhtling takin an training an zo a ni.

Homeguard te hi tun hma aiin mite ngaihsan a hlawh a, an lawmman te a lo pung ve hret bawk nen. Chuvang chuan Homeguard tang duh hi an lo tam mai a, kar hmasa lawk thleng pawh khan an lo la kal a, mahse tun dinhmunah hian Homeguard hian lak a ni rih dawn lo tih mipuite'n an lo hriat a tha in ka hria.

Tin, Sainik Welfare & Resettlement Deptt. hi sipai bangte leh an chhungte enkawltu, pensionte enkawltu a ni a, department lian lo tak ni mahse sipai bangte tan pawimawh ve em em a ni. 2020 April atanga December 2020 thleng khan Veteran 40 leh an thih san an nupui 408 te hnenah tanpuina cheng nuai 8,28,000/- pek a ni.

Tin, ka sawi tawhin ka hria a, World War-II Veteran leh an thih san nupuite tana lawman, an stipend cheng 1,200 atangin 2,400 ah tihsan a ni a, an hmeithai te tan 1,000 atangin 2,000-ah tihsan a ni bawk a ni. Tun thleng hian 2nd Assam regiment disband an nih avanga zawm leh ta lo, mahse a hnua tanpuina pek te mi 8 hnenah tanpuina la pek zui zel a

ni a, anni pawh hi nikum hmasa April, 2019 atang khan cheng 1,200 atangin 2400 ah tihsan sak an ni. ..(interruption)... IAA hi Mizoram-ah an dam tawh loin ka hria a, Lunglei ami kha a hnuhnung ber niin ka hria.

Tin, lawmawm em em pakhat chu, tunhnaiah India sipaia tang Mizo tlangvalte pahnihin Sena Medal an dawng a, huisen lawmman, cheng nuaih 3 ve ve lawmman ah pek an ni a, chungte chu - Havildar Laltlanzova, 17 Unit Assam regiment-a awm mek chu 42 Rastriya Rifles a ni a, Bilkhawthlir, Kolasib District ami ni. Pakhat dang leh a chu Subedar K. Laldingliana, 9th Assam Rifles, ani pawh hi 42 Rastriya Rifle-a attached mek a ni a, Kahrawt Veng, Champhai ami a ni. An pahnih hian thinlung takin he House kaltlang hian lawmpuina ka hlan a ni.

Tichuan, Police-a post ruak chungchang kha kan sawi nual a, post ruak hi a tam fu mai a, mahse a figure chu confidential deuhin dah ve ila a dikan ka ring a. A percent zawngin ka sawi ang a, a sanction atang hian tun dinhmun takah hian Police rank hrang hrangah 29.5 %, chu chu kan sawrkar tirh pawh khan 2,800 vel a tling tawh a, hnawh khah dan kan zawng a, theihtawp kan chhuah a, kan CM zahawmtak pawh hian a tum ve a, vawihnih kan sawiho tawh a ni. Mi 750 vel lakna tur file kal dan phung procedure pangngaiin a kal a, DP&AR leh Finance a kal tlang tawh a ni. Mahse Covid-in min nang ta a, hotupa ber approval lo chuan atih mai theih bawk si lova, hotupa ber chuan thil zawng zawng ngaihtuahin, “Ngawi rawh u, heti hian lo awm sela, Covid boruak leh kan finance dinhmun hi en phawt ang” tiin tunah hian reject ni lovin pending angin a awm ta a ni. Hemi ruala ka sawi tel duh chu, sawrkar hmasa tawp dawn lama Compassionate Appointment tih tura tih kha mi 304 vel an ni a, chu mite appointment siam sak tur chuan theih tawp kan chhuah a, verification pawh hi tum hnih kan ti nghe nghe a ni. Chu pawh chu kan han peiha a kalna tur DP&AR leh Finance a kaltlang vek tawh a, mahse sawi leh sawi hnu Covid leh kan finance dinhmun, central lam atanga kan pawisa dawn tur khatiang taka a lo tlem takah khan, “A hun rih lo e, i dah rih ang” tiin tunah pending-in a awm rih a ni tih kha he House zahawm tak hian min hriatpui se.

Aw le, Pu Speaker, ka react bak pawh kha kan lo chhinchhiah a, Pu Robert Romawia Royte tihdan takah, kei chauh lo pawh hi chhinchhiahtu an lo awm a nia. A tul anih chuan office lamah pawh la sawi zui tlan zel theih turah ka ngai.

Pu Speaker, kha kha ka duhtawk ang a. Heng ka Demand –

Demand No.	Purpose	Amount (in ₹)
8	Taxation	22,82,87,000.00
16	Home	7,60,46,73,000.00
30	Disaster Management & Rehabilitation	61,14,06,000.00
TOTAL		8,44,43,66,000,00

te hi he House zahawm tak hian min pass pui turin ka ngen e.

SPEAKER : Aw le, Minister zahawm tak Pu Lalchamliana'n a Department enkawlte Demand House-a pass a rawn dil e :

Demand No.	Purpose	Amount (in ₹)
8	Taxation	22,82,87,000.00
16	Home	7,60,46,73,000.00
30	Disaster Management & Rehabilitation	61,14,06,000.00
TOTAL		8,44,43,66,000,00

Remti a piangin ‘remti’ ti rawh u le. Remti lo kan awm chuan ‘remti lo’ ti ula.

Aw le, tunah chuan kan Minister zahawm tak Pu Lalchamliana Demand te–

Demand No.	Purpose	Amount (in ₹)
8	Taxation	22,82,87,000.00
16	Home	7,60,46,73,000.00
30	Disaster Management & Rehabilitation	61,14,06,000.00
TOTAL		8,44,43,66,000,00

House-in lungrualtakin a pass ta a ni.

PU LALCHAMLIANA, MINISTER: Pu Speaker, ka lawm e.

SPEAKER : Vawiin chawhnu kan thutkhawm hian kan Minister zahawm tak Pu R. Lalzirliana, Member zahawm tak Pu B.D. Chakma leh Pu Lalrintluanga Sailo ten inchhung lam harsatna leh programme hmasate avangin chawlh an dil a, tunah hian an awm lo a, an chhuah kan phalsak a ni.

Awle, vawiina kan Business chu kan zo leh ta rih a, naktuk 12th March, 2021(Zirtawpni) chawhma dar 10:30-ah kan thukhawm leh dawn nia.

Sitting is adjourned (8:05 PM)